

ሃዋሪታ ኦሱዋ

ጋላ ቆፋ

ሃዋሪታ ኦሱ ማፃፋይ፣ ሉቃስ ዋንጌላ ካሊዲ ፃፊቲዳ ማፃፋ። ማፃፋሰ ዳዲያ ዋና ቆፋይ ኮይሮ ዩሱሳ ካሊዲ አሳቲ ጌሻ አያናይ ካሌሱን፣ ኢያባ ኦዲያ ቃላ፣ «ዩሩሳሌምን፣ ዩሁዳ ቢታ ኡባን፣ ሳማራን፣ ሳዓ ጋፃ፣ ጋፃ ጋካናው» (1:8) ዋንጌላ ቢታ ኡባ ዋቲ ጋሊዳኮ ኦዲናሳ። ማፃፋይ፣ አማኖይ አይሁዳ አሳታ ጊደን ደሜቲዲ፣ ኩሜላ አላሜን ዳዲያ አሳ ኡባ አማኖ ጊደና ጋካናው ዋኒዲ ዳልጊዳኮ ኦዲያ ታሪኩ። ሃ ማፃፋ ፃፊይ፣ አማኒያ አሳቲ ሮሜ ካዎቲላ ኩንዲሳናው ጋርሳራ ማቁቲያ አሲ ጊደናይሳኔ አማኖይ አይሁዳታ ሃይማኖቲ ፖሎ ኦሊይሳ ጊዳይሳ ኤሪሳናው ከሂ ዳቡሪዲ አሊሰ።

ሃዋሪታ ኦሱ ማፃፋን ዩሱሳባ ኦዲያ ዋንጌላይ ጋኪያ ቤሳይ ዎዴን ዎዴን ዳልጊ ዳልጊ ቤይሳኔ ዎሳ ኬሊ ኤቁዳይሳ ቆንጨሲያ ሄዙ አይፌ ከፊሌታን ሻካናው ዳንዳዔቲሰ።

1. አማኖይ ዩሱሲ ሳሎ ኬዩ ሲሚን ደሜቲዳይሳ።
2. አማኖይ ኢስራዔል ቢታ ኡባ ጋኪዳይሳ።
3. ሮሜ ጉጂዲ ሜዲቲራኔ አባ ዩሹዋን ዳዲያ ቢታ ኡባን ዳልጊዳይሳ ቤሴሰ።

ሃዋሪታ ኦሱ ማፃፋን አዲዲ ቤንቴይ ጌሻ አያና ኦሱ ጊዲሺን፣ ጳንጻቆስ፤ ጋላሰ ዩሩሳሌምን ዳዲያ አማኔይሳታ ቦላ ዎልቃራ ዎዲዳይሳ ኦዳሰ። ሄሳዳካ፣ ማፃፋ ጊደን ቆንጨዳ ኦሱታ ኡባን ቤንቲዳይሳዳ ጌሻ አያናይ ዎሳ ኬላኔ ዎሳ ኬላ አይሴይሳታ ካሌሊዳይሳኔ ሚንጼሊዳይሳ ጉጂዲ ኦዳሰ። ቤኒ ዎዳ አሜቲያ አማኖ ኪታይ ደማ ደማ ኦዳቲዳ ቃላ፣ ኬሶን ኬሶን ኤኬቲሰ። ሃዋሪታ ኦሱዋ ጊደን ኦሴቲዳ ኦሱታ ኪታይ አማኒያ አሳ ዳዶኒኔ ዎሳ ኬላ ኢሲፊቲላን ዳዲያ ዎልቃይ አይ ሜላ ጊቲኮ ቤሴሰ።

ሃዋሪታ ኦሱዋ አይፌ ቆፋታ

- ማርካቴሳሰ ጊጌቲላ 1:1-26
- 1) ዩሱሳ ወርሴላ ኪታኔ ኢሚዳ ኡፋይሳ 1:1-14
 - 2) ዩሁዳ ቤሳን ሃራ ደሩዋ 1:15-26
- ዩሩሳሌምን ማርካቴላ 2:1-8:3
- ዩሁዳኒኔ ሳማራን ማርካቴላ 8:4-12:25
- ጳውሎሳ ሃዋሪቲላ ኦሱዋ 13:1-28:31
- 1) ኮይሮ ሃዋሪቲላ ቡሳ 13:1-14:28

- 2) ዩሩሳሌም ሺቁዋ 15:1-35
- 3) ናምዓን ሃዋርያት ቡሳ 15:36-18:22
- 4) ሄቭን ሃዋርያት ቡሳ 18:23-21:16
- 5) ጳውሎሲ ዩሩሳሌምን፣ ቂሳሪያኒኔ ሮሜን ቃሼቴላ 21:17-28:31

1-2 ቴዎፊሎሳ፣ ዩሱሲ ባ ኦሎዋ ኦሮቢዳ ዋዳጅ ሳሎ ቢዳ ጋላሳ ጋካናው፣ ኦሊዳባኔ ታማርሲዳባ ኡባ ታኒ ታ ኮይሮ ማፃፋን ፃፋለ። ሳሎ ባናፔ ሲንጼ ኢ ባ ዶሪዳ ሃዋርያት ጌሻ አያናን ከተሰ።

3 ኢ ባ ዋያፔ ጉዬ ሃይቆፔ ዳንዲዳይሳ ሲጾይ ባይና ቆንጨሲዲ ኤንታው ባና ቤሲሰ። ኦይታሙ ጋላሰ ኤንታው ቆንጨዲ ያሳ ካዎቴላባ ኤንታ ታማርሲሰ።

4 ኢሲ ዋዳ ኤንታራ ኢሲፌ ሚሼ ኤንታ ሃይሳዳ ያገዲ ከተሰ። «ታ ሂንቲው ኦዲዳ፣ ታ ኦዎይ ኢማና ገዳ ኡፋይሳ ቃላ ናገቴፔ አትን ዩሩሳሌሜፔ ኬዮፕቴ።

5 አይሰ ገኮ፣ ዮሃንሲ ሃላን ፃማቂሰ፣ ሺን ጉላ ዋዳፔ ጉዬ ጌሻ አያናን ሂንቲ ፃማቂታና» ያገሰ።

6 ሃዋርያት ዩሱሳራ ጋሂቲዳ ዋዳ ኢያኮ፣ «ሳዳው፣ ኢሰራዔሌታሰ ኔ ካዎቴላ ዛራና ዋዳይ ሃይሴ?» ያገዲ ኦይቺዶሶና።

7 ዩሱሲ ኤንታኮ፣ «ታ ኦዎይ ባ ማታን ኦሊያ ዋዲያኔ ላይላ ሂንቲ ኤራናው ዳንዳዔኬታ።

8 ሺን ጌሻ አያናይ ሂንቲ ቦላ ዋዲያ ዋዳ ሂንቲ ዋልቃን ኩማና። ያኒ ሲሚዲ፣ ዩሩሳሌምን፣ ዩሁዳ ቢታ ኡባን፣ ሳማሬኒኔ ሳዓ ጋፃ ጋካናው ታው ማርካታ ገደና» ያገሰ።

9 ሄሳ ገዳይሳፌ ጉዬ ኤንቲ ፃሊሺን፣ ቶቁ ቶቁ ገዲ፣ ሳሎዋ ቢን ሻራይካ ኢያ ኤንታ ኣይፊያፔ ጌንጲሰ።

10 ዩሱሲ ቢያ ዋዳ ኤንቲ ሳሎ ቲሺ ኦሊዲ ፃሊሺን፣ ቦላ ማፃ ማዒዳ ናምዑ አሳቲ አኬኮና ኤንታ ማታን ኤቂዲ፣

11 «ጋሊላ አሳው፣ ሳሎ ፃሊሼ፣ ሂንቲ አይሰ ኤቂዳቲ? ሃ ሂንቲ ቤዒሺን ሳሎ ቢዳ ዩሱሲ ሄሳዳካ ሲሚዲ ያና» ያገደሶና።

ዩሁዳ ቤሳን ማቲያሲ ዶሬቲሰ
(ማቶ 27:3-10)

1:1-2 ሉቃ 1:1-4 1:4 ሉቃ 24:49 1:5 ማቶ 3:11፤ ማር 1:8፤ ሉቃ 3:16፤ ዮሃ 1:33 1:8 ማቶ 28:19፤ ማር 16:15፤ ሉቃ 24:47-48 1:9 ማር 16:19፤ ሉቃ 24:50-51

12 ሄሳፌ ጉዬ፣ ሃዋሪቲ ሻማሆ ዳሪያፔ ዩሩሳላሜ ሲሚደሶና። ሻማሆ ዳሪይ ዩሩሳላሜስ ማታን ዳዔስ።

13 ኤንቲ ዩሩሳላሜ ጌሊዲ፣ ባንታ ዳዔያ ቤሳ ፖቂያ ቦላ ኬደደሶና። ኤንቲካ፣ ጳዊርሳ፣ ዮሃንሳ፣ ያይቆባ፣ ኢንዲሪያሳ፣ ፊልጶሳ፣ ቶማሳ፣ ባርቶሎሚዮሳ፣ ማቶሳ፣ ኢልፊዮሳ ናዓ ያይቆባ፣ ባ ቢታስ ሚሼቲያ ሲሞናኔ ያይቆባ ናዓ ዩሁዳ።

14 ሃይሳቲ ኡባይ ማጫሳታራ፣ ዩሱሳ ኣዬ ማይራሚራኔ ዩሱሳ ኢሻታራ ኡባይ ኢሲ ዋዛናን ጊዲዲ ሚንሉዲ ዋሶሶና።

15 ሄ ዋዴ ጳዊርሲ ዪታኔ ላታማ ጊዲያ ኣማኒያ ኣሳይ ሺቂዳ ቤሳን ዴንዲ ኤቂዲ፣ ሃይሳዳ ያጊስ።

16 «ኣሳው፣ ዩሱሳ ኦይኪዳይሳታ ካሌሉዳ ዩሁዳባ ጌሻ ኣያናይ ካሴ ዳዊቲ ዶናን ኦዲዳ ያሳ ቃላይ ፖሌታናው ቤሴስ።

17 ዩሁዲ ኑራ ኢሲፌ ሃ ኦሱዋ ኦላናው ደሬቲዳ ኣሲ።»

18 ሺን ዩሁዲ ባ ኢታ ኦሱዋን ዳሚዳ ሚሼን ጋዴ ሻሚስ። ኢ ጉፋኒዲ ኩንዲን፣ ኢያ ኡሎይ ዳኬቲስ፤ ኢያ ማራጩይ ኡባይ ካሬ ኬዩስ።

19 ዩሁዳ ቦላ ሃኒዳባ ዩሩሳላሜን ዳዔያ ኣሳ ኡባይ ሲዒስ። ሄሳ ጊሾ፣ ሄ ጋዲያ ባንታ ቃላን ኣኬልዳማ (ሱላ ጋዴ) ጊዲ ዪጊደሶና።

20 «ሄሲካ ማዝሙራ ማፃፋን፣
ኢያ ኬላይ ካሎ ኣቶ፤
ኦኒካ ኢያን ዳፖ።

ቃሲ ኢያ ሹማቲላ ሃሪ ኤኮ» ጌቲቲ ፃፊቲስ።

21 «ሄሳ ጊሾ፣ ጎዳ ዩሱሲ ኑ ጊዶን ሲሜሬቲዳ ዋዴ ኡባን ኑራ ዳዔይሳታፔ።

22 ቃሲ ፃማቂያ ዮሃንሳ ዋዲያፔ ደሚዲ ጎዳ ዩሱሲ ሳሎ ቢዳ ጋላስ ጋካናው ኑራ ዳዔይሳታፔ ኢሲ ኣሲ ኢያ ዳንዲዋስ ኑራ ማርካ ጊዳናው ቤሴስ» ያጊስ።

23 ሄሳ ጊሾ፣ ኣሳይ ደሩዋስ ዮስፖሳ ጊያ ባርሳባሳ ጌቲቲያ ዮሱፋኔ ማቲያሳ ናምዓ ሺሺደሶና።

24 ሄሳፌ ጉዬ፣ ያሳ ዋሲሼ፣ «ኣሳ ኡባ ዋዛና ኤሪያ ጎዳው፣ ሃ ናምዓታፔ ኔ ኦና ደሪዳኮ ኑና ቤሳ።

25 ዩሁዲ ባ ቤሳ ቢዲ፣ ኣጊዳ ኦሱዋኔ ሃዋሪቲላ ኦሱዋ ኤካና ሚላ ሃይሳታፔ ኑስ ቆንጨሳ» ያጊደሶና።

1:13 ማቶ 10:2-4፤ ማር 3:16-19፤ ሉቃ 6:14-16 1:20 ማዝ 69:25፤
109:8 1:22 ማቶ 3:16፤ ማር 1:9፤ ሉቃ 3:21

26 እንታ ቦላ ሳማ ዩጊዶሶና። ሳማይ ማቲያሳ ቦላ ዋጂን ማቲያሲ ታማኔ ኢሲ ሃዋርያት ቦላ ጉዢቲሰ።

2

ጌሻ አያና ዩሳ

1 ጳጳስጳስጳ ጊያ ጋላሳይ ጋኪዳ ዋዴ አማኒያ ኣሳ ኡባይ ኢሲፌ ኢሲ ቤሳን ሸቂዲ ዴዖሶና።

2 ቆፖና ዋልቃማ ሳቲዳ ጉሚያ ጉንሳይ ኣክኮና ሳሎፔ ዪዲ እንቲ ዴዒያ ከላ ኩሚሰ።

3 ቃሲ ታማ ላጮ ዳኒያ ኢንፃርሳቲ እንታው ቤንቲሼ፣ ሻኬቲ ሻኬቲ እንታ ኡባ ቦላ ዋጂዶሶና።

4 እንቲ ኡባይ ጌሻ አያናን ኩሚዲ ዲማ ዲማ ዶናን ኦዴታና ማላ ጌሻ አያናይ እንታ ዳንደዒሲን ሃሳያ ደሚዶሶና።

5 ሄ ዋዴ ቢታ ኡባፌ ዪዳ ያሳ ያያ ኣይሁዴቲ ዬሩሳሌማን ዴዖሶና።

6 ሄ ጉንላ ሲዒዳ ዋዴ ዳር ኣሳይ ሸቂዶሶና። አማኒያ ኣሳይ እንታ ቃላን ኦዴቲሺን ሲዒዳ ጊሾ

7 ማላላቲዲ፡ «ሃ ኦዴቲያ ኣሳ ኡባይ ጋሊላ ኣሴ ጊዶኮናዬ?

8 ያቲን፡ ኮኒ፡ ኦ ዬሌቲዳ ቢታ ዶናን እንቲ ኦዴቲሺን ዋኒዲ ሲዳናው ዳንደዒዶ?

9 ኮኒ ጳርጻን፣ ሜዶናን፣ ኤላማን፣ ናምዑ ሻፋታፔ ጊዶን ዴዔይሳቲ፣ ዪሁዳን፣ ቃጳዶቂያን፣ ጳንያሳን፣ ኢሲያን፣

10 ጳርጊን፣ ጳንፊሌን፣ ጊብጻን፣ ቃሬና ማታን ዴዒያ ሊቢያን ዴዔይሳታ። ኑፔ ባገቲካ ሮሜፔ ዪዳ ኣሳታ።

11 ኣይሁዴቲኔ ኣይሁዴቲላ አማኖ ጌሊዳ ኣሳቲ፣ ቃርጻሳኔ ኣራቤ ኣሳቲ፣ ያሳይ ኦሊዳ ጊታ ኦሎጥ ኦ ቃላን ኦዴቲሺን ሲዖሰ» ያጊዶሶና።

12 ኡባይ ማላላቲዲ፡ ጋናባ ጳዪዲ ዋሊኮ፡ «ላ ሃይሲ ኣይ ጉሴ?» ያጊዶሶና።

13 ሺን ሃራቲ፡ «ሃይሳቲ ኡዪዲ ማላቲዶሶና» ያጊዲ ቄልቂሲዶሶና።

ጳጳርሳ ሃሳያ

14 ሺን ጳጳርሲ፣ ታማኔ ኢሲ ሃዋርያታራ ዴንዲ ኤቂዲ፣ ባ ቃላ ጶቁ ኦሊዲ፣ እንታው ሃይሳዳ ያጊዲ ኦዲሰ፡ «ኣይሁዴቶ፣ ዬሩሳሌማን ዴዒያ ኡባቶ፣ ታኒ ኦዴይሳ ሲዒቲ።

15 ዋንታፌ ሄቩ ሳቲ ጊዲያ ጊሾ ሂንቲ ቆፔይሳዳ ሃ አሳቲ ማላቲቦኮና፤ ሄሲ ሂንቲው ኤሬቶ።

16 ሺን ሃይሲ ሃኒዳይ ናቢያ ኢዩዔሊ ኦዲዳይሲ ፖሌታና ማላሳ።

17 « ሳሳይ፣ ዋዲያ ወርሴላን ሃይሳዳ ሃናና ያጌሰ።

ታኒ አሳ ኡባ ቦላ ታ አያና ጉሳና።

ሂንቲ አዴ ናይቲኔ ማጫ ናይቲ፣

ቲንቢቲ ኦዳና።

ሂንቲ ያላጋቲ ቆንጩላ ቤዓና፤

ሂንቲ ጨማቲ አሙሆ አሙሃና።

18 ሄ ጋላሳታን ታና አማኒያ አዴ አይሌታ ቦላኔ ማጫ አይሌታ ቦላ

ታኒ ታ አያና ጉሳና፤

ኤንቲ ቲንቢቲ ኦዳና።

19 ቃሲ ታኒ ቦላ ሳሉዋን ኦራላባ፣

ጋርሳ ሳዓንካ ማላ ቤሳና።

ሱላ፣ ታሚኔ ዋልቃማ ጨጋኒ ቤንታና።

20 ጊታኔ ቦንቾ ጊዲዳ ሳዳ ጋላሳይ

ጋካናፔ ሲንሌ አዋይ ቋማና፤

አጌናይካ ሱላ ዳናና።

21 ሄ ዋዴ ሄሳዳ ሃናና፤

ጎዳ ሱንላ ያጌያ ኦኒካ አታና) ያጌሰ።

22 «ኢሰራዔል አሳው፣ ሃ ቃላ ሲዒቲ። ናዚሬቲ ዩሱሳ ኦናቲላይ፣ ያሳይ ሂንቲ ጊደን ኦሊዳ ዋልቃማ ኦሱዋኒኔ ማላታታን ሂንቲው ቆንጩይሳ ሂንቲ፣ ሂንቲ ሁዔን ኤሬታ።

23 ያሳ ካሴ ኤራኒኔ ኢያ ሺኒያን ዩሱሲ ሂንቲው አቋ ኢሜቲሰ። ሂንቲ ኢያ ናጋራንቾቲ ማሰቃሊያ ቦላ ካቂዲ ዋዳና ሜላ አላ ኢሚዴታ።

24 ሺን ያሳይ ሃይቆ ዋልቃ ዲጊዲ ኢያ ዴንላሰ። ሄሳ ጊሾ፣ ሃይቆይ ኢያ ኦይካናው ዳንዳዒቤና።

25 ዳዊቲይ ኢያባ ኦዲሼ፣

ሳቲ ያርኮና ሜላ፣

ሳዳይ ታ ኡሻቻን ዴዔሰ።

ሳዳ ኡባ ዋዴ ታ ማታን ቤዓይሰ።

26 ሄሳ ጊሾ፣ ታ ዋዛናይ ኡፋይቲሰ፤

2:17 እዩ 2:28-32 2:23 ማቶ 27:35፤ ማር 15:24፤ ሉቃ 23:33፤ ዮሃ 19:18
2:24 ማቶ 28:5-6፤ ማር 16:6፤ ሉቃ 24:5

ታ ኢንፃርሳን ኡፋይሲ ኩሚሰ፤
ሃይቂያ ታ አሳቴላይ ኡፋይሳን ዳና።

27 አይሰ ጊኮ፣ ታ ሹምፑዋ ሲያሌን አጋካ።
ቃሲ ኔ ጌሻ ናዓ አሃ ዋቂሳካ።

28 ኔኒ ታና ዴያ ኦጊያ ኤሪሳዳሳ።
ኔኒ ታራ ዴዔይሳን ታ ኡፋይሳይ ኩሚላ ጊዴሰ) ያጊሰ።

29 «አሳው፣ ኑ አዋ ዳዊቴባ ታ ሂንቴው ጌሻዳ ኦዳና። ዳዊቴይ
ሃይቂዲ ሞጌተሰ፤ ኢያ ዱፎይ ሃቺ ጋካናው ኑ ማታን ዴዔሰ።

30 ዳዊቴይ ናቤ ጊዲዳ ጊሾ ያሳይ ኢያ ሹሻፔ ኢሱዋ ኢያ
ካዎቴላ አራታ ቦላ ኡተሳናው ኢያው ጨቂዳ ጨቁዋ ኤሪሰ።

31 ሄሳ ጊሾ፣ ኪሪሰቶሳ ዴንዲዋ ሲንፎ ፀሊዲ፣ ሲያ ሹምፖይ
ሲያሌን አቲቤና፤ ኢያ አሳቴላይካ ዋቂቤና) ጊዲ ኦዲሰ።

32 «ያሳይ፣ ሃ ዬሱሳ ሃይቁዋፔ ዴንፊዲይሳሰ ኑኒ ኡባይ
ማርካ።

33 ሄሳ ጊሾ፣ ያሳይ ባራ ሃራና ሜላ ባፔ ኡሻቻ ባጋራ ኢያ
ጶቁ ጶቁ ኦሊዲ፣ ኢያው ኢማና ጌቴቲዳ ጌሻ አያና ኤኪዲ፣ ሃይሳ
ሂንቴ ሃዒ ቤዔይሳኔ ሲዔይሳ ኑ ቦላ ጉሲሰ።

34-35 ጋሶይካ፣ ዳዊቴይ ባ ሁዔን ሳሎ ቢቤናሺን ያጊሰ።

ሳዳይ፣ ታ ጎዳ፣ «ታኒ ኔ ሞርኬታ
ኔ ቶሆይ ዬዲያሶ ኦላና ጋካናው
ሃይሳን ታፔ ኡሻቻ ባጋን ኡታ» ጊሰ።

ያጊሰ።

36 «ሄሳ ጊሾ፣ ሃ ሂንቴ ማሰቃሊያ ቦላ ካቂዳ ዬሱሳ፣ ያሳይ
ጎዳኔ ኪሪሰቶሳ ኦሊዲይሳ ኢሰራዔሌ አሳ ኡባይ ቱማ ኤሮ»
ያጊሰ።

37 አሳይ ጳዒሮሲ ጊዳይሳ ሲዒዳ ዎዴ ባንታ ዎዛናን ቦሹቲዲ
ጳዒሮሳኔ ሃንኮ ሃዋሬታኮ፣ «ኢሻቶ፣ ያቲን ኑኒ አይ ኦሊኖ?»
ያጊደሶና።

38 ጳዒሮሲ ኤንታኮ፣ «ሂንቴ ናጋራይ አቶ ጌቴታና ሜላ ናጋራፔ
ሲሚዲ፣ ሂንቴ ኢሶይ ኢሶይ ዬሱሰ ኪሪሰቶሳ ሱንሳን ፃማቂቴቱ።
ያሳይ ኢሚያ ጌሻ አያና ሂንቴ ኤካና።

39 ጋሶይካ ያሳይ ኢማና ጊዳ ኡፋይሳ ቃላይ ሂንቴሰ፣ ሂንቴ
ናይታሲኔ ጎዳይ ኑ ያሳይ ባኮ ፀጊያ ሃሆን ዴዒያ ኡባሳ» ያጊሰ።

2:28 ማዝ 16:8-1 2:30 ማዝ 132:11፤ 2ሳው 7:12-13 2:34-35
ማዝ 110:1

40 ጳጳርሲ ኤንታው ሃራ ቃላካ ጉጂ ማርካቲዲ፡ «ሃ ዎዲያ ጌላ አሳ ቦላ ያናው ዳዲያ ፐርዳፌ ሂንቲ ሁዲያ አሽቲ» ያጌዲ ዘሪሰ።

41 ጳጳርሲ ኦዲዳይሳ ኤኪዳይሳቲ ፃማቄቲዶሶና። ሄ ጋላሰ ሄሹ ሙኩሉ ጌዲያ አሳይ አማኒዶሶና።

42 ኤንቲ ሃዋሬታ ቲሚርቲያን፣ ኢሲፊቴላን፣ ኡይሳ ሙሳኒኔ ያሳ ዎሳን ሚኖሶና።

አማኒያ አሳ ኢሲፊቴላ ዳዑቀ

43 ሃዋሬታ ኩሼን ዳር ኦራላባይኔ ማላቲ ኦሴቲያ ጊሾ አሳ ኡባይ ያዩዶሶና።

44 አማኒዳ ኡባይ ኢሲፊ ዳዶሶና፤ ባንታው ዳዲያባ ኡባ ኢሲፊ ሻኬቶሶና።

45 ኤንቲ ባንታው ዳዲያባ ባይዚዲ ሚሺያ ኢሱቀሰ ኢሱቀሰ ኮሺዳ ሜላ ሻኮሶና።

46 ኡባ ጋላሰ ኢሲ ዎዛናን ጌዲዲ ያሳ ኬላን ሸቆሶና። ባንታ ኬላን ኢሶይ ኢሱቀ ጃጌዲ ኡፋይሳኒኔ አሸኬ ዎዛናን ካላ ሞሶና።

47 ያሳ ጋላቲሼ አሳ ኡባን ሳቤቲዶሶና። ጎዳይ አቴይሳታ ጋላሰ ጋላሰ ኤንታ ቦላ ጉጃሰ።

3

ዎቤ አዳይ ፓዲሰ

1 ኢሲ ጋላሰ ጳጳርሲኔ ዮሃኒሲ ያሳ ዎሳናው ኡዲፋን ሳቴን ያሳ ኬላ ቢዶሶና።

2 ዬሌቶሶፔ ዶሚዲ ዎቤ ጌዲዳ ኢሲ አዳይ ያሳ ኬላ ጌሊያ አሳፔ ሚሼ ዎሳና ሜላ ኡባ ዎዳ ሎዎ ጌያ ያሳ ኬላ ፔንጌያን ኤሂዲ ዎሶሶና።

3 ሄ ዎቤ አዳይ ጳጳርሲኔ ዮሃኒሲ ያሳ ኬላ ጌላና ሃኒሺን ቤዒዲ ኤንታ ሚሼ ዎሲሰ።

4 ኤንቲካ ኢያ ጫዲ ጃሊዲ፣ «ኦኮ ሃ ጃላ» ያጌዶሶና።

5 ዎቤ አዳይ ኤንታፊ አይኮ ኤካና ዳኒን ኤንታኮ ጃሊሰ።

6 ሺን ጳጳርሲ ኢያኮ፣ «ታው ሚሼይ ባዎ፣ ሺን ታው ዳዲያባ ታኒ ኔው አማና። ናዘሬቴ ዬሱሰ ኪሪሰቶሳ ሱንላን ዴንዳዳ ሃሙታ» ያጌሰ።

7 ሄሳፊ ጉዬ፣ ዎቤ አዲያ ኡሻቻ ኩሺያ ኦይኪዲ ዴንላሰ። ኤሌሲዲ ኢያ ቶሆይኔ ቁንጫፊሌይ ሚኒ አጌሰ።

2:44 ሃ.ኦ 4:32-35

8 አዳይ ጉፒዲ ዳንዲ ኤቁሰ። ጌዴኔ ሃ ሃሙሉ ደሚሰ። ሄሳፊ ጉዬ፣ ሃሙተሹ፣ ጉፒሼኔ ያሳ ጋላተሹ ኤንታራ ኢሲፊ ያሳ ኬሌ ጌሊሰ።

9 ኢ ሃሙተሹኒኔ ያሳ ጋላተሹን አሳ ኡባይ ኢያ ቤዒደሶና።

10 ቤዒዳ ኡባይ ሚሹ ዋሳናው ሎዎ ጊያ ያሳ ኬላ ፔንጌን ኡተዳይሲ ኢያ ገዲዳይሳ ኤሪደሶና፤ ኢ ሃኒዳባ ቤዒዲ ማላሌተደሶና።

ጳጳርሲ ያሳ ኬላን ሃሳዱዳ ሃሳያ

11 አዳይ ጳጳርሳፔኔ ዮሃንሳፔ ዲዲኬ ገዲ ኦይኪዲ ዳዒሺን አሳ ኡባይ ማላሌተዲ፣ ሶሎሞኔ ባራንዳ ጊያሶን ኢሲፊ ኤንታኮ ዋዳደሶና።

12 ጳጳርሲ አሳ ቤዒዳ ዋዳ አሳኮ፣ «ኢሰራዔል አሳው፣ አይሰ ሃይሳን ማላሌተዲ? ዋይኮ አይሰ ኑና ጫዲ ያሌተ? ኑኒ ኑ ዋላቅን ዋይኮ ኑ ያሎተሳን ሃ አዲያ ሃሙሉዳባ ሂንቴው ዳኒ?

13 አብራሃሚ፣ ዪሳቃ፣ ያይቆባ ያሳይ፣ ኑ አዎታ ያሳይ፣ ባ ናዓ ዬሱሳ ቦንቲሰ። ሺን ሂንቴ ሃይቆሰ አሉ አሚዳይሳ ጲላዎሲ ቢላናው ኮዪንካ ሂንቴ ኢያ ሲንላን፣ ሓኒ ኢያ ኤርኮ» ያገደታ።

14 ሂንቴ ጌሻኔ ያሉዋ፣ ሓኒ ኢያ ኤርኮ» ገዲ፣ ሹሞፖ ዋዳደሳ ሂንቴው ቢላና ሜላ ጲላዎሳ ዋሲደታ።

15 ዳዑዋ አሜይሳ ሂንቴ ዋዳደታ፣ ሺን ያሳይ ሃይቆፔ ኢያ ዴንሱሰ። ሄሳሰ ኑኒ ማርካ።

16 ሃ ሂንቴ ቤዒይሲኔ ኤሪያ አዳይ ፓዲዲ ሚኒዳይ ዬሱሳ ሱንላን አሚኒዳይሳና። ሃ ሂንቴ ኡባ ሲንላን ኢያ ሃይሳዳ ፓሊዳይ ኢ ዬሱሳ አሚኒዳ ገሸሳ።

17 «ሃዒካ ታ አሻቶ፣ ሂንቴካ ሂንቴና ካሌሌይሳታዳ፣ ኤርና አሊዳይሳ ታኒ ኤራይሰ።

18 ሺን ያሳይ ቤኒ ናቤታ ኡባ ደናን፣ ሐሲሰቶሲ ዋዬ ኤካናው ቤሴሰ» ያገደይሲ ሃይሳዳ ፖሌታና ሜላ አሉሰ።

19 ሂዛ፣ ያሳይ ሂንቴ ናጋራ አቶ ጋና ሜላ ጎዳኮ ሲሚቴ።

20 ጎዳ ማታፔ ሚንሌሶ ዋዳይ ሂንቴው ያና። ያሳይ ከሪሰቶሳ ገዳና ሜላ ሲንላተዲ ደሪዳ ዬሱሳ ሂንቴው ዬዳና።

21 ያሳይ ባ ጌሻ ናቤታ ደናን ቤኒ ኦዲዳይሳ ሜላ ኡባባይ ኦራዲያ ዋዳይ ጋካናው ዬሱሲ ሳሎን ጋሞዳናው ቤሴሰ።

3:13 ከሳ 3:15 3:14 ማቶ 27:15-23፤ ማር 15:6-14፤ ሉቃ 23:13-23፤ ዮሃ 19:12-15

22 ሙሴይ፣ ሳይኖረው ታና ዳይ ታና ዳይ ለሚሉ ማለት ሆኖ ሂንቲ ገደፊ ሂንቲው ናቤ ዳንፋና። ሂንቲ ኢ ገይሳ ኡባ ሲባ።

23 ሄ ናቤይ ኦይይሳ ሲኖና ኣሲ ኦኒካ ኣሳ ገደፊ ቫኬቲዲ ቆየ) ያገሰ።

24 «ቃሲ ሳሙዔላፕ ዶሚዲ ዳዒያ ናቤቲ ኡባይ ሃ ዎዲያባ ኦዲዶሶና።

25 ሂንቲ ናቤታ ናይታ፤ ቃሲ ያሳይ ኣብራሃሜስ፣ ሳዓን ዳዒያ ኣሳ ኡባ ታኒ ኔ ሹሻ ባጋራ ኣንጃና) ያገዲ ኦ ኣዎታስ ገሊዳ ቃላ ላቲያ ናይታ።

26 ያሳይ ሂንቲና ኡባ ሂንቲ ኢታ ኦገያፕ ዛሪዲ ኣንጃና ማለ ባ ናዓ ዳንፋዲ ሂንቲው ኮይሮ ዬዲስ» ያገሰ።

4

ጳዊርሲኔ ዮሃንሲ ኣይሁዳ ሻንጎ ሲንፋን

1 ጳዊርሲኔ ዮሃንሲ ኣሳስ ኦዲሽን ካሂኔ ሃላቃቲ፣ ያሳ ከፋ ናገይሳታ ሃላቃይኔ ሳዲቃዊቲ ኤንታኮ ዩዶሶና።

2 ኤንቲ ዬሱሲ ሃይቆፕ ዳንዶይሳኔ ኢያ ጋሶን ሃይቆፕ ዳንዶይ ዳዔይሳ ኣሳ ታማርሲዳ ጊሾ ዩሎቲዶሶና።

3 ሄሳ ጊሾ፣ ኤንታ ኦይኪዲ ሳዓይ ኦማርሲዳ ጊሾ ዎንታና ጋካናው ቃሾ ከፋ ገልሲዶሶና።

4 ሽን ቃላ ሲባዲይሳታፕ ዳሮቲ ኣማኒዶሶና። ኣማኒዳ ኣዳ ኣሳ ታይቦይ ኢቻሹ ሙኩሉኮ ቢስ።

5 ዎንቲላ ጋላስ ዳሪያ ሃሪይሳቲ፣ ጨማቲኔ፣ ሂጌ ኣስታማሪቲ ዬሩሳላሜን ሸቂዶሶና።

6 ሄ ኣሳ ገደን ካሂኔ ሃላቃይ ሃኒ፣ ቃያፊ፣ ዮሃንሲ፣ ኢስኪንዲሬይኔ ካሂኔ ሃላቃ ሶ ኣሳቲ ኡባይ ዳዶሶና።

7 ሃዋርያት ባንታ ሲንፋን ኤሲዲ፣ «ኣይቢ ዎልቃን ዎይኮ ኦይ ሱንፋን ሃይሳ ሂንቲ ኦሊዳቲ?» ያገዲ ኦይቺዶሶና።

8 ሄ ዎዳ ጳዊርሲ ገሻ ኣያናን ኩሚዲ፣ «ዳሪያ ሃሪይሳቶ፣ ጨማቶ፣

9 ሃቺ ሃ ዎቤ ኣዲያስ ኦሴቲዳ ሎዎ ኦሱዋሲኔ ኢ ዋኒዲ ፓዲዳኮ ሂንቲ ኦና ኦይቺኮ፣

10 ማስቃሊያ ቦላ ሂንቲ ካቂን፣ ያሳይ ሃይቆፕ ዳንፋዲ ናዚሪቲ ዬሱስ ኪሪሰቶሳ ሱንፋን ሃ ኣዳይ ፓዲዲ ሂንቲ ሲንፋን ኤቂዳይሲ ሂንቲዉኔ ኢሰራዔሌ ኣሳ ኡባስ ኤሪቶ።

11 ለገምቤይሳቲ ቦሪዲ ኢዲዳ ሹቻይ፥
 ጎዳ ፃጵዋ ሚንሏያ፥
 ኡባፌ ኣዲያ ሹቹ ጊዲሰ፤

ሄ ሹቻይ ዩሱሳ።)

12 ሄሳ ጊሾ፥ አቶቴሌ ኢያ ባጋራፔ አቲን ሃራ ኦዴ ባጋራካ ባዋ።
 ኩኒ ኢያ ሱንላን አታና ሜላ አሳ ኡባሰ ያሳይ ሳሎፔ ጋርሳን
 ኢሚዳ ሃራ ሱንሌ ባዋ» ያገሰ።

13 ሸቂዳ አሳይ ጳዊርሴኔ ዮሃንሲ ሚኒዳ ሚኖቴላ ቤዒዳ ዋዴ
 ኤንቲ ታማሪቦና ጮ አሲ ጊዲዳይሳ አኬኪዲ ማላሌቲዶሶና፤
 ኤንቲ ዩሱሳራ ዴዔይሳ ኤሪዶሶና።

14 ቃሲ ፓዲዳ አዴይ ጳዊርሳራኔ ዮሃንሳራ ኤቂዳይሳ አሳይ
 ቤዒዲ ጊያባ ጳዪዶሶና።

15 ሺን ጳዊርሳኔ ዮሃንሳ ካሬ ኬያና ሜላ ኦሊዲ ባንታ ጊዶን፥

16 «ሃ አሳታ ኑ አይ ኦሊና? ኤንታ ኩሼን ኦሴቲዳ ጊታ
 ማላታይ ዩሩሳላሜን ዴዒያ ኡባሰ ቤንቴሰ። ኩኒ ሄሳ ኤርኮ ጋናው
 ዳንዳዎኮ።

17 ሺን ሃ ኦዲይ አሳ ጊዶን ላሌቶና ሜላ ሂዛፔ ጉዬ ሃ አሳቲ
 ዩሱሳ ሱንላን ኦዴሰካ ኦዶና ሜላ ሚንሏዲ ናጊሳና» ያገዲ
 ዘሪቲዶሶና።

18 ኤንታ ያገዲ፥ ዩሱሳ ሱንላን ሂዛፔ ኦዶና ሜላ ዋይኮ
 ታማርሶና ሜላ ከቲዶሶና።

19 ሺን ጳዊርሴኔ ዮሃንሲ ኤንታኮ ዛሪዲ፥ «ያሳሰ
 ከቲታናይሳፌኔ ሂንቴው ከቲታናይሳፌ ያሳ ሲንላን አዉሲ ሎዎኮ
 ኣኔ ሂንቴ ፒርዲቴ።

20 ኩኒ ቤዒዳባኔ ሲዒዳባ ኦዶና አጋናው ዳንዳዎኮ»
 ያገደሶና።

21 ቢታ ጨማቲኔ ዴሪያ ሃሬይሳቲ ካሴፔ ሚንሏ ናጊሲዲ
 ኤንታ ዩዲ አገደሶና። አሳይ ሃኒዳባሰ ያሳ ጋላቲያ ጊሾ ኤንታ
 ሴራናው ዳንዳዒቦኮና።

22 ሄ ማላታን ሃርጊያፌ ፓሊዳ አዲያሰ ላይላይ ኦይታማፔ
 አዲሰ።

አማኒያ አሳ ዋሳ

23 ጳዊርሴኔ ዮሃንሲ ቢርሼቲዲ ባንታ ዳቦታኮ ቢዲ፥ ካሄኔ
 ሃላቃቲኔ ጨማቲ ባንታኮ ጊዳባ ኡባ ኤንታው ኦዲዶሶና።

24 ኤንቲ ሄሳ ሲዒዳ ዎዴ ኢሲ ዎዛናን ጊዲዲ ያሳ ሃይሳዳ ያጊዲ ዎሲደሶና፡ «ኡባ ሃሪያ ጎዳው፡ ሳሉዎ፡ ሳዓ፡ ኣባኔ ኤንታ ጊደን ዴዒያ ኡባባ ሜዲዳይሶ፡

25 ኔኒ ኔ ኣይሊያ፡ ኑ ኣዎ ዳዊቲ ዶናን ጌሻ ኣያናን፡ «ዴሬይ ኣይሰ ዩሎቲዶና?

ኣሳይ ኣይሰ ጮ ማቄቲዶና?

26 ሳዓ ካዎቲኔ

ዴሪያ ሃሪይሳቲ ኢሲፌ ጎዳ ቦላኔ

ከሪሰቶሳ ቦላ ዴንዲደሶና) ያጋዳሳ።

27 «ቱማካ፡ ሄሮዲሲኔ ጳንጻ ጲላዎሲ ኣይሁዴ ጊደና ኣሳራኔ ኢሰራዔሌ ኣሳራ ኔ ዶሪዳ ኔ ጌሻ ናዓ ዩሱሳ ቦላ ዴንዳናው ሃ ካታማን ሸቁደሶና።

28 ቃሲ ኔኒ ኔ ዎልቃኒኔ ኔ ሸኒያን ኦላና ጋዳ ቆፓ ኡቲዳባ ኡባ ፖሊደሶና።

29 ሃዒካ ጎዳው፡ ኤንታ ማንዴላ ቤዓ፤ ኑኒ ኔ ኣይሌቲ ኔ ቃላ ኩሚላ ዎዛናን ኦዳና ሜላ ኑና ዳንዳዒሳ።

30 ኔ ጌሻ ናዓ ዩሱሳ ሱንላን ሃርጋንቸታ ፓላናው፡ ኦራላባይኔ ማላታቲ ኦሴታና ሜላ ኔ ኩሺያ ሚጫ» ጊዲ ዎሲደሶና።

31 ኤንቲ ያሳ ዎሲዳፔ ጉዬ ሄ ኤንቲ ሸቁደሶይ ቃደሰ። ኤንታ ኡባን ጌሻ ኣያኒ ኩሚን ያሳ ቃላ ሚኖቴላን ኦዲደሶና።

ኮይሮ ኣማኒዳ ኣሳ ኢሲፌቴላ

32 ኣማኒይሳቲ ኡባይ ቆፋኒኔ ዎዛናን ኢሲኖ ጊዲደሶና። ኤንቲ ባንታው ዴዒያባ ታባ ጎናሺን ኢሲፌ ሻኬቶሶና።

33 ሃዋርቲ ጎዳ ዩሱሲ ሃይቆፔ ዴንዲዳይሳ ጊታ ዎልቃን ማርካቶሶና። ያሳይ ኤንታ ኡባሰ ኣጵ ኬሃቴላ ዳርሲዲ ኢሚሰ።

34 ቢቲ ዎይኮ ከሊ ዴዔይሳቲ ኡባይ ባይዚ ኤኪዳ ሚሺያ ኤሄያ ጊሾ ኣማኒይሳታ ጊደን ሜቶታንቸይ ኢሶይካ ባዎ።

35 ሚሺያ ኤሄዲ ሃዋሪታሰ ኢሞሶና፤ ሄ ሚሺያ ኢሱዋሰ ኢሱዋሰ ኮሺይሳዳ ሻኪ ሻኪ ኢሜሰ።

36 ቆጲሮሳ ጊያ ቤሳን ዩሌቲዳ ዮሴፋ ጊያ ሌዌ ሸሻፔ ጊዲዳ ኢሶይ ዴዔሰ። ኢያ ሱንላ ሃዋሪቲ ባርናባሳ (ሚንሌሶ ናዓ) ጊደሶና።

37 ባርናባሲ ባው ዴዒያ ቢታ ባይዚዲ ሚሺያ ኤሄዲ ሃዋሪታሰ ኢሚሰ።

4:24 ከሳ 20:11፤ ናህ 9:6፤ ማዝ 146:6 4:25 ማዝ 2:1-2 4:27 ማቶ 27:1-2፤ ማር 15:1፤ ሉቃ 23:1፤ 7-11፤ ዮሃ 18:28-29 4:32 ሃ.ኦ 2:44-45

5

ሃናኒያን ኢያ ማቸው ሳጲር

- 1 ኢሲ ሃናኒያ ጊያ አዳይ ባ ማቸ ሳጲሪራ ጋዴ ባይዚስ።
- 2 ሄ ባይዚዳ ሚሺያፕፕ ባ ማቸያ ኤሪሽን ባጋ አሺዲ፣ አተዳይሳ ኤሂዲ ሃዋሪታስ ኢሚስ።
- 3 ሺን ጳጳርሲ ሃናኒያኮ፣ «ኔኒ ጌሻ አያና ጨማና ማላኔ ጋዲያ ባይዚዳ ሚሺያፕፕ ሻካዳ አሻና ማላ ፃላሄይ ኔ ዋዛናን አይስ ጌሊዴ?»
- 4 ኔኒ ባይዛናፕ ካሴ ጋዴይ ኔባ ጊዴኔዬ? ቃሲ ኔኒ ባይዛ ሲሚንካ ሚሺይ ኔባ ጊዴኔዬ? ያቲን፣ ሄሳ ማላባ ኦላናው አይስ ኔ ዋዛናን ቆፓዲ? ኔኒ ያሳ ቦላ ዋርዶታዳሳፕ አቲን አሳ ቦላ ዋርዶታባካ» ያገሰ።
- 5 ሃናኒይ ሄ ቃላ ሲዲዳ ማላ ኩንዲዲ ሃይቁስ፤ ሄሳ ሲዲዳ ኡባይ ዳሮ ያዩሰ።
- 6 ናባቲላ አሳቲ ሶ ጌሊዲ ኢያ አሃ ፃፂዲ ኤፊዲ ሞጊዶሶና።
- 7 ሄቭ ሳቲፕ ጉዬ ሃናኒያ ማቸያ ሄሳ ኤርና ዴዓሼ ጳጳርሲ ዴዒያሱዋ ጌላሱ።
- 8 ጳጳርሲ ኢኮ፣ «ሂንቲ ጋዲያ ሃይሳ ማላ ሚሽስ ባይዚዳቲ? እኔ ታው ኦዳ» ያገሰ።
- ኢያካ፣ «ኤ፣ ሃይሳ ማላ ሚሽስ ባይዚዳ» ያገሱ።
- 9 ጳጳርሲ ማጫሲው፣ «ኔራኔ ኔ አዚናራ ጎዳ አያና ፓጫናው አይስ ዘሬቲዳቲ? ሂኮ፣ ኔ አዚና ሞጊዳ አሳቲ ካሬን ዴዖሶና፤ ኔናካ ኤንቲ ካሬ ኬሳና» ያገሰ።
- 10 ማጫሲያ ኢራካ ጳጳርሳ ቶሁዋ ማታን ኩንዳዳ ሃይቃ አጋሱ፤ ናባቲላቲ ጌሊያ ዋዴ ሃይቁዳሮ ዴሚዲ ካሬ ኬሲዲ፣ ኢ አዚና ማታን ሞጊዶሶና።
- 11 ኩሜላ ዋሳ ኬላይኔ ሄሳ ሲዲዳ ሃራ አሳ ኡባይ ዳር ያዩዶሶና።

ኦራላባታኔ ማላሊሲያባታ

- 12 ሃዋሪቲ ዳር ማላታታኔ ኦራላባታ አሳ ጊዶን ኦሶሶና። አማኒያ ኡባይ ሶሎሞኔ ባራንዳን ኢሲፌ ሺቆሶና።
- 13 ሃራ አሳፕ ኤንታራ ጋሄታናው ኢሲ አሲካ ሚኒቤና፣ ሺን አሳይ ኤንታ ቦንቸስ።
- 14 አማኒያ አዳታኔ ማጫሳታ ታይቦይ ካሴይሳፌ ዳሪሽ ቢስ።

15 ሄሳ ጊሾ፣ አሳይ ሃርጋንቸታ ሃላኒኔ አልጋን ቶኪዲ ጴጂሮሲ አዲያ ዎዴ ኢያ ኩያይ ኤንታፌ ኢሶታ ኢሶታ ቦላ ሽዎፓና ማላ ኦጌ ዶናን ኬሲዲ ዎሶሶና።

16 ቃሲ ዳሮ አሳይ ዬሩሳላሜ ማታን ዴዲያ ካታማታፔ ሃርጋንቸታኔ ቱና አያኒ ዋይሲያ አሳታ ኤኪዲ ዮሶና፤ ኡባይካ ፓዲዶሶና።

ሃዋሪታ ቦላ ጎዲ ዴንዲሰ

17 ካሂኔ ሃላቃይኔ ኢያራ ዴዲያ ሳዲቃዌቲ ኡባይ ቃናቲን ኩሚዲ ሃዋሪታ ቦላ ዴንዲዶሶና።

18 ሃዋሪታ አይኪዲ ዴሪያ ቃሾ ኬላን ዩጊዶሶና።

19 ሺን ጎዲ ኪታንቸይ ቃማ ቃሾ ኬላ ፔንጊያ ዶዩዲ ሃዋሪታ ካሪ ኬሲዲ፣

20 «ቢዲ፣ ያሳ ኬላን ኤቂዲ ሃ ኦራላ ዴያ ቃላ አሳ ኡባሰ ኦዲቲ» ያጊሰ።

21 ሃዋሪቲ ሄሳ ሲዲዳ ዎዴ ዎንታ ጉራ ያሳ ኬላ ጌሊዲ ታማርሶ ዶሚዶሶና።

ካሂኔታ ሃላቃይኔ ኢያራ ዴዲያሳቲ ዩዲ፣ ኢሰራዴሌ ጪማታ ኡባ ዪጊ ሺሺዲ ሃዋሪታ ባንታ ሲንፊ ኤሃና ማላ ዎታዳሬታ ቃሾ ኬላ ኪቲዶሶና።

22 ሺን ዎታዳሬቲ ቃሾ ኬላ ቢዲ ሃዋሪታ ዴሚቦኮና። ጉዬ ሲሚ ዩዲ ዴሪያሰ፣

23 «ኮኒ ቢያ ዎዴ ቃሾ ኬላ ፔንጊይ ሚንፊ ጎርዴቲን፣ ናጌይሳቲ ፔንጊኒ ኤቂዳይሳታ ዴሚዳ። ሺን ኮኒ ካሪያ ዶያ ዎዴ ጊዶን ሃሪ አቶሺን ኢሲ አሲካ ባዎ» ያጊዶሶና።

24 ሄሳ ጊሾ፣ ያሳ ኬላ ዎታዳሬታ ኪቲይሲኔ ካሂኔ ሃላቃቲ ሄሳ ሲዲዳ ዎዴ «ሃዋሪታ ቦላ አይቢ ሃኒዴ?» ያጊዲ ሂርጊዶሶና።

25 ሄ ዎዴ ኢሲ አዳይ ኤንታኮ ዩዲ፣ «ሂኮ፣ ቃሾ ኬላ ሂንቲ ጌልሲዳ አሳቲ ያሳ ኬላን ኤቂዲ አሳ ታማርሶሶና» ያጊዲ ኤንታው ኦዲሰ።

26 ያሳ ኬላ ዎታዳሬታ ኪቲይሲ ባ ዎታዳሬታራ ቢዲ ሃዋሪታ ኤሂሰ። ሺን ኤንቲ ባንታና አሳይ ሹቻን ጫዳና ጊዲ ያዩዳ ጊሾ ኤንታ አዳሺዲ ኤሂዶሶና።

27 ኤንቲ ሃዋሪታ ኤሂዲ፣ ሺቂዳ ሻንጉዎ ሲንላን ኤሲን ካሂኔ ሃላቃይ ኤንታኮ፣

28 «ሂንቴና ኑኒ ሄ ኡራ ሱንጻን ታማርሶና ሜላ ሚንጢዲ ከቲቦኮ? ሄኮ፡ ሂንቴ ቲሚርቲያ ዩሩሳላሚ ካታማ ኡባ ጋሊዳታ። ሄ ኡራ ሼምፑዋሰ ኑና ኦይጻናው ቆፔቲ?» ያጊዲ ኦይቺሰ።

29 ጳጳሮሳራኔ ሃንኮ ሃዋሪታራ ኤንታው ዛሪሼ፡ «ኑኒ ኣሳሰ ከቲታናፔ ያሳሰ ከቲታናው ቤሴሰ።

30 ማሰቃሊያ ቦላ ሂንቴ ካቂዲ ዋዲዳ ዩሱሳ ኑ ኣዋታ ያሳይ ሃይቆፔ ዳንጲሰ።

31 ኢሰራዔሌቲ ናጋራፔ ሰማና ሜላኔ ኤንታ ናጋራይ ኣቶ ጌቲታና ሜላ ያሳይ ዩሱሳ ሃራይሳኔ ኣሼይሳ ኦሊዲ ቦንቸን ባፔ ኡቫቻ ባጋን ኡተሲሰ።

32 ሂሳሰ ኑኒ ማርካ፤ ቃሲ ያሳይ ባና ኣማኔይሳታሰ ኣሚዳ ጌሻ ኣያናይካ ማርካ» ያጊደሶና።

33 ሺቁዳ ኣሳይ ሄሳ ሲዒዳ ዋዴ ዳር ዩሎቲዲ፡ ሃዋሪታ ዋዳናው ቆፒደሶና።

34 ሺን ኣሳ ኡባን ዳር ቦንቸቲዳ፡ ሂጌ ኣስታማራይ፡ ጋማሊያሌ ጊያ ኢሲ ፋሪሳዌይ ዳንዲ ኤቂዲ ሃዋሪታ ጉላ ዋዴሰ ካሬ ኬሳና ሜላ ከቲሰ።

35 ሂሳፌ ጉዬ፡ ሺቁዳ ኣሳኮ፡ «ኢሰራዔሌ ኣሳው፡ ሃ ኣሳታ ቦላ ሂንቴ ኣላናው ቆፒያባፔ ናጌቲቲ።

36 ኣይሰ ጊኮ፡ ሃይሳፌ ካሴ ቲዋዳሲ ባና፡ «ታኒ ጊታ» ጊዲ ዳንዲን፡ ኦይዲ ፀቲ ጊዲያ ኣሳቲ ኢያራ ኢሲፊደሶና። ሺን ኢያ ዋዲን ኢያ ካሊዳ ኡባይ ላሌቲን ፓሶና ኣሲ ጊዲዲ ኣቲደሶና።

37 ሂሳፌ ጉዬ፡ ኣሳይ ታይቤቲያ ዋዴ ጋለላ ዩሁዲ ዳንዲዲ ዳር ኣሳ ፓንጋዩዲ ካሌሊሰ፡ ሺን ኢያካ ዋዲን ኢያ ካሊዳ ኣሳ ኡባይ ላሌቲሰ።

38 ሃዒካ ታ ሂንቴው ኦዳይሰ፤ ሃ ኣሳታፔ ሻኬቲቲ፤ ኤንታ ቦቾፊቲ። ኣይሰ ጊኮ፡ ሃ ቆፋኔ ሃ ኦሱዋ ኣሲ ኦሊያባ ጊዲኮ ዳያና።

39 ሺን ሃ ቆፋይኔ ሃ ኦሶይ ያሳፌ ዩዳባ ጊዲኮ፡ ሂንቴ ኤንታ ዳይሳናው ዳንዳዔኬታ። ጌላዳ ያኒሼ ሂንቴ ያሳራ ካጩታና» ያጊዲ ኦዲሰ። ሄሳ ጊሾ፡ ሺቁዳ ኣሳይ ጋማሊያሌ ዞሪያ ኤኪደሶና።

40 ሃዋሪታ ሶ ፀጊዲ ሊሶን ጋራፊሲሰ። ሂሳፌ ጉዬ፡ ኤንታኮ፡ «ዩሱሳ ሱንጻ ናምዓንጻ ዳንጻፊቲ» ጊዲ ቢርሺ ዩዲደሶና።

41 ዩሱሳ ሱንጻ ጊሾ ኤንቲ ካዉያናይሲ ቤሲያባ ጊዴይሳ ኤሪዳ ጊሾ ሻንጉዋ ሲንጻፌ ኡፋይቲሼ ኬዩደሶና።

42 ኤንቲ ኡባ ዎዴ ያሳ ኬፋኒኔ ኣሳ ሶን ዩሱሲ ኢ ኪሪሰቶሳ ጊዴይሳ ታማርሶን ሳባኮ ኣጊቦኮና።

6

ላፑን ኣሳታ ዶሬቴላ

1 ሄ ዎዴ ካሌይሳታ ታይቦይ ዳሪ ዳሪ ቢሺን፣ ጊሪኬ ዶና ኦዴቲያ ኣይሁዴቲ ዩሁዳን ዩሌቲዲ ዳዒያ ኣይሁዴታ ቦላ ዙዙሚዶሶና። ኣይሰ ገኮ፣ ጊሪኬ ዶና ኦዴቲያ ኣይሁዴቲ፣ «ጋላሰ ጋላሰ ኢሚቲያ ካላን ኑ ኣምዒቲ ናቄቶሶና» ያጊዶሶና።

2 ታማኔ ናምቡ ሃዋሪቲ ዎሳ ኬፋ ኣሳ ኡባ ያጊዲ፣ «ኑኒ ያሳ ቃላ ኦዴይሳ ኣጊዲ ካሊ ገሻናው ኑሰ ቤሴና።

3 ሂዛ፣ ኢሻቶ፣ ሎዎ ኣሳታ፣ ጌሻ ኣያናኒኔ ጨንጫቴላን ኩሚዳ ላፑን ኣሳታ ሂንቲ ጊዶፊ ዶሪቴ፤ ኑኒ ኤንታ ሃ ኦሱዋሰ ሹማና።

4 ሺን ኑኒ፣ ኑ ኩሚላ ዎዲያ ያሳ ዎሳኒኔ ቃላ ታማርሶን ፔሻና» ያጊዶሶና።

5 ሃዋሪቲ ኦዲዳ ኦዳይ ኣሳ ኡባ ኡፋይሲሰ። ሄሳ ጊሹ፣ ኣማኖይኔ ጌሻ ኣያኒ ኩሚዳ ኢሰዒፋኖሴ፣ ፊልጶሳ፣ ጲሮኮሮሳ፣ ኒቃሮኔ፣ ዒሞና፣ ጳርሜናኔ ኣይሁዴ ኣማኖ ጌሊ ሲሚዳ ኣንጾኪያ ኒቆላዎሳ ዶሪዶሶና።

6 ኤንታ ሃዋሪታ ሲንላን ኤሲን፣ ሃዋሪቲ ኤንታ ቦላ ኩሹ ዎሊዲ ያሳ ዎሲዶሶና።

7 ያሳ ቃላይ ዳልጊ ዳልጊ ቢሰ። ዩሩሳላሚን ዳዒያ ኣማኔይሳታ ታይቦይ ዳሪ ዳሪ ቢሰ፤ ዳሮ ካሂኔቲካ ኣማኒዶሶና።

ኢሰዒፋኖሴ ኦይኬቲሰ

8 ኢሰዒፋኖሴይ ኣጶ ኬሃቴላኒኔ ዎልቃን ኩሚዲ ኣሳ ጊዶን ኦራላባታኔ ማላታታ ኦሌሰ።

9 ኣይሌቴላፊ ኬዩዳ ኣይሁዴ ዎሳ ኬፋ ኣሳይ ቄሪናፔኔ ኢሰኪንዲሪያፔ ኪልቄያፊኔ ኢሲያፔ ዩዳ ኢሲ ኢሲ ኣሳቲ ዳንዲዲ ኢሰዒፋኖሴራ ፓላሚዶሶና።

10 ሺን ኢሰዒፋኖሴይ ኣያና ዎልቃን ኦዴቲያ ጨንጫቴላ ኤንቲ ኤቄታናው ዳንዳዒቦኮና።

11 ሄ ዎዴ ኤንቲ፣ «ሙሴኔ ያሳ ኢ ጫዩሺን ሲዒዳ» ጊያ ዎርዶ ኣሳታ ሻሚዶሶና።

12 ሄሳዳ ኦሊዲ ቢታ ጨማታኔ ሂጌ ኣሰታማሬታ ኢያ ቦላ ዳንሊዶሶና። ኢሰዒፋኖሴ ኦይኪዲ ሻንጉዋ ሲንሌ ኤፊዶሶና።

13 ኢያ ቦላ ፓይዲዳ ዎርዶ ማርካቲ፣ «ሃ ኡራይ ሃ ያሳ ኬፋኔ ሙሴ ሂጊያ ዛሪ ዛሪ ጫዩሰ።

14 ኢ፡ «ሃይሲ ናዚሬቴ ዬሱሲ፡ ሃ ያሳ ከላ ላላና፤ ቃሲ ሙሴይ ኑስ አሚዳ ሂጊያ ላማና) ያጊሺን ኑኒ ሲዒዳ» ያጊዶሶና።

15 ሻጎን ሺቆን ኡቲዳ አሳ ኡባይ ኢስዒፋኖሴ ሎይሉዲ ዒሊያ ዋዴ ኢያ ሶምያይ ኪታጎች ሶምያ ዳኔስ።

7

ኢስዒፋኖሴ ሃሳያ

1 ካሂኔታ ሃላቃይ ኢስዒፋኖሴኮ፡ «ሃይሲ ቱሜ?» ያጊዲ ኦይቺስ።

2 ኢስዒፋኖሴይ፡ «ታ አሻቶ፡ ታ አዋቶ፡ ሲዒቴ! ኑ አዋ ኡብራሃሜይ ካራኔን ዳናው ባናፔ ሲንሐ ማሴጶምያን ዴዒሺን፡ ቦንች ያሳይ ኢያው ቆንጨዲ፡

3 ሩ ቤታፌ ኔ ዳቦታፔ ሻኬታዳ ታኒ ኔና ቤሲያ ቤታ ባ) ያጊስ።

4 ሄ ዋዴ ኡብራሃሜይ ካልዳዌታ ቤታፌ ከዪዲ ካራኔን ዳናው ቢስ። ኢያ አዋይ ሃይቂዳፔ ጉዬ ያሳይ ኢያ ሃ ቤታ ሃዒ ሂንቴ ዴዒያ ቤሳ ኤሂስ።

5 ኢ ሃ ቤታፌ ሃሪ ኡቶሺን ቶሆይ ዬዲያ ቤሲካ ኡብራሃሜስ አሚቤና። ሺን ናዒ ኢያው ባይና ዋዴ ያሳይ ሃ ቤታ ኢያውኔ ኢያ ሺሻስ ላታ ኦሉዲ አማናይሳ ቃላ ጌሊስ።

6 ያሳይ ኡብራሃሜኮ፡ ሩ ሺሻይ ሃራ ቤታን አማላቴላን ዳና፤ ያን ኦይዲ ያቱ ላይሉ ኤንቲ አይሌቴላን ሃሪታና።

7 ሺን ታኒ ኔ ሺሻ ሃሪያ ዴሪያ ቦላ ፒርዳና። ሄሳፌ ጉዬ፡ ኤንቲ ሄ ቤታፌ ከዪዲ ሃይሳን ታው ጎይናና) ያጊስ።

8 ያሳይ ኡብራሃሜ ሺሻይ ቃፃሪታና ሜላ ኢያራ ጫቂን፡ ዪሳቂ ዬሌቲዳ ሆስፑንላ ጋላሳን ቃፃሪስ። ዪሳቂ ያይቆባ ቃፃሪስ፤ ቃሲ ያይቆቢ ታማኔ ናምቡ ባ ናይታ፡ ኑ አዋታ ማይዛታ ቃፃሪስ።

9 «ያይቆባ ናይቲ ዮሴፋ ቃናቲዲ ጌብዜ ቤታን አይሌቴላስ ባይዚዶሶና፡ ሺን ያሳይ ኢያራ ዴዒስ።

10 ኢያ፡ ኢያ ዋዬ ኡባፌ ከሲስ። ጌብዜ ካወዋ ሲንላን ሳባኔ ጨንጫቴሉ ኢያው አሚስ። ጌብዜ ካወዋ ዮሴፋስ ጌብዜ ቤታኔ ባ ከላ ኡባ አይሳናዳ ሃላቃቴሉ አሚስ።

7:2 ሜዴ 12:1 7:4 ሜዴ 11:31፤ 12:4 7:5 ሜዴ 12:7፤ 13:15፤ 15:18፤
17:8 7:6 ሜዴ 15:13-14 7:7 ከሳ 3:12 7:8 ሜዴ 17:10-14፤
21:2-4፣ 25፣ 26፤ 29:31-35 7:9 ሜዴ 37:11፣ 28፤ 39:2፣ 21 7:10
ሜዴ 41:39-41

11 «ጊብፄ ቢታኒኔ ካናኔ ቢታ ኡባን ኮሺ ጌሊዲ ዳር አሳ ኡንዔሊስ። ሄ ዎዴ ኑ ማይዛቲ ካሊ ዴማናው ዳንዳዒቦኮና።

12 ያይቆቢ ጊብፄ ቢታን ካሊ ዴዔይሳ ሲዒዲ ኑ አዋታ ኮይሮ ያ ዩዲስ።

13 ናሞዓንፉ ቡሳን ዮሴፊ ባ አሻታስ ባናቴላ ኤሪሲስ። ጊብፄ ካዎይካ ዮሴፋ ሸሻ ኤሪስ።

14 ዮሴፊ ባ አዋ ያይቆባኔ ባ ዳቦ ኡባ፣ ላፑን ታማኔ ኢቻሹ አሳ ባኮ ያና ሜላ ከቲዲ ኤሂሲስ።

15 ያይቆቢ ጊብፄ ቢታ ዎዲስ፤ ኢኔ ኢያ ናይቲ ያን ሃይቂዶሶና።

16 ኤንታ አሃይ ሄ ቤሳፌ ሴኬሜ ቢታ ቶኬቲዲ ቢዲ፣ ያን አብራሃሜይ ሃዋሬ ናይታፔ ዳሮ ቢራን ሻሚዳ ዱፎን ሞጌቲስ።

17 «ሺን ያሳይ አብራሃሜስ አማና ጊዳይሳ ፖሊያ ዎዴይ ጋካናው ማቲዳ ዎዴ ጊብፄ ቢታን ዴዒያ ኑ አሳይ ዳሪ ዳሪ ቢስ።

18 ሄሳፌ ጉዬ፣ ዮሴፋ ኤሮና ሃራ ካዎይ ጊብፄ ቢታን ካዎቲስ።

19 ሄ ካዎይ ኑ ዜሬላ ጌኒዲ ጉላ ናይቲ ሃይቃና ሜላ ኤንታ ካሪ ኬሲ ዩጋና ሜላ ኑ አዋታ ኡንዔሊስ።

20 «ሄ ዎዴ ሙሴይ ዩሌቲስ፤ ኢ ያሳ ሲንሳን ዳሮ ሎዎ ናዓ። ባ አዋ ከላን ሄቩ አገና ጋካናው ዲጨስ።

21 ሙሴይ ዎራ ሆሌቲዳ ዎዴ ጊብፄ ካዉዋ ናዒያ ዴማ ኤካዳ ባ ናዓ ኦሳዳ ኢያ ዲቻሱ።

22 ሙሴይ ጊብፄታ ጨንጫቴላ ኡባ ታማሪዲ ኦዳኒኔ ኦሶን ሚኖ አሲ ጊዲስ።

23 «ሙሴስ ላይላይ ኦይታማ ኩሚዳ ዎዴ ባ አሻታ፣ ኢስራዔሌታ ቤዓናው ባ ዎዛናን ቆፒስ።

24 ኢስራዔላታፔ ኢሱዋ ጊብፄ ኢሶይ ቆሂሺን ቤዒዲ ሄ ኢስራዔሌ ኡራ ማዲዲ፣ ሄ ቆሂዳ ጊብፄ ኡራ ዎዲዲ ኩሼ ዛሪስ።

25 ሙሴይ ባ አሻታ ባ ባጋራ ያሳይ አሻናው ሃኔይሳ ኤንቲ አኬካና ጊዲ ቆፒስ፣ ሺን ኤንቲ አኬኪቦኮና።

7:11 ሜዴ 42:1-2 7:13 ሜዴ 45:1፣ 16 7:14 ሜዴ 45:9-10፣
17-18፣ 46:27 7:15 ሜዴ 46:1-7፣ 49:33 7:16 ሜዴ 23:3-16፣
33:19፣ 50:7-13፣ ኢያ 24:32 7:17 ኬሳ 1:7-8 7:19 ኬሳ 1:10-11፣
22 7:20 ኬሳ 2:2 7:21 ኬሳ 2:3-10 7:23 ኬሳ 2:11-15

26 «ዋንቴላ ጋላስ ናምዑ ኢስራዔል አሳተ ኢሶይ ኢሱዋራ ዋቋቴሺን ዳሚዲ ኤንታ ሲጌላናው ኮዪዲ፣ ላሳቶ፣ ሂንቴ ኢሻንታ፤ አይስ ኢሶይ ኢሱዋ ቆሄተ?» ያገሰ።

27 «ሺን ባ ላጊያ ቆሄይሲ ሙሴኮ፣ ሳና ኑ ቦላ ሃሪይሳኔ ዳይና ኦሊዲይ ኦኔ?»

28 ኔኒ ዚኔ ገብፂ ኡራ ዋቋዲይሳዳ ታና ዋቋናው ኮያይ?» ያገዲ ሙሴ ሱጊ ዬዲሰ።

29 ሙሴይ ሄሳ ሰዒዳ ዋዳ ገብፂፌ ቤተዲ ሚዲያሜ ቢታን ቤቴ አሲ ገዲዲ ዳዒሼ ናምዑ አዳ ናይታ ዬሊሰ።

30 «ጎዳ ኪታንቸይ ኦይታሙ ላይላፌ ጉዬ ሲና ዳሪያ ማታን ዳዒያ ባዞ ቱሺያ ገደን ኤጂያ ታማ ላጮ ገደን ሙሴስ ቤንቴስ።

31 ሙሴይ ባ ቤዒዳይሳን ማላሌቲዲ፣ ሎይላ ቤናናው ቱሺያ ማቲ ሸቂዲ ዳዒሺን፣ ጎዳ ቃላይ።

32 ሳቲ ኔ አዋታ፣ አብራሃሜ ያሳ፣ ዪሳቃ ያሳ፣ ያይቆባ ያሳ» ያገሼ ሙሴኮ ዪሰ። ሙሴይ ያሻን ኮኮሪዲ ፃላናው ዳንዳዒቤና።

33 «ጎዳይ ሙሴኮ፣ ሳኔ ኤቂዳ ቢታይ ጌሺ ገዲያ ገሾ ኔ ቶሁዋን ዳዒያ ጫማ ኬሳ።

34 ታኒ ገብፂን ዳዒያ ታ አሳ አንዔቴላ ቤዓስ። ኤንታ ዋሱዋ ሰዒዳ ኤንታ አሻናው ዋቋሰ። ሃዒ ሃያ! ታኒ ኔና ገብፂ ኪታና» ያገሰ።

35 «ኢስራዔሌቲ ሙሴ፣ ሳና ኑና ሃሪይሳኔ ዳይና ኦሊዲይ ኦኔ?» ያገዲ ኢጂዳይሳ ቱሺያ ገደን ኢያው ቤንቴዳ ኪታንቸዋ ባጋራ ሃሪይሳኔ አሼይሳ ኦሊዲ ያሳይ ከቴስ።

36 ሙሴይ ኢስራዔሌታ ገብፂፌ ኬሲዲ ማላሊሲያባታኔ ኦራላባታ ገብፂ ቢታኒኔ ዞዖ አባን ኦሊዲ ኤንታ ኦይታሙ ላይላ ባዞ ቢታን ካሌላሰ።

37 «ኢስራዔሌ አሳኮ፣ ሳሳይ ታና ዳንሊዳይሳዳ ሂንቴ ሸሻ ገደፌ ታ ማላ ናቤ ሂንቴው ዳንላና» ያገዳይ ሄ ሙሴ።

38 ባዞ ቢታን ሸቂዳ ኢስራዔሌ አሳራ ዳዒዳይሰ፣ ኑ አዋታራኔ ሲና ዳሪያ ቦላ ኢያው ኦዲዳ ኪታንቸዋራ ዳዒዳ ሙሴይ ኢያ። ያተዲ፣ ያሳ ዳዖ ቃላ ኑስ ኢማናው ኤኪሰ።

7:29 ኬሳ 18:3-4 7:30 ኬሳ 3:1-10 7:35 ኬሳ 2:14 7:36 ኬሳ 7:5፤ 14:21፤ ታይ 14:33 7:37 ዛሬ 18:15፣ 18 7:38 ኬሳ 19:1-20:17፤ ዛሬ 5:1-33

39 «ሺን ኑ ማይዛቲ ሙሴስ ኪቲታናው ደሲቦኮና፤ ኢያ ኢዲዲ ጉዬ ገብፆ ሲማናው አሞቲደሶና።

40 ቃሲ አሮናኮ፣ ሱና ካሌሊያ ያሳታ ኑስ ኦላ። ኣይሰ ጊኮ፣ ሃይሲ ኑና ገብፆፌ ኤሂዳ ሙሴይ፣ ዋኒዳኮ ኑኒ ኤሮኮ» ያገደሶና።

41 ሄ ዎዴ ማሪ ዳኒሲዲ ኤቃ ኦሊደሶና። ሄ ኤቃስ ያርሾ ያርሺዲ ባንታ ኩሺን ኦሊዳ ኦሱዋን ኡፋይቲደሶና።

42 ሺን ያሳይ ኤንታው ዘኮ ዛሪስ። ኤንቲ ሳሎ ያለንቶታ ጎይናና ማላ ኤንታ ዬጊ ኣገሰ። ናቤታ ማፃፋን፣

ሲሰራዔሌ አሳው፣ ኦይታው ላይሊ ኩማሊ

ባዘ ቢታን ሹኪዳ ማሂያኔ
ያርሺዳ ያርሹዋ ታው ያርሺዳቲ?

43 ሂንቲ፣ ሂንቲው ጎይናናው ኬሲዳ ኤቃኔ ሞሎኬ ዲንካኒያ ሬፋና ጊያ ሂንቲ ያሳ ያለንቶ ሚሲሊያ ቶኪዳታ።

ታኒ ሂንቲና ባቢሎኔፔ

ሂኒ ባጋ ዬዳና፣ ጌቲቲዲ ፃፌቲስ።

44 «ኑ አዋታስ ባዘ ቢታን ማርካ ዲንካኔይ ዴዔስ። ኢያካ ያሳይ ሙሴ ከቲዳይሳዳኔ ኢያ ቤሲዳይሳዳ ኦሊስ።

45 ቃሲ ኑ አዋቲ ሄ ዲንካኒያ ባንታ አዋታፔ ኤኪዲ ያሳይ ካሴ ዬዳሊዳ ኣይሁዴ ጊደና አሳ ቢታ ኦይኪዳ ዎዴ ኢያሱራ ያ ኤኪዲ ጌሊደሶና። ሄ ዲንካኔይ ዳዊቲ ዎዴ ጋካናዉካ ሄ ቤሳን ዴዒስ።

46 ዳዊቲይ ያሳን ሳቤቲስ። ቃሲ ያይቆባ ጎዳይ ዴዓና ኬላ ከፃናው ያሳ ዎሲስ።

47 ሺን ኢያው ኬላ ከዲዳይ ሶሎሞኔ።

48 «ሃናሺን፣ ኡባፌ ቦላ ያሳይ ኣሲ ከዲዳ ኬላን ዴና። ናቤይ ጊዳይሳ ማላ፣

49 ሳሎይ ታ አራታ፣

ሳዓይካ ታ ቶሆይ ዬዲያሶ።

ያቲን፣ ታው ሂንቲ ኣይ ማላ ኬሊ ከፃኔ?

ዎይኮ ታኒ ሹምፒያሶይ ኣዉኔ?

50 ሃ ኡባ ታ ኩሺያን ኦላቢኪና?» ያገሰ ጎዳይ።

7:40 ከሳ 32:1 7:41 ከሳ 32:2-6 7:42 አዎ 5:25-27 7:44 ከሳ 25:9፣ 40 7:45 ኢያ 3:14-17 7:46 2ሳሙ 7:1-16፤ 1ታሪ 17:1-14
7:47 1ካዎ 6:1-38፤ 2ታሪ 3:1-17 7:49 ኢሳ 66:1-2

51 «ሂንቴ ዋኒዳ ሲያና አሴ? ሂንቴ ዋዛናይ ያሳ ቃላ ኤካናው አይሰ ኢዲዳ? ሂንቴ ሃይላይ አይሰ ቱሊዳ? ሂንቴ፣ ሂንቴ አዋታዎ ኡባ ዋዴ ጌሻ አያናራ ኤቄቴታ።

52 ናቤታ ጊደፌ ሂንቴ አዋቲ ጎደናይ ኦኔ? ያሳ ናባይ፣ ዓሎይ ያናይሳ ካሴቲዲ ኦዲዳይሳታ ዋዲደሶና። ሃዲ ሂንቴ ኢያ አሳ ኢሚዲ ዋዲዳ።

53 ሂንቴ ኪታንቹዋ ኩሼፔ ያሳ ሂጊያ ኤኪዳታ፣ ሺን ከቴቲቤኬታ» ያገሰ።

ኢስዒፋኖሴይ ሹቻን ጫዳቲሰ

54 ኤንቴ ሄሳ ሲዲዳ ዋዴ ባንታ ዋዛናን ኢስዒፋኖሴ ቦላ ዳሮ ዪሎቲዲ፣ ባንታ ሚቴርሻ ሳዒዲ ማንዲደሶና።

55 ሺን ኢስዒፋኖሴይ ጌሻ አያናን ኩሚዲ፣ ሳሎ ፑዴ ያሊዲ፣ ያሳ ቦንቹዋኔ ዬሱሳ ያሳ ኡሻቻ ባጋን ኤቄዳይሳ ቤዒሰ።

56 «ሄኮ፣ ታኒ ሳሎይ ደዬቲን፣ አሳ ናባይ፣ ያሳ ኡሻቻ ባጋን ኤቄዳይሳ ቤዒይሰ» ያገሰ።

57 ቃላ ቶቄ አላዲ ዋሲሼ፣ ባንታ ሃይላ ኦይኪዲ ኢሲፌ ኢያኮ ዋዲደሶና

58 ኢያ ካታማፔ ጋፃ ኬሲዲ፣ ሹቻን ጫዲደሶና። ማርካቲ ባንታ ማዑዋ ኢሲ ሳያላ ጊያ ናባቲላ ማታን ዋላደሶና።

59 ኢስዒፋኖሴይ፣ «ታ ጎዳ ዬሱሳ፣ ታ ሸምፑዋ ኤካ» ያገዲ ያገሺን ኤንቴ ኢያ ሹቻን ጫደሶና።

60 ጉልባቲዲ፣ ባ ቃላ ቶቄ አላዲ፣ «ታ ጎዳው፣ ሃ ናጋራ ኤንታው አቶ ጋ» ያገሰ። ሄሳ ያገዲ ሲሚዳ ሜላ ሃይቄ አገሰ።

8

ሳያሊ አማኒያ አሳ ጎዲሰ

1 ሳያሊ ኢስዒፋኖሴ ሃይቄዋን ኡፋይቲሰ። ሄ ጋላሰ ዬሩሳላሚን ዴዲያ ዋሳ ኬላን ጊታ ጎዲ ዳንዲሰ። ሃዋሬቲ አቲን አማኒይሳቲ ኡባይ ዪሁዳ ቢታኒኔ ሳማሬ ቢታን ላሌቲደሶና።

2 ኢሲ ኢሲ ያሳ አሳቲ ኢስዒፋኖሴ ዋጊደሶና፤ ቃሲ ኢያው ዳሮ ዪኪደሶና።

3 ሺን ሳያሊ ዋሳ ኬላ ጳይሳናው ኮዬሰ። ሶ ሶ ዩዩ ጌሊዲ፣ አማኒያ አዴታኔ ማጫሳታ ጎቺ ጎቺ ኬሲዲ ቃሾ ኬላ ጌልሴሰ።

ዎንጌላይ ሳማራን ሳባኬተሰ

- 4 ላሌተዳ አማኔይሳቲ ቢዳ ቤሳ ኡባን ቃላ ኦዲዶሶና።
- 5 ፊልጶሲ ሳማራ ካታማ ቢዲ ኪሪሰቶሳባ አሳሰ ኦዲሰ።
- 6 ዳር አሳይ ፊልጶሲ ገዳይሳ ሲዲዳ ዎዴኔ ኢ ኦሊያ ማላታታ ቤዲዳ ዎዴ ኢያ አኬኪዲ ሲዲዶሶና።
- 7 ቱና አያናቲ ዋሲዲ ዳር አሳፔ ኬዪዶሶና፤ ቃሲ ዳር ጉንዳቲኔ ዎቤቲ ቢሌቲዶሶና።
- 8 ሄ ካታማን ዴዲያ አሳይ ዳር ኡፋይቲዶሶና።
- 9 ሺን ሲሞና ገያ ኢሲ ኡራይ ሄ ካታማን ዴዴሰ። ኢ፥ ሳና ገታ ገዲ ሳማራ አሳ ማርቲላን ማላሊሲሽ ጋምዲሰ።
- 10 ጉላፌ ገታ ጋካናው ዴዲያ አሳ ኡባይ፥ «ገታ ያሳ ዎልቃይ ሃይሳ» ገዲ ኢያሳ ሲዶሶና።
- 11 ዳር ዎዴፔ ደሚዲ ማርቲሽ ሳማራ አሳ ማላሊሲዳ ገሾ አሳይ ኢያሳ ሲዶሶና።
- 12 ሺን ፊልጶሲ ያሳ ካዎቲላባኔ ዩሱሰ ኪሪሰቶሳ ሱንላባ አዳታሲኔ ማጫታሰ ኦዲን፥ ኤንቲ ኢያሳ አማኒዲ ፃማቄቲዶሶና።
- 13 ቃሲ ሲሞኒካ ባ ሁዴን አማኒዲ ፃማቄቲሰ። ፊልጶሳራ ኢሲፌ ቢዳ ቤሳ ኡባን ኦሴቲያ ገታ ማላታታ ቤዲዲ ማላሌቲሰ።
- 14 ዩራሳላማን ዴዲያ ሃዋሪቲ ሳማራ አሳይ ያሳ ቃላ ኤኪዳይሳ ሲዲዳ ዎዴ ጳዲሮሳኔ ዮሃኒሳ ኤንታኮ ዩዲዶሶና።
- 15 ጳዲሮሳኔ ዮሃኒሲ ቢዲ፥ አማኔይሳቲ ጌሻ አያና ኤካና ሜላ ኤንታው ያሳ ዎሲዶሶና።
- 16 አይሰ ገኮ፥ ሳማራ አሳቲ ጎዳ ዩሱሳ ሱንላ ፃላላን ፃማቄቲዶሶናፔ ኣቲን ኤንታፌ ኢሱዋ ቦላካ ጌሻ አያኒ ዎዲቤና።
- 17 ሄ ዎዴ ጳዲሮሳኔ ዮሃኒሲ ባንታ ኩሺያ ኤንታ ቦላ ዎሊን፥ ኤንቲ ጌሻ አያና ኤኪዶሶና።
- 18 ሃዋሪቲ ባንታ ኩሺያ ኤንታ ቦላ ዎሊን፥ ኤንታው ጌሻ አያናይ ኢሜቲዳይሳ ሲሞኒ ቤዲዳ ዎዴ ጳዲሮሳኒኔ ዮሃኒሳሰ ሚሽ ኤሂዲ፥
- 19 «ታኒካ ታ ኩሺያ ዎሊያ ኡባይ ጌሻ አያና ኤካና ሜላ ሃ ማታ ታዉካ አሜርኬቲ» ያገሰ።
- 20 ሺን ጳዲሮሲ ኢያኮ፥ «ኔኒ ያሳ ኢሞታ ሚሽን ሻማናው ቆፒዳ ገሾ ኔ ሚሽይ ኔራ ቶዮ።
- 21 ኔ ዎዛናይ ያሳ ሲንላን ሱሬ ገደና ገሾ ኔው ሃይሳን ገሾይ ዎይኮ ቃዲ ባዎ።
- 22 ሂዛ፥ ሃ ኔ ዎዛና ኢታቲላ ገሾ ናጋራፔ ሲማ። ኔ ዎዛናን ዴዲያ ኢታ ቆፋ ያሳይ አቶ ጋና ሜላ ያሳ ዎሳ።

23 ጋሶይካ፡ ኔኒ ኢታ ቃናቴኒኔ ናጋራ ቃሹዋን ዴዔይሳ ታኒ ቤዓይሰ» ያገሰ።

24 ሲሞኒ ዛሪዲ፡ «ሂንቴ ገዳይሳፊ ኢሶይካ ታና ጋኮና ማላ ታው ያሳ ዋሲቴ» ያገሰ።

25 ጳዲሮሲኔ ዮሃንሲ ማርካቲዳቴኔ ጎዳ ቃላ ኦዲዳቴ ጉዬ ዬሩሳላሜ ሲሚዶሶና፡ ሳማሬን ዴዔያ ዳሮ ጉታታን ዋንጌላ ኦዲዶሶና።

ፊልጶሲ ቶጲያ ሞሪና ፃማቂሰ

26 ጎዳ ኪታንቸይ ፊልጶሳኮ፡ «ዴንዳዳ ዬሩሳላሜቴ ጋዛ ኤፊያ ባዘ ቢታ ኦጊያኮ ባ። ሄ ኦጌይ ዳጌሃ ባጋራ ዴዔሰ» ያገሰ።

27 ፊልጶሲ ዴንዲዲ ቢሰ። ሂንዴኬ ጊያ ቶጲያ ካዌሰ ኢ ሚሼ ኡባ ናጊያ ቶጲያ ኣሲ ዴዔሰ። ኢካ ጎይናናው ዬሩሳላሜ ቢሰ።

28 ፓራ ጋሪያን ኡቲዲ፡ ዬሩሳላሜቴ ባ ቢታ ሲሚሼ ናቢያ ኢሳያሳ ማፃፋ ናባቤሰ።

29 ጌሻ ኣያናይ ፊልጶሳኮ፡ «ሄ ጋሪያኮ ባዳ ኢያ ማቲ ሺቃ» ያገሰ።

30 ያቲን ፊልጶሲ ዋዲ ቢዲ ጋኪያ ዋዴ ሞሪናይ ናቢያ ኢሳያሳ ማፃፋቴ ናባቢሺን ሲዒዲ፡ «ኔ ናባቤያሲ ኔው ጌሊ?» ያገሰ።

31 ሞሪናይ፡ «ታው ኦዲ ጌልሲያ ኣሲ ባይና ዋኒዲ ጌላኔ?» ያገሰ። ባራ ጋሪያን ኬዩዲ ኡታና ማላ ፊልጶሳ ዋሲሰ።

32 ሞሪናይ ናባቢያ ማፃፋ ኪፊሌይ፡ «ኢ ዶርሳዳ ሹኬታናው ላጌቲሰ፤ ዶርሳ ማሪ ባ ኢኪሲያ ሜዴይሳታ ሲንላን ሲዒ ጌይሳዳ፡ ኢካ ባ ዶና ዶዩቤና።

33 ኢ ካዉዩሰ፤ ኢያው ዲሎ ፒርዲ ጳይሰ። ኢያ ዴያይ ሃ ሳዓቴ ቃንፃቲዳ ጊሾ ኢያ ሹሻባ ኦኔ ኦዳናይ?» ያገሰ።

34 ሞሪናይ ዛሪዲ ፊልጶሳኮ፡ «ናቤይ ኦዴባ ኦዲ? ባባ ኦዲዬ ዋይኮ ሃራ ኣሳባ ኦዲ? ታው ኦዳርኪ» ያገሰ።

35 ፊልጶሲ ዛሪዲ፡ ያሳ ቃላ ሄ ቤሳፊ ዶሚዲ፡ ዬሱሳባ ኦዲያ ዋንጌላ ኢያው ኦዲሰ።

36 ኤንቲ ቢሼ ሃላ ዴዔያሶ ጋኪዶሶና። ሞሪናይ፡ «ሃሌ ሃይሳ ቤዓ፤ ታ ፃማቄቶና ማላ ኣይቢ ዲጊ?» ያገሰ።

37 ፊልጶሲ ኢያኮ፡ «ኔኒ ኔ ኩሜላ ዋዛናቴ ኣማኒኮ ዳንዳዓሳ» ያገሰ።

ኢ ዛሪዲ፣ «ዩሱስ ኪሪስቶስ ያሳ ናዓ ጊዳይሳ ታኒ አማናይስ» ያገለገሉ።

38 ጋሪይ ኤቃና ሜላ ሞሪናይ ኪቲን፣ ናምዓይ ዋዲዲ ሃላን ጌሊዶሶና፤ ፊልጶስ ኢያ ፃማቂስ።

39 ኤንቲ ሃላፊ ጋፃ ኬዪዳ ዋዴ ጎዳ አያናይ ፊልጶሳ ቆፖና ኤኪስ። ናምዓንሉ ሞሪናይ ፊልጶሳ ቤዒቤና፣ ሺን ባ ኦጊያ ኡፋይቲሼ ቢስ።

40 ፊልጶስ አዛዎናን ባና ዴሚስ። ቃሲ ቂሳሪያ ያና ጋካናው ካታማታን ዩዪዲ ዋንጌላ ማርካቲስ።

9

ሳዖሊ ኪሪስቶሳ አማኒስ (ሃ.ኦ 22:6-16፤ 26:12-18)

1 ሄ ዋዴ ሳዖሊ ጎዳ ካሌይሳታ ዋዳናው ማንዲዲ ካሂኔ ሃላቃኮ ቢስ።

2 ጎዳ ኦጊያ ካሊያ አዳታኔ ማጫታ ዴሚኮ፣ ቃቺሼ ዩሩሳላሜ ኤሃናው፣ ዳማስቆን ዴዲያ አይሁዴ ዋሳ ኬሳታስ ዳብዳቤይ ፃፊታና ሜላ ኢያ ሞሲስ።

3 ኢ ቢዲ፣ ዳማስቆ ካታማ ጋካናው ማቲሺን፣ ቆፖና ሳሎፔ ዋልቃማ ፖያይ ኢያ ዩሹዋን ፖሲስ።

4 ኢ ሳዓን ኩንዲዲሺን፣ «ሳዖላ፣ ሳዖላ፣ አይስ ታና ጎዳይ?» ጊያ ቃላ ሲዒስ።

5 ሳዖላ፣ «ጎዳው፣ ኔኒ ኦኔ?» ያገሊዲ ኦይቺስ።

«ታኒ፣ ኔኒ ጎዲያ ዩሱሳ» ያገሊስ።

6 ሺን ሳዖሊ ኮኮሪሼኔ ማላሌቲሼ፣ «ጎዳው፣ ታኒ አይ ኦላና ሜላ ኮያይ?» ያገሊስ።

ጎዳይ ኢያኮ፣ «ዴንዲዳ ካታማ ጌላ፤ ኔኒ ኦላናው ቤሲያባይ ያን ኔው ኦዴታና» ያገሊስ።

7 ሳዖላራ ኦጊያ ቢያ አሳቲ አይኮካ ኦዴቶና ኤቂ አቲዶሶና። ቃላ ሲዶሶና፣ ሺን ኦናካ ቤዒባኮና።

8 ሳዖሊ ኩንዲዳ ቤሳፊ ዴንዲዲ ጃሊያ ዋዴ ኢያ አይፊይ ዴሞና ኢዲስ። ሄሳ ጊሾ፣ ኤንቲ ኢያ ኩሺያ ኦይኪዲ ካሌሊዲ ዳማስቆ ጌልሲዶሶና።

9 ሄሹ ጋላስ ጋካናው ኢ ጃላናው ዳንዲቤና፤ አይኮካ ሚቤና፤ ኡዪቤና።

10 ዳማስቆን ኢሲ ሃናኒያ ጊያ ዩሱሳ ታማሪይ ዴዒስ። ጎዳይ ቆንጩሳን፣ «ሃናኒያ» ያገሊዲ ጃገሊስ።

ሃናኔይ ዛሪዲ፣ «ታ ጎዳው፣ ሃይሳን ዳዓይስ» ያገለገለ።

11 ጎዳይ ኢያሱ፣ «ዳንዳዳ ሱሪ ጌቲቲያ ኦሪያ ባዳ፣ ዪሁዳ ሶን ሳዖላ ገያ ቲርሴሴ፣ ዪዳ ኡራ ኮያ፤ ሳዖላ ዋሴስ።

12 ቃሲ ሃናኔይ ጌሊዲ፣ ሳዖላ ናምዓንጥ ጻላና ሜላ ባ ኩሺያ ኢያ ሶላ ዋሊሺን ቆንጨጥን በዒሰ» ያገለገለ።

13 ሃናኔይ ዛሪዲ፣ «ጎዳው፣ ዩሩሳላሜን ኔ ጌሻ አሳ ሶላ ሄ ኡራይ አይ ሜላ ኢታባ ኦሊዳኮ ታኒ ዳሮ አሳ፣ ስሳ፣ ስሳ።

14 ቃሲ ዳማስቆን ኔ ሱንጥ ጻጌይሳታ ኡባ ቃቻናው፣ ካሂኔ ሃላቃቲ ኢያው ማታ ኢሚዶሶና» ያገለገለ።

15 ሺን ጎዳይ ኢያሱ፣ «ሳዖላ አይሁዳ ገደና አሳ ሲንጥን፣ ካዋታ ሲንጥን ኢሰራዔል አሳ ሲንጥን፣ ታ ሱንጥ ኤሪሳናውኔ ታው ኦፋናው ዶሬቲዳ ሚሼ ገዲያ ገሾ ኔኒ ኢያኮ ባ።

16 አይስ ገኮ፣ ታ ሱንጥ ገሾ ኢ አይ ሜላ ዋዬ ኤካናው በሲያኮ ታኒ ኢያ በሳና» ያገለገለ።

17 ሃናኔይ ቢዲ፣ ሶ ጌሊዲ፣ ባ ኩሺያ ሳዖላ ሶላ ዋሊዲ፣ «ታ ኢሻ ሳዖላ፣ ኔኒ ያ ኦሪያን ኔው በንቲዳ ጎዳ ዩሱሲ፣ ኔኒ ጻላና ሜላኔ ጌሻ አያናን ኩማና ሜላ ታና ከቲስ» ያገለገለ።

18 ኤሌሲዲ፣ ሳዖላ አይፊያ፣ ኢሲ ገቆ ማላባይ ዋዲን፣ ሳዖላ ናምዓንጥ ጻላስ። ቃሲ ዳንዳዳ ያማቁቲስ።

19 ካሊ ሚዲ ያሊዲ፣ ዳማስቆን ዳዒያ አማኔይሳታራ ጉላ ጋላስ ጋምዒስ።

ሳዖላ ዳማስቆን ታማርሲስ

20 ኤሌሲዲ ሳዖላ፣ «ዩሱሲ ያሳ ናዓ» ያገደደ ዳማስቆን ዳዒያ አይሁዳ ዋሳ ኬላታን ቃላ ታማርሲስ።

21 ሄሳ ሲዒዳ ኡባይ ማላላቲዲ፣ «ሃይሲ ዩሩሳላሜን ዩሱሳ ሱንጥ ጻጌይሳታ ቃቲይሳ ገዴኔዬ? ቃሲ ሃ ዪዳይ ኤንታ ቃቲዲ፣ ካሂኔ ሃላቃታ ሲንጥ ኤፋናሳ ገዴኔ?» ያገደደ።

22 ሺን ሳዖላ ቃላ ኦዶን ሚኒ ሚኒ ቢስ። ዩሱሲ፣ ኢ ከሪስቶሳ ገዴይሳ ቆንጨሲዲ ኦዲዳ ገሾ ዳማስቆን ዳዒያ አይሁዳቲ ኢያው ዛሪያባ ጳጴዶሶና።

23 ዳሮ ጋላሳ፣ ጉዬ አይሁዳቲ ሺቂዲ፣ ሳዖላ ዋዳናው ዘሪቲዶሶና።

24 ሺን አይሁዳቲ ባና ዋዳናው ቆፒዲይሳ ሳዖላ ሲዒስ። ኤንቲ ኢያ ዋዳናው ቃማኔ ጋላስ ካታማ ፔንጌያን ናሳሶና።

25 ሺን ኢያ ታማራቲ ኢያ ቃማ ኤፊዲ፣ ገምቤ ዲርሳ ማስኮቲያራ ዳቸራ ዋዲሲዶሶና።

ሳዖሊ ዩሩሳሌምን ታማርሲስ

26 ሳዖሊ ዩሩሳሌም ጋኪዳ ዋዴ አማኔይሳታራ ጋሄታናው ኮዩስ። ሺን ኢ ኪሪስቶስ አማኒዳይሲ ኤንታው ቱማ ዳኖና ኢዲን ኢያው ያዩደሶና።

27 ሺን ባርናባሲ ሳዖላ ሃዋሬታኮ ኤፊስ። ኦገን ጎዳይ ዋኒዲ ቆንጨዳኮኔ ሃሳዩሲዳኮ፣ ቃሲ ሳዖሊ ዳማሰቆን ዩሱሳ ሱንላን ያዮና ዋቲዲ ቃላ ኦዲዳኮ ኤንታው ጌሺዲ ኦዲስ።

28 ሳዖሊ ዩሩሳሌምን ዩዩዲ ጎዳ ሱንላን ያዮና ቃላ ኦዲሼ፣ ሃዋሬታራ ኢሲፌ ዴዒስ።

29 ቃሲ ሳዖሊ ጊሪኮኔ ቃላ ሃሳያ አይሁዴታራ ኦዴቲሼ ፓላሜስ። ሺን ኤንቲ ኢያ ዋቆናው ኮዩደሶና።

30 አማኒያ አሳቲ ሄሳ ሲዒዲ፣ ሳዖላ ቂሳሪያ ኤፊዲ ቱርሴሴ ዩዲደሶና።

31 ዩሁዳን፣ ጋሊላኔ ሳማሬ ኡባን ዴዒያ ዋሳ ኬላቲ ሳርቲላን ዴዒደሶና። ቃሲ ሚኒደሶና፤ ጎዳስ ያዩሼ ጌሻ አያና ሚንጭሉዋን ዳሪ ዳሪ ቢደሶና።

ጳዊርሲ ሊዳኔኔ ዮጵን ታማርሲስ

32 ጳዊርሲ ቢታ ኡባ ዩዩሼ ሊዳን ዴዒያ አማኒያ አሳታኮ ጋኪስ።

33 ያን ሆሰቸን ላይሌ ኩሜሌ ጉንዲዲ አርሳን ዚንዒዲ ዴዒያ ኤኒያ ጊያ አዲያ ዴሚስ።

34 ጳዊርሲ፣ «ኤኒያ፣ ዩሱስ ኪሪስቶስ ኔና ፓላና፤ ዴንዳዳ ኔ ሂፃ ዴንላ» ያገሲ። ኢካ ኤሌሲዲ ዴንዲ ኤቂስ።

35 ሊዳኔኔ ሳርናን ዴዒያ አሳ ኡባይ ኤኒያ ቤዒዲ፣ ጎዳኮ ሲሚደሶና።

36 ዮጵ ካታማን ኢሲ ፃቢቶ ጊያ አማኒያራ ዴዓዉሱ። (ፃቢቶ ጉሳይ ጌንዔ ጉሱ) ኢያ ባ ዴዒዳ ዋዴ ኡባን ሎፖባ ኦላሼኔ ማንቆታ ማዳሼ ዴዓሱ።

37 ሄ ዋዴ ኢያ ሃርጋዳ ሃይቂን፣ አሳይ ኢ አሃ ሜጨዲ፣ ፖቂያ ቦላ ኬሲዲ ዚንዒሲደሶና።

38 ሊዲ ዮጵስ ማታ። አማኔይሳቲ ጳዊርሲ ሊዳን ዴዒይሳ ሲዒዲ፣ «ሃያና ኑኮ ኤሌሳዳ ያ» ያገያ ኪታ ናምዑ አሳታ ቦላ ኢያኮ ከቲደሶና።

39 ሄሳ ጊሹ፣ ጳዊርሲ ዴንዲዲ፣ ኤንታራ ቢስ። ያ ጋኪን፣ ፖቂያ ቦላ ዴዒያ ኪፊሊያ ኢያ ጌሊሲደሶና። አምዔቲ ጳዊርሳ ዩሹዋን ኤቂዲ ዩኪሼ ዶርቃ ኤንታራ ፓፃ ዴዓሼ ኦሊዳ ቃሚሴታኔ አፊላታ ኡባ ጳዊርሳ ቤሲደሶና።

40 ጳጳሮሲ እንታ ኡባ ካሬ ኬሲዲ፣ ጉልባቲዲ ያሳ ዋሲስ። ቃሲ ኣሃኮ ሰሚዲ፣ «ፃቢቲ፣ ዳንዳ» ያገሲ። ፃቢታ ባ ኣይፊያ ደያዳ ጳጳሮሳ ቤዓዳ፣ ዳንዳ ኡታሱ።

41 ጳጳሮሲ ኢዮ ባ ኩሺያን ማዲዲ ዳንሉ ኤሲስ። ሄሳፊ ጉዬ፣ ኣማኔይሳታኔ ኣምዔታ ፃጊዲ፣ ዳንዲዳሮ እንታ ሲንሉ ሺሺስ።

42 ሃ ኦዳይ ዮጴ ካታማ ኡባ ጋኪስ። ዳሮ ኣሳይ ጎዳ ኣማኒደሶና።

43 ጳጳሮሲ ዮጴን ሲሞና ጊያ ጋልባ ሃሺይሳ ሶን ዳሮ ጋላስ ጋምዒስ።

10

ጳጳሮሳኔ ቆርኔሊዮሳ

1 ቂሳሪያን፣ «ፃሌ ኦላ ኣሳታ» ጌቲቲያ ኦላንቸታ ጊደን ኢሲ ቆርኔሊዮሳ ጌቲቲያ ማቶ ሃላቃይ ዳዔስ።

2 ቆርኔሊዮሲ ባ ሶ ኣሳራ ያሳ ሚንሉ ኣማኒያ ኣሲኔ ያሳ ጎይኒያ ኣሲ። ኣይሁዳ ማንቆታካ ዳሮ ማዳስ፣ ቃሲ ያሳ ኡባ ዋዴ ዋሴስ።

3 ኢሲ ጋላስ ኡዲፋን ሳቲ ሄራን ያሳ ኪታንቸይ ኢያኮ ዪዲ፣ «ቆርኔሊዮሳ» ጊዲ ፃጊሺን ኢ ቆንጩሳን ጌሺዲ ቤዒስ።

4 ቆርኔሊዮሲ ዳጋሚዲ ኪታንቸዋ ቲሺ ኦሉ ፃሊዲ፣ «ጎዳው፣ ኢ ኣይቤ?» ያገሲ።

ኪታንቸይ ዛሪዲ፣ «ኔ ዋሳይኔ ማንቆታ ኔ ማዳይሲ ያሳ ሲንሳን ሃሳዬቲስ።

5 ሃዒ ዮጴ ኣሲ ኪታዳ፣ ጳጳሮሳ ጊያ ሲሞና ኤሂሳ።

6 ጳጳሮሲ ኣባ ዶናን ጋልባ ሃሺያ ሲሞና ሶን ኢማላቴሉ ሲራቲስ» ያገሲ።

7 ቆርኔሊዮሲ ባው ኦዲዳ ኪታንቸይ ቢን፣ ባ ኣይሌታፔ ሩምዓታኔ ያሳ ጎይኒያ ባ ማታ ዋታዳሬታፔ ኢሱዋ ፃጊዲ፣

8 እንታው ኡባባ ኦዲዳ ዮጴ ኪቲስ።

9 ዋንቴላ ጋላስ ኤንቲ ቢዲ፣ ዮጴ ካታማ ማቲሺን ኡሱፑን ሳቲ ሄራን ያሳ ዋሳናው ጳጳሮሲ ፖቄ ቦላ ኬይስ።

10 ኢ ኮሻቲዲ ካሉ ማናው ኮዪስ፣ ሺን ካሉ ካዲሺን ኢ ቆንጩሉ ቤዒስ።

11 ሳሎይ ዶዬቲን፣ ጌታ ኣፊላ ዳኒያባይ ኦይዱ ባጋራ ኦይኬቲዲ ዋዲሺን ኢ ቤዒስ።

12 ኢያን ኦይዱ ቶሆራ ዳዒያ ማህተ፣ ዋራ ደዓተ፣ ኡሎራ ጎሹተያ ማጴቴፋተኔ ሳሎ ካፎተ ኡባይ ዳዔሰ።

13 ሄ ዋዴ «ጴጌርሳ፣ ዳንዳ ኤቃዳ ሹካዳ ማ» ጊያ ቃሊ ኢያኮ ዪሰ።

14 ሺን ጴጌርሲ፣ «ጎዳው፣ አካይ! ታ ቱናባ ኡባራካ ማ ኤሪኬ» ያገሰ።

15 ቃሲ፣ «ጸሳይ ጌሺዳይሳ ኔኒ ቱና ጎፓ» ጊያ ቃሊ ናሞዓንፋ ኢያኮ ዪሰ።

16 ሄሲካ፣ ሄቹ ቶሆ ሃኒዳፔ ጉዬ ሄ ጊታ አፊላ ዳኔይሲ ኤሌሲዲ ፑዴ ሳሎ ኤኬተሰ።

17 ጴጌርሲ ባ ቤዒዳ ቆንጩፋ ቢርሼፋይ፣ «አይ ጊዳንዳሻ?» ጊዲ ባ ዋዛናን ቆፒሺን፣ ቆርኔሊዮሲ ኪተዳ አሳተ ሲሞና ሶ ኦይቹ ዳሚዲ ካሬን ኤቁዶሶና።

18 ባንታ ቃላ ጶቁ ኦሲዲ፣ «ጴጌርሳ ጊያ ሲሞኒ አማፋቴፋን ዳዔይ ሃይሳኔ?» ያገዲ ኦይቹዶሶና።

19 ጴጌርሲ ቆንጩፋን ቤዒዳባ ቆፋ ቦላ ዳዒሺን፣ ጌሻ አያኒ ኢያኮ፣ «ሄኮ፣ ሄቹ አሳተ ኔና ኮዮሶና።

20 ዳንዳዳ ዋፋ፣ ታኒ ኤንታ ኪተዳ ጊሾ ሲጶና ኤንታራ ባ» ያገሰ።

21 ጴጌርሲ አሳታኮ ዋጲዲ፣ «ሂንቴ ኮዬይ ታና፤ አይሰ ዪዳተ?» ያገሰ።

22 ኤንቴ ዛሪዲ፣ «ኑና ማቶ ሃላቃይ ቆርኔሊዮሲ ኪተሰ። ኢ ዒሎ፣ ጸሳ ጎይኒያ አሲኔ አይሁዴ አሳ ኡባን ዳር ቦንቹተዳ አሲ። ቆርኔሊዮሲ፣ ኔና ባ ሶ ኤሂሲዲ ቃላ ኔፔ ሲዓና ማላ ጌሻ ኪታንቸይ ኢያው ኦዲሰ» ያገዶሶና።

23 ጴጌርሲ አሳታ ሶ ጌልሲዲ ሞኪሰ።

ዋንቴፋ ጋላሰ፣ ዳንዲዲ ኤንታራ ቢሰ። ዮጵ ካታማን ዳዒያ አማኔይሳታፔ ኢሶተ ኢሶተ ኢያራ ኢሲፊ ቢዶሶና።

24 ዋንቴፋ ጋላሰ፣ ቁሳሪያ ጋኪዶሶና። ቆርኔሊዮሲ ባ ዳቦታኔ ባ ማታ ላጌታ ኢሲፊ ጃጊ ሺሺዲ፣ ጴጌርሳ ናጌሰ።

25 ጴጌርሲ ሶ ጌላና ሃኒሺን፣ ቆርኔሊዮሲ ኢያራ ጋሄተዲ ኢያ ሲንፋን ኩንዲዲ ኢያው ጎይናናው ኮዪሰ።

26 ሺን ጴጌርሲ፣ «ዳንዳ፣ ታካ ታ ሁዔን ኔ ማላ አሴ» ያገዲ ኢያ ዳንሲሰ።

27 ጴጌርሲ ቆርኔሊዮሳራ ኦዳተሼ ሶ ጌሊያ ዋዴ ዳር አሳይ ሸቁዳይሳ ዳሚሰ።

28 ኢ አሳኮ፡ «አይሁዳ አሲ ሃራ ዳሬራ ኢሲፋናው ዋይኮ ጋሄታናው ዋጋ ጊደናይሳ ሂንቴ ኤሬታ። ሺን ታኒ ኦናካ ቱና ዋይኮ ጌሺ ጊዳና ጎና ማላ ያሳይ ታና ቤሲስ።

29 ሄሳ ጊሾ፡ ሂንቴ ታኮ ከቲን ኢያይ ባይና ያስ። ሃዒ ታና አይስ ያጊሲዳኮ ታው ኦዲቱ» ያጊሰ።

30 ቆርኔሊዮሲ፡ «ታኒ ሃቺ ኦይዱ ጋላሳፔ ካሴ ሃኖዴ ኡዱፋን ሳቲ ዋሳ ዋሲሺን፡ ጰሊያ ማየ ማዒዳ አሲ ታ ሲንላን ኤቁስ።

31 ኢ ታኮ፡ «ቆርኔሊዮሳ፡ ያሳይ ኔ ዋሳ ሲዒስ፡ ኔኒ ማንቆታ ማዲዳይሳካ ሃሳይስ።

32 ሂዛ፡ አሴ ዮጼ ከታዳ፡ ሲሞን ጳዒርሳ ጌይሳ ያጊሳ። ኢ፡ ሲሞና ጊያ ጋልባ ሃሺያ ኡራ ሶን አባ ዶናን ሲራቲስ» ያጊሰ።

33 ሄሳ ጊሾ፡ ታኒ ኔኮ ኤሌሳዳ ኪታስ፤ ኔ ሎየ ያዳሳ። ሂዛ፡ ያሳይ ኔና ከቲዳባ ኡባ ሲዓናው ሃዒ ኦኒ ኡባይ ሃይሳን ጎዳ ሲንላን ዳዎስ» ያጊሰ።

ጳዒርሳ ሃሳያ

34 ካሊዲካ፡ ጳዒርሲ፡ «ያሳይ አሳ ሶሞየ ቤዒዲ አሴ አሳፔ ሻኬና።

35 ሺን አሴ ኡባ ኦና ጊዲኮካ ባው ያዩይሳኔ ያሎ ኦሶ ኦሌይሳን ያሳይ ኡፋይቲይሳ ታኒ ቱማ አኬካስ።

36 ያሳይ፡ ኡባ ጎዳ ጊዲዳ ዩሱስ ኪሪስቶሳ ባጋራ ሳርቱላ ኦዲሼ ሃ ዋንጌላ ኢስራዔሌ አሳስ ከቲዳይሳ ሂንቴ ኤሬታ።

37 ዮሃንሲ ዪንቃቲባ ጋሊላን ሳባኪዳ ዋዲያፔ ዶሚዲ ዪሁዳ ቢታ ኡባ ጋካናው ሃኒዳባ ሂንቴ ኤሬታ።

38 ያሳይ ናዚሬቲ ዩሱሳስ ጌሻ አያናኔ ዋልቃ ኢሚስ። ያሳይ ኢያራ ዳዒያ ጊሾ ሎዎባ ኢ ኦሊሼ ፃላሄ ኩሼን ሃሬቲዳ ኡባ ፓሊሼ ዩዩስ።

39 «አይሁዳ ቢታኒኔ ዩሩሳላሜን ኢ ኦሊዳ ኡባባስ ኦኒ ማርካታ። ኤንቲ ማስቃሊያ ቦላ ካቁዲ ኢያ ዋዲዶሶና።

40 ሺን ያሳይ ሄቫንሶ ጋላሳን ሃይቆፔ ኢያ ዳንሊዲ አሳስ ቆንጫና ማላ ኦሊስ።

41 ሄ ቆንጩሳይ ያሳይ ኮይሮ ዶሪዳ ማርካታሳፌ አቲን አሳ ኡባስ ጊዳና። ኢ ሃይቆፔ ዳንዲዳፔ ጉዬ ኢያራ ሚዳኔ ኡዩዳ።

42 ኦኒ ዋንጌላ አሳስ ኦዳና ማላኔ ፓፃ ዳዒይሳታ ቦላኔ ሃይቁዳይሳታ ቦላ ፒርዳናው ያሳይ ሹሚዳይ ዩሱሳ ጊዳይሳ ማርካታና ማላ ኦና ከቲስ።

43 ያሳይ ኢያ አማኒያ ኡባ ናጋራይ፥ ኢያ ሱንላን ኣቶ ጌቴቴይሳ ናቤቴ ማርካቶሶና» ያጊሱ።

እይሁዳ ጊደና ኣሳቲ አማኒዲ ጌሻ ኣያና ኤኪደሶና

44 ጳጳሮሲ ቡሮ ሄ ኦዳ ኦንጎናሺን ቃላ ሲዒያ ኡባ ቦላ ጌሻ ኣያኒ ዋጲሱ።

45 ጳጳሮሳራ ዮጳፌ ዩዳ አማኒያ ቃፃሬቲዳ እይሁዳ ኡባይ፥ እይሁዳ ጊደናይሳታ ቦላ ጌሻ ኣያኒ ጉኪዳ ጊሾ ማላሌቲደሶና።

46 ጋሶይካ፥ ኤንቲ ዲማ ዲማ ደናን ሃሳዩሺኒኔ ያሳ ጌታቴላ ሳቢሺን ሲዒደሶና።

ሄ ዋዴ ጳጳሮሲ ዛሪዲ፥

47 «ሃይሳቲ ቃሲ ኦ ማላ ጌሻ ኣያና ኤኪዳይሳቲ ፃማቄቶና ማላ ሃሌ ዲጋናይ ኦኔ?» ያጊሱ።

48 ኤንቲ ዩሱስ ኪሪስቶሳ ሱንላን ፃማቄታና ማላ ኤንታ ከቲሱ። ሄሳፌ ጉዬ፥ ኤንቲ ባንታራ ጉላ ጋላሰ ኡታና ማላ ጳጳሮሳ ዋሲደሶና።

11

ጳጳሮሲ ባ ኦሊዳባ ዩሩሳላሜ ዋሳ ኬላስ ኦዲስ

1 ሃዋሪቲኔ ዩሁዳ ኡባን ዴዒያ አማኔይሳቲ፥ እይሁዳ ጊደናይሳቲካ ያሳ ቃላ ኤኪዳይሳ ሲዒደሶና።

2 ጳጳሮሲ ዩሩሳላሜ ቢዳ ዋዴ ቃፃሬቲዳ አማኔይሳቲ፥

3 ኢያኮ፥ «ኔኒ ቃፃሬቲቦናይሳታኮ ጌላዳ ኤንታራ ካሌ ኣይሰ ማዲ?» ያጊደሶና።

4 ሺን ጳጳሮሲ ሃኒዳባ ኮይሮፔ ደሚዲ ማራን ማራን ኦዲስ፥

5 «ታኒ ዮጳ ካታማን ያሳ ዋሳሽ ቆንጩሌ ቤዓስ። ጌታ ኣፊላ ዳኒያባይ ኦይዲ ባጋራ ኦይኬቲዲ ሳሎፔ ዋጲሽ ታኮ ዩስ።

6 ታኒ ቲሺ ኦላ ኢያ ጊደ ያሊያ ዋዴ ኦይዲ ቶሆራ ዴዒያ ማሃታ፥ ዋራ ደዓታ፥ ኡሎራ ጎሽቲያ ሜጴቴላታኔ ሳሎ ካፎታ ቤዓስ።

7 «ጳጳሮሳ፥ ዴንዳ፥ ሹካዳ ማ» ጊያ ቃላ ሲዓስ።

8 «ሺን ታኒ፥ ሳዳወ፥ ኣካይ፥ ቱናባይ ዋይኮ ጌዮናባይ ኡባካ ታ ደናኮ ሸቄ ኤሬና» ያጋሱ።

9 « (ያሳይ ጌሺዳይሳ ኔኒ ቱና ጎጋ) ያጊያ ቃሊ ናምዓንላ ሳሎፔ ዩስ።

10 «ሄሲ ሄሹ ቶሆ ሃኒን፥ ዉርሴላን ኡባባይ ሳሎ ፑዴ ኤኬቲሱ።

11 ሄ ሳቴንካ ሄቹ አሳቲ ቁሳሪያፔ ታኮ ከቴቴዲ ታኒ ዴዒያ ኬፋ ጋኪ አጊደሶና።

12 ሲጾና ኤንታራ ባና ሜላ አያናኢ ታው ኦዲሰ። ቃሲ ሃ ኡሱፑን ኢሻቲ ዮጴፌ ታራ ቁሳሪያ ቢዳይሳታራ ቆርኔሊዮሳ ሶ ጌሊዳ።

13 ኪታንቸይ ኢያ ሶን ኤቂዲ፣ ‹ዮጴ ኪታዳ ጳጳርሳ ጌቴቴያ ሲሞና ጭጊሳ።

14 ኔና ኔ ሶ አሳ ኡባ አሺያ ቃላ ኢ ኔው ኦዳና) ጊዳይሳ ቆርኔሊዮስ ኩስ ኦዲሰ።

15 «ታኒ ሃሳያ ደሚያ ዎዴ ጌሻ አያናይ ኮይር ኑ ቦላ ዎጲዳይሳዳ ኤንታ ቦላካ ዎጲ አጊሰ።

16 ሄ ዎዴ ‹ዮሃኒሲ ሃፋን ፃማቂስ፣ ሺን ሂንቴ ጌሻ አያናን ፃማቂታና) ያጊዳ ጎዳ ቃላይ ታው ቆፊቴሰ።

17 ያሳይ ኩስ ጎዳ ዩሱስ ኪሪስቶሳ አማኒዳይሳታስ አሚዳ አሞታ አይሁዴ ጊዳናይሳታሰካ አሚኮ፣ ያቲን ያሳ ዲጋናው ታኒ ኦኔ?» ያጊሰ።

18 ኤንቲ ሄሳ ሲዒዳ ዎዴ ባንታ ፓላማ አጊዲ፣ «ሄሳ ጊዲኮ፣ ያሳይ አይሁዴ ጊዳናይሳቲካ ናጋራፔ ሲሚዲ ዴዎን ዳናዳ ቃዳ አሚሰ» ያጊዲ ያሳ ጋላቲዶሶና።

አንጾኪያ ዎሳ ኬፋ

19 ኢሰፃፋናሴ ሃይቆስ ጋሊዳ ጎዳ ጋሶን ላሌቲዳ አማኔይሳቲ ቃላ አይሁዴታ ፃላላስ ኦዲሼ ሲርፊንቄ፣ ቆጲርሳኔ አንጾኪያ ጋካናው ዩዩደሶና።

20 ሺን ቆጲርሳፔኔ ቁሬናፔ ዩዳ ኢሲ ኢሲ አማኒያ አሳቲ አንጾኪያ ቢዲ፣ ጎዳ ዩሱሳ ዎንጌላ ጊሪኬ አሳሰካ ኦዲደሶና።

21 ጎዳ ዎልቃይ ኤንታራ ዴዒሰ፤ ቃሲ ዳር አሳይ አማኒዲ ጎዳኮ ሲሚደሶና።

22 ሄ ኦዳ ዩሩሳላሜን ዴዒያ ዎሳ ኬፋይ ሲዒዳ ጊሾ ባርናባሳ አንጾኪያ ከቲሰ።

23 ባርናባሲ አንጾኪያ ቢዳ ዎዴ ያሳ አጼ ኬሃቴፋ ኦሱዋ ቤዒዲ ኡፋይቲሰ። ኤንቲ ኡባይ ባንታ ኩሜፋ ዎዛናን ጎዳን ሚኒዲ ዳና ሜላ ኤንታ ዞሪሰ።

24 ባርናባሲ ጌሻ አያናይኔ አማናይ ኩሚዳ ሎዎ አሲ ጊዲያ ጊሾ ዳር አሳይ ጎዳ አማኒደሶና።

25 ሄሳፌ ጉዬ፣ ባርናባሲ ሳዎላ ኮያናው ቴርሴሴ ቢሰ።

26 ያን ሳዖላ ዳሚዳ ዋዴ እንግዲያ ኤኪዲ ዩሰ። ባርናባሴኔ ሳዖሊ ዋሳ ከላ አሳራ ላይሌ ኩሜሌ ኡተዲ ዳሮ አሳ ታማርሲዶሶና። አማኔይሳተ እንግዲያን «ከሪሰታኔ» ጌቴተዲ ኮይሮ ያጌቴዶሶና።

27 ሄ ዋዴ ኢሲ ኢሲ ናቤቴ ዬሩሳላሜ፤ እንግዲያ ዋዲዶሶና።

28 ኤንታ ጊዶሬ አጋሶሳ ጌይሲ ዴንዲዲ ቢታ ኡባን ጊታ ኮሺ ኬያናይሳ አያና ዋልቃን ቲንቤቴ ኦዲሰ። ሄሲ ሃኒዳይ ሮሜ ካወዋ ቃላዉዲዮሳ ዋዴና።

29 አማኔይሳተ ሁዔን ሁዔን ባንታ ዋልቃ ማላ ሚሼ ከሲዲ ዩሁዳን ዳዒያ አማኔይሳታሰ ማዴ ዬዳናው ቆፋ ቃቺዶሶና።

30 ኤንቲ ሄሳዳ ኦሊዲ፣ ሚሺያ ባርናባሳ ሶላኔ ሳዖላ ሶላ ዋሳ ከላ ጨማታሰ ዬዲዶሶና።

12

ዋሳ ከላ ሶላ ዋልቃማ ጎዲ ጋኪሰ

1 ሄ ዋዴ ካዋይ ሄሮዲሲ * ዋሳ ከላ አሳ፤ ባጋ ጎዳ ዶሚሰ።

2 ዮሃንሳ አሻ ያይቆባ ማሻን ዋዲሲሰ።

3 ሄሲ አይሁዳታ ኡፋይሲዳይሳ ቤዒዲ፣ ጉጂዲ ጳዒሮሳካ ኦይሌሰ። ሄሲ ሃኒዳይ ፓሲካ ባሌ ሶንቺያ ጋላሳታና።

4 ጳዒሮሳ ኦይኪዲ ቃቺሰ። ፓሲካ ሶንቺያ ጋላሳታ፤ ጉዬ ዳሪያ ሲንሐ አላናው ቆፒዲ፣ ኦይዲ ኦይዲ ዋታዳሬቴ ኢያ ናጋና ማላ ታማኔ ኡሱፑን ዋታዳሬታሰ አሌ ኢሚሰ።

5 ሄሳ ጊሾ፣ ጳዒሮሲ ቃሾ ከላን ናጌቴሰ። ሺን ዋሳ ከላ አሳይ ኢያው ሚንሐዲ ያሳ ዋሶሶና።

ኪታንቺይ ጳዒሮሳ ቃሾ ከላሬ ከሲሰ

6 ሄሮዲሲ ጳዒሮሳ አሳ ሲንሐ ሺሻና፤ ካሴ ቃማ ጳዒሮሲ ናምዑ ባጋራ ናምዑ ዋታዳሬታራ ሳንላላታን ቃሾቴዲ ኤንታ ጊዶን ጳሰኪሰ። ናጌይሳተ ቃሾ ከላ ፔንጌታን ኤቁዲ ናጎሶና።

7 አክኮና ዳዒሺን ጎዳ ኪታንቺይ ቆንጨሰ። ቃሾ ከላን ፖይይ ፖሲሰ። ኪታንቺይ ጳዒሮሳ ሚያ ሶቺ ባርኪሲዲ፣ «ኤሌ ዴንዳ» ያገሰ። ኢራካ ሳንላላታይ ኢያ ኩሺያ፤ ዋዲ አገሰ።

11:28 ሃ.አ 21:10 * 12:1 ካዋይ ሄሮዲሲ፡ ሃይሲ ካዋይ ሄሮዲሲ፡ ሄሮዲሳ አገርጳ ጊያ ኮይሩዋ። ኢ፡ 37-44 ማርቴላ ላይላ ጋካናው ሃሪሰ። ኢ ካወዋ ሄሮዲሳሰ ናዓ ናዓ 12:4 ከሳ 12:1-27

8 ኪታንቸይ ኢያኮ፡ «ኔ ማዑዋ ማዓ፡ ኔ ጫማካ አላ» ያገለገለ። ጳውሎስ ህሳዳ ኦሲሰ፤ ኪታንቸይ፡ «ኔ ላፃና ማዓዳ ታና ካላ» ያገለገለ።

9 ጳውሎስ ቃሾ ከላጌ ከዱዲ ኪታንቸዋ ካለገ። ኢያው ቆንጩላ ቤዲያባ ዳኒሲፔ ኣቲን ኪታንቸይ ኦሲያባይ ቱማ ዳኒቤና።

10 ኪታንቸይን ጳውሎስ ኮይሩዎን ናምዓንሉ ዋታዳሪያ ኣጲዲ ካታማ ኤፊያ ቢራታ ፔንጊያኮ ጋኪደሶና። ፔንጊይ ኤንታው ባርካ ደዩቲ ኣገለ። ኤንቲ ከዱዲ ኢሲ ኦጊያራ ቢሺን ኪታንቸይ ኣከኮና ጳውሎስ ሻኬቲ ኣገለ።

11 ጳውሎስ ዋዛኒ ሲሚን፡ «ታና ጎዳይ ባ ኪታንቸዋ ከቲዲ፡ ህሮዲሳ ኩሺፔን ናጊዲ ኡቲዳ ኣይሁዳ ኣሳ ኡባጌ ኣሺዳይሳ ሃዲ ቱማ ኤራሰ» ያገለገለ።

12 ኢ ህሳ ኣከኪዳ ዎዴ ዳሮ ኣሳይ ኢሲጌ ሸቂዲ ያሳ ዎሲያ ቤሳ፡ ማርቆስ ጊያ ዮሃንሳ ኣዬ ማይራሚ ሶ ቢሰ።

13 ያን ካሬን ኤቂዲ ፃገለ። ኢሲ ሮዳ ጊያ ኦሳንቸያ ፔንጊያ ደያናው ያሱ።

14 ሮዳ ጳውሎስ ቃላ ጊዲዳይሳ ኤሪዳ ዎዴ ኡፋይሳን ኩማዳ ካሪያ ደዬና ጉዬ ዎፃ ባዳ፡ «ጳውሎስ ካሬን ኤቂስ» ያገዳ ኣሳስ ኦዳሱ።

15 ኣሳይ ኢኮ፡ «ኔኒ ጎያይ!» ያገደሶና። ሮዳ ጳውሎስ ጊዲዳይሳ ገሻዳ ኦዳሱ። ኤንቲ፡ «ህሲ ኢያ ናጊያ ኪታንቸዋ» ያገደሶና።

16 ሺን ጳውሎስ ካሬን ኤቂዲ ፃገዲ ኣጎና ኢዲን ኣሳይ ካሪያ ደዱዲ ኢያ ቤዲዲ ማላሌቲደሶና።

17 ሺን ኤንቲ ሲዲ ጋና ማላ ጳውሎስ ባ ኩሺያን ማሊዲ ጎዳይ ቃሾ ከላጌ ኢያ ዋቲ ከሲዳኮ ኤንታው ቆንጩሲ ኦዲዲ፡ «ሃይሳ ያይቆባሲኔ ኣማኒያ ኣሳታሰ ኦዲቲ» ጊዲ ያፔ ከዱዲ ሃራሶ ቢሰ።

18 ሳዲ ዎንቲያ ዎዴ «ጳውሎስ ኣው ቢዳ» ጊዲ ዎታዳሬቲ ዎሊ ጊደን ዳሮ ካጪደሶና።

19 ህሮዲሲ ጳውሎስ ኮዩሲን፡ ኢ ጳዩዳ ዎዴ ናጊይሳታ ቆሪዲ፡ ኤንታ ዎጳና ማላ ከቲሰ። ህሳጌ ጉዬ፡ ህሮዲሲ ዪሁዳፔ ቁሳሪያ ዎጲዲ ያን ጉላ ዎዴ ኡቲሰ።

ህሮዲሳ ሃይቁዋ

20 ህሮዲሲ ጳውሎስ ኣሳ ቦላኔ ሲደና ኣሳ ቦላ ዳሮ ሃንቁቲሰ። ኤንታ ቢታይ ካላ ህሮዲሳ ቢታጌ ዳሚያ ጊሾ ኤንቲ ኢሲጌ

ጊዲዲ ኢያ ሞሪና ቢላስጾሳ ባንታው ጨማ ኦሊዲ ገጋናው ሄሮዲሳኮ ቢደሰና።

21 ሄሮዲሲ ሱንሉዳ ጋላሳን ባ ካዎቴላ አፊላ ማዒዲ፥ አራታ ቦላ ኡቲዲ አሳስ ኦዲሰ።

22 አሳይ፥ «ሄሲ ጾሳ ቃላ፥ አሳ ቃላ ገዴና» ያገዲ ዋሲደሶና።

23 ሄሮዲሲ ጾሳ ቦንቹቦና ገሾ ኢራካ ጎዳ ኪታንቾይ ኢያ ዴቹን ጉፁኔን ማቴቲዲ ሃይቁሰ።

24 ሺን ጾሳ ቃላይ ዲጨሽኔ ዳልገሽ ቤሰ።

25 ባርናባሲኔ ሳጾሊ ባንታ ኦሱዋ ፖሊዲ ማርቆሳ ገያ ዮሃኒሳ ባንታራ ኤኪዲ ዬሩሳላሜ፤ ሲሚደሰና።

13

ባርናባሲኔ ሳጾሊ ከቴቲደሶና

1 አንጾኪያን ዴዒያ ዋሳ ኬላን ናቤቲኔ አስታማሪቲ ዴጾሶና። ኤንቲ ባርናባሳ፥ ካራሉ ጌቲቲያ ሲሞና፥ ቁሬና፤ ዱዳ ሉኪዮሳ፥ ካወዋ ሄሮዲሳራ ዲጨዳ ሚናሄኔ ሳጾላ።

2 ኤንቲ ጎዳ ጎይኒሽኒኔ ጾሚሺን ጌሻ አያናይ፥ «ታኒ ዪገዳ ኦሱዋስ ባርናባሳኔ ሳጾላ ታው ዲማዪቲ» ያገሰ።

3 ሄሳ ገሾ፥ ኤንቲ ጾሚዳ፤ ሞሲዳ፤ ጉዬ ባንታ ኩሺያ ኤንታ ቦላ ዋሊዲ ዬዲደሶና።

ባርናባሲኔ ሳጾሊ ቆጶሪሳ ቢደሰና

4 ሄሳ ገሾ፥ ጌሻ አያኒ ኤንታ ከቲሰ። ሴሌወቄ ቢደሰና፤ ያፔ ማርካቤን ጌሊዲ ቆጶሪሳ ሃላን ቴቄቲዳ ቢታ ቢደሰና።

5 ኤንቲ ሲልማና ጋኪዲ አይሁዴ ዋሳ ኬላታን ጾሳ ቃላ ኦዲደሶና። ዮሃኒሲ * ማዲሽ ኤንታራ ዴዔሰ።

6 ኤንቲ ቆጶሪሳ ሃላን ቴቄቲዳ ቢታ ካንሉዲ ጳፋ ጋኪያ ዋዴ ኢሲ ዋርዳንቾ ናቢያ ባር-ዬሱሳ ገያ አይሁዴ ማሩዋ ዴሚደሰና።

7 ሄ ማርይ ዴሪያ አይሲያ ሳርገዮስ ጳወሎሳ ገያ አኬካንቾ አዲያራ ዴዔሰ። ሳርገዮስ ጳወሎሲ ባርናባሳኔ ሳጾላ ባኮ ዪገዲ ጾሳ ቃላ ሲዳናው ኮዩሰ።

8 ሺን ገሪኬ ደናን ማሩዋ ሱንላይ «ኤልማሳ» ጌቲቲሰ። ኢ ዴሪያ ሃሬይሲ አማና ማሳ ዲጋናው ኮዩዲ ባርናባሳራኔ ጳወሎሳራ ኤቄቲሰ።

* 13:5 ዮሃኒሲ፡ ሃ ቤሳን ዓፊቲዳ ዮሃኒሲ፥ ሃዋሪያ ዮሃኒሳ ገደናሺን ዮሃኒሰ ማርቆሳ ጌቲቲያ ማርቆሳ ዋንጌላ ዓፊዳይሳ።

9 ሺን ጳውሎሳ ጊያ ሳገሊ ጌሻ ኣያናን ኩሚዲ ማሩዋ ጫዲ ያሊዲ፤

10 «ላ፥ ፃላሄ ናዓው፥ ኢታቴላ ኡባይ ኩሚዲይሶ፥ ዓሎቴላ ኡባሰ ሞርኪያው፥ ሱሬ ጎዳ ኦጊያ ሚርቄይሳ ኣጊኪ?»

11 ሄኮ፥ ሃዒ ጎዳ ኩሺይ ኔ ቦላ ዴዔሰ። ኔኒ ቆቄ ጊዳና፤ ጉላ ዋዴሰ ኣዋ ፖጋ ቤዓካ» ያጊሰ።

ኢራ ጫጋናይኔ ቋማይ ኢያ ኣይፊያ ጎዚን፥ ባ ኩሺያ ኦይኪዲ ካሌሊያ ኣሲ ኮዩሺ ዩዩሰ።

12 ዴሪያ ሃሪይሲ ሄሳ ቤዒዳ ዋዴ ጎዳባ ታማርሴይሳን ማላሌቴዲ ኣማኒሰ።

ባርናባሲኔ ጳውሎሲ ጲሲዲያ ኣንጾኪያ ቢደሶና

13 ጳውሎሲኔ ኢያራ ዴዔይሳቴ ጳፉፔ ዴንዲዲ፥ ጲንፊሊያን ዴዒያ ጴርጌ ማርካቤራ ቢደሶና። ዮሃኒሲ ኤንታፊ ሻኬቴዲ ዩሩሳላሚ ሲሚሰ።

14 ሺን ኤንቲ ጴርጌፊ ኣቋዲ ጲሲዲያን ዴዒያ ኣንጾኪያ ጋኪደሶና። ሳምባታ ጋላሰ ኣይሁዴ ዋሳ ኬላ ጌሊዲ ኡቴደሶና።

15 ሙሴ ሂጌይኔ ናቤታ ማፃፋይ ናባቤቴዳፔ ጉዩ ኣይሁዴ ዋሳ ኬላ ሃላቃቴ፥ «ኮ ኢሻቶ፥ ኣሳ ሚንጼሊያ ቃሊ ሂንቴው ዴዒያኮ ኣሳሰ ኦዴርኬቴ» ያጊዲ ኤንታኮ ኪቴደሶና።

16 ጳውሎሲ ዴንዲ ኤቂዲ ባ ኩሺ ማሊዲ፥ «ኢሰራዔሌ ኣሳታው፥ ቃሲ ያሳ ጎይኒያ ኣይሁዴ ጊደና ኣሳው፥ ሲዒቴ።

17 ሃ ኢሰራዔሌ ኣሳ ያሳይ፥ ኦ ማይዛታ ዶሪሰ። ጊብፄ ቢታን ኢማላቴላን ኤንቲ ዴዒሺን፥ ኤንታ ዳርሲዲ ባ ጊታ ዋልቃን ጊብፄ ቢታፊ ኤንታ ኬሰሰ።

18 ባዞ ቢታን ኦይታሙ ላይላ ማላ ኤንታ ዳንዳዒሰ።

19 ካናኔ ቢታን ኣይሁዴ ጊደና ላፑን ካዋቴላታ ዲጊዲ ኤንታ ቢታ ባ ኣሳ ላቴሲሰ።

20 ሄሳፊ ጉዩ፥ ናቢያ ሳሙዔላ ዋዴ ጋካናው ኦይዲ ያታኔ ኢሻታሙ ላይላ ማላ ኣይሲያ ዳይናታ ኤንታው ኢሚሰ።

21 ሄሳፊ ጉዩ፥ ኤንቲ ባንታው ካዋ ኢማና ማላ ዋሲን፥ ያሳይ ቢኒያሜ ሺሻፔ ቁሴ ናዓ፥ ሳገላ ኦይታሙ ላይላ ካዋታና ማላ ኤንታው ኢሚሰ።

13:17 ኬሳ 1:7፤ ኬሳ 12:51 13:18 ታይ 14:34፤ ዛሬ 1:31 13:19 ዛሬ 7:1፤ ኢያ 14:1 13:20 ዛሬ 2:16፤ 1ሳሙ 3:20 13:21 1ሳሙ 8:5፤ 10:21

22 ያሳይ ሳዎላ ሻሪዳፔ ጉዬ ኤንታ ቦላ ዳዊቲ ካዎሊስ። ያሳይ ዳዊቲባ ማርካቲሹ፣ ታኒ ኮያ ኡባ ታ ዎዛና ማላ ኦሊያ ኢሴዬ ናሳ ዳዊቲ ዳማስ) ያገሰ።

23 «ያሳይ፣ ታኒ ዳዊቲ ሼሻፔ ኢሰራዔሌ ዳሪያ ኣሼይሳ ኤሃና) ገዳይሳ ማላ ዩሱሳ ኤሂስ።

24 ዩሱሲ ያናፔ ሰንሴ ኢሰራዔሌ ኣሳ ኡባይ ባንታ ናጋራፔ ሰሚዲ ፃማቄታና ማላ ዮሃኒሲ ቃላ ኦዲስ።

25 ቃሲ ዮሃኒሲ ባ ኦሎቆ ዉርሳና ሃኒሼ ኣሳኮ፣ ታና ኦና ገዲ ቆፔቲ? ታኒ ሂንቴ ናገያ ኪሪሰቶሳ ገዲኮ፣ ሺን ታኒ ኢያ ጫማ ቢርሻናው ታው ቤሶናይሲ ታፔ ጉዬራ ዩስ) ያገሰ።

26 «ኢሻቶ፣ ኣብራሃማ ሼሻቶ፣ ቃሲ ሃይሳን ኣይሁዴ ገደናሺን ያሳስ ያዩይሳቶ፣ ሃ ኣቶቴሳ ቃላይ ኮስ ኪቴቲስ።

27 ኣይስ ገኮ፣ ዩሩሳላሜን ዳዒያ ኣሳይኔ ኤንታ ሃላቃቲ ዩሱሳ ኤሪቦኮና። ሳምባታ ኡባን ናባቤቲያ ናቤታ ቃላ ኣኬኪቦና ገሾ ኢያ ቦላ ፐርዲዲ ናቤቲ ኦዲዳ ቃላ ፖሊደሶና።

28 ዩሱሳ ዎዲሳናው ኢሲ ጋሶይካ ቆዩን ጸላዖሲ ኢያ ዎቆና ማላ ዎሲደሶና።

29 ኤንቲ ዩሱሳባይ ጌሻ ማፃፋን ፃፊቲዳባ ኡባ ፖሊዳ ዎዴ ማሰቃሊያፔ ኢያ ዎዲሲዲ ሞገደሶና።

30 ሺን ያሳይ ሃይቆፔ ዩሱሳ ዴንሊስ።

31 ሂሳፌ ጉዬ፣ ኢ ባራ ጋሊላፔ ዩሩሳላሜ ዩዲይሳታስ ዳር ቶሆ ቤንቲስ። ኤንቲ ሃዒ ኢያባ ኣሳስ ማርካቶሶና።

32 «ያሳይ ኦ ኣዎታስ ኢማና ገዳ ዎንጌላ ኮኒ ሂንቴው ኦደስ።

33 ዳዊቲይ ባ ማዝሙራ ማፃፋን ናምዓንሖ ሼምፑዎን፣ ሳኔ፣ ታ ናሳ፣

ታኒ ሃቺ ኔና ዩላስ)

ጌቲቲዲ ፃፊቲዳ ዩሱሳ፣ ያሳይ ሃይቆፔ ዴንሊዲ ኦ ማይዛታስ ኢማና ገዳይሳ ኮስ ኤንታ ናይታስ ፖሊስ።

34 ኢ ዎቆና ማላ ያሳይ ሃይቆፔ ኢያ ዴንሶን ኤሪሳናው፣ ታኒ ዳዊቲስ ኢማና ገዳ

ኢማኔቲዳ ጌሻ ኣንጂዎ ሂንቴው ኢማና) ያገዲ ኦዲስ።

35 ሂሳ ገሾ፣ ማዝሙራ ማፃፋን ሃራሶን ቃሲ።

13:22 1ሳሙ 13:14፤ 16:12፤ ማዝ 89:20 13:24 ማር 1:4፤ ሉቃ 3:3
13:25 ማቶ 3:11፤ ማር 1:7፤ ሉቃ 3:16፤ ዮሃ 1:20፤ 27 13:28 ማቶ
27:22-23፤ ማር 15:13-14፤ ሉቃ 23:21-23፤ ዮሃ 19:15 13:29 ማቶ
27:57-61፤ ማር 15:42-47፤ ሉቃ 23:50-56፤ ዮሃ 19:38-42 13:31 ሃ.ኦ 1:3
13:33 ማዝ 2:7 13:34 ኢሳ 55:3

ሪኔ ጌሻ ናዓ እሃ ዋቀሳካ) ያጌሰ።

36 «ዳዊቴይ ባ ዋዴ ያሳ ቆፋ ፖሊዳፔ ጉዬ ሃይቂዲ ባ ኣዋታራ ሞጌቲዲ ዋቀሰ።

37 ሺን ያሳይ ሃይቆፔ ዳንሊዳይሲ ዋቀቤና።

38 «ሃሳ ጊሾ፣ ታ ኢሻቶ፣ ናጋራ ኣቶቴላይ ዬሱሳ ባጋራ ካሴቲዲ ሂንቲው ኦዴቲዳይሳ ኤሪቴ። ሙሴ ሂጌይ ናጋራፔ ዲሊሳናው ዳንዳዔና።

39 ሺን ዬሱሳ ኣማኒያ ኡባይ ናጋራፔ ዲሊሰ።

40 ሃሳ ጊሾ፣ ናቤቲ ጊዳይሲ ሂንቲ ቦላ ጋኮና ማላ ናጌቲቴ።

41 «የሳይ ጊዳባ ለቂሴይሳቶ! ቤዒቴ! ማላሌቲቴ! ቆዩቴ!

ኦኒካ ኦዲን፣ ሂንቲ ኣማኖና ኦሱዋ

ታኒ ሂንቲ ዋዲያን ኦላና » ያጌሰ።

42 ጳውሎሴኔ ባርናባሲ ኣይሁዴ ዋሳ ከላፌ ከዩሺን፣ ካሊያ ሳምባታን ሃሳ ጉጂዲ ኦዳና ማላ ኣሳይ ኤንታና ዋሲዶሶና።

43 ሺቆይ ላሌቲዳፔ ጉዬ ዳሮ ኣይሁዴቲኔ ኣይሁዴታ ኣማኑዋን ጌሊዲ ያሳ ጎይኒያ ዳሮቲ ጳውሎሳኔ ባርናባሳ ካሊዶሶና። ኣማኒዳይሳቲ ያሳ ኣቶ ከሃቴላን ማኒዲ ዳና ማላ ኤንታ ዘሪዶሶና።

44 ካሊያ ሳምባታን ካታማን ዴዒያ ኣሳፔ ዳሮቲ ያሳ ቃላ ሲዓናው ሸቂዶሶና።

45 ሺን ኣይሁዴቲ ዳሮ ኣሳ ቤዒዳ ዋዴ ጳውሎሳ ቃናቲዲ ኢያ ሃሳያ ኢዲዲ ኢያ ጫዩዶሶና።

46 ጳውሎሴኔ ባርናባሲ ያዮና፣ «የሳ ቃላይ ኮይሮቲዲ ሂንቲው ኦዴታናው ኮሺሰ። ሺን ሂንቲ ቃላ ኢዲዲ ማሪና ዴቦዋ ኤካናው ኦሰ ቤሴና ጊዲ ሂንቲ፣ ሂንቲ ሁዔን ፐርዲዳ ጊሾ ሂዛ ኦኒ ኣይሁዴ ጊዳናይሳታኮ ሲሞሰ።

47 ጋሶይካ ጎዳይ፣

ኣላላማ ኩማላይ ኔ ባጋራ ኣታና ማላ፣

ታኒ ኔና ኣይሁዴ ጊዶና ዴሪያሰ ፖዖ ኦላሰ) ያጌዲ ኦና ከቲሰ» ያጌዶሶና።

48 ኣይሁዴ ጊዳናይሳቲ ሃሳ ሲዒዳ ዋዴ ኡፋይቲዲ ያሳ ቃላ ቦንቺዶሶና። ቃሲ ማሪና ዴቦዋሰ ዶሬቲዳ ኡባይ ኣማኒዶሶና።

49 ጎዳ ቃላይ ሄ ቤታ ኡባ ጋኪሰ።

50 ሺን ኣይሁዴቲ፣ ኣይሁዴ ጊዶና ያሴ ጎይኒያ ዲሬ ማጫሳታኔ ካታማን ዴዒያ ጌታ ኣሳታ ጳውሎሳ ቦላኔ ባርናባሳ ቦላ

ዳንጹሊደሶና። ሄ አሳቲ ኤንታ ጎዳ ደሚዲ ባንታ ቢታፊ ኬሲደሶና።

51 ሺን ጳውሎሳራኔ ባርናባሳራ ኢጄይሳታሰ ማላ ጊዳና ማላ ባንታ ቶሁዋፔ ባና ፒቲዲ ኢቆኒዮኔ ካታማ ቢደሶና።

52 ቃሲ አንጎኪያን ዴሲያ አማኔይሳቲ ጌሻ አያናኒኔ ኡፋይሳን ኩሚደሶና።

14

ጳውሎሲኔ ባርናባሲ ኢቆኒዮኔ ቢደሶና

1 ካሴይሳዳካ፣ ጳውሎሲኔ ባርናባሲ ኢቆኒዮኔን አይሁዴታ ዋሳ ኩሊ ጌሊዲ ዳር አይሁዴቲኔ አይሁዴ ጊደናይሳቲ አማናና ጋካናው ቃላ ኦዲደሶና።

2 ሺን አማኒቦና አይሁዴቲ፣ አይሁዴ ጊደናይሳታ ዋዘና ላሚዲ ኢሻታ ቦላ ዳንጹሊደሶና።

3 ሃዋሬቲ ያን ዳር ዋዴ ጋምዲደሶና። ኤንቲ ያዮና ጎዳባ ኦዲደሶና። ጎዳይ ማላታታኔ ኦራላባ ኤንቲ ኦላና ማላ ኤንታው ማታ ኢሚዲ ባ አቆ ኬሃቴላ ቃላይ ቱማ ጊዴይሳ ቆንጨሲሰ።

4 ሺን ሄ ካታማ አሳይ ሻኬቲዲ፣ ባጋይ አይሁዴታራ ባጋይ ቃሲ ሃዋሬታራ ጊዲሰ።

5 አይሁዴ ጊደናይሳቲኔ አይሁዴቲ ባንታ ሃላቃታራ ኢሲፊ ጊዲዲ ሃዋሬታ ቆሃናውኔ ሹቻን ጫዳናው ኮዪደሶና።

6 ሃዋሬቲ ሄሳ ኤሪዲ፣ ሊሰጺራኔ ዳርቤ ጊያ ሊቃዎኒያ ካታማታኔ ኤንታ ሄራን ዴሲያ ቢታ ባቃቲደሶና።

7 ያን ዋንጌላ ኦዲደሶና።

ጳውሎሲኔ ባርናባሲ ሊሰጺራኔ ዳርቤን

8 ዩሌቶሳፔ ደሚዲ ናምቡ ቶሆይ ዋቢን ሃሙቲ ኤርና ኢሲ አዴይ ሊሰጺራን ዴዔሰ።

9 ሄ አዴይ ጳውሎሲ ኦዲሺን ኡቲዲ ሲዔሰ። ጳውሎሲ ኢያ ጫዲዲ ጄሊያ ዋዴ ፓግናው ኢያው አማናይ ዴዔይሳ ቤዒዲ፣

10 ባ ቃላ ቆቁ ኦሊዲ፣ «ሲቲ ጋዳ ኔ ቶሁዋን ኤቃ» ያጌሰ። ያቲን፣ ጉፒ ዳንዲ ኤቁዲ ሃሙሊ ደሚሰ።

11 ጳውሎሲ ኦሊዲይሳ አሳይ ቤዒዲ ባንታ ቃላ ቆቁ ኦሊዲ ሊቃዎኒያ ደናን፣ «ዖሳቲ አሴ ዳኒዲ ኑኮ ዋጂደሶና» ያጌደሶና።

12 ባርናባሳ፣ «ዲያ» ጊዲ፣ ጳውሎሲ ሃሳያን ዋናቲያ ጊሾ ኢያ፣ «ሄርሜሳ» ጊዲ ሱንጹደሶና።

13 ካታማፔ ጋፃን ዴዲያ ኤቃ ዲያ ኩላ ካሂኔይኔ ኣሳይ ኮርማታኔ ኣሌቆ ጨሻታ ሃዋሬታሰ ያርሻናው ኮዪዲ ካታማ ፔንጌ ኤሂደሶና።

14 ሺን ባርናባሲኔ ጳውሎሲ ሄሳ ሰዒዲ ዎዴ ኤንቲ ኦላናው ቆፒዲይሳ ኢዲዲ ባንታ ማዑዋ ፔዲደሶና። ኣሳ ገዶ ዎዲ ጌሊዲ።

15 ባንታ ቃላ ቶቁ ኦሊዲ። «ኣሳው። ሃይሳ ኣይሰ ኦሌቲ? ኩካ ሂንቲ ማላ ኣሴ። ሃ ፓሶናባፔ ሳሉዋኔ ሳዓ። ኣባኔ ኤንታ ገደን ዴዲያ ኡባባ ማዲዲ ዴዎ ያሳኮ ሂንቲ ሲማና ማላ ሂንቲው ኩኔ ዎንጌላ ኦደሰ።

16 ኢ በኒ ኣሳ ባንታ ኦጊያ ባና ማላ ዬዲ ኣገሰ።

17 ሺን ኢሩ ሳሉዋፔ ቡኪሲሰ። ካላካ ዎዴን ዎዴን ኢሚሰ። ካሊ ኢሚዲ ሂንቲና ዳሮ ኡፋይሲሰ። ያቲዲ ሂንቲው ሎዎባ ኦሊዲ ባው ማርካ ቆይሲቤና» ያገደሶና።

18 ሃዋሬቲ ሄሳ ገዲ ባንታው ኣሳይ ያርሻና ማላ ዎዪዲ ዲገደሶና።

19 ኣንጾኪያፔኔ ኢቆኒዮኔፔ ዪዳ ኣይሁዴቲ። ኣሳ ባንታ ባጋ ዘሪዲ ሹቻን ጳውሎሳ ጫዲደሶና። ኤንታው ኢ ሃይቁዳባ ዳኒን ካታማፔ ጋፃ ጎቲ ኤፊዲ ዬገደሶና።

20 ሺን ኣማኔይሳቲ ዪዲ። ኢያ ዩሹዎን ኤቁዳሺን ኢ ዴንዲዲ ካታማ ጌሊሰ። ዎንቲላ ጋላሰ ባርናባሳራ ኢሲፌ ዳርቤ ቤሰ።

ጳውሎሲኔ ባርናባሲ ሶሪያ ኣንጾኪያ ሲሚደሶና

21 ኤንቲ ዳርቤ ካታማን ዎንጌላ ኦዲዲ ዳሮታ ኣማንሉዳፔ ጉዬ ሊሰዲራ። ኢቆኒዮኔኔ ጳሲዲያ ኣንጾኪያ ሲሚደሶና።

22 ያን ኣማኔይሳታ ሚንሌሊሼኔ ኤንቲ ኣማናን ሚኒዲ ዴዓና ማላ ዘሪሸ። «ያሳ ካዎቲላ ጌላናው ኩኒ ዳሮ ዎዬ ኤካናው ቤሰሰ» ያገደሶና።

23 ቃሲ ዎሳ ኬላታሰ ሁዔን ሁዔን ጨማታ ደሪደሶና። ያሚዳፔኔ ዎሲዳፔ ጉዬ ኤንቲ ኣማኒዲ ጎዳሰ ኤንታ ሃዳራ ኢሚደሶና።

24 ጳሲዲያ ቢታ ካንሉዲ ኣዲዲ ጳንፊሊያ ቢደሶና።

25 ጳርጌን ቃላ ኦዲዳፔ ጉዬ ኣፃሊያ ቢደሶና።

26 ያፔ ኤንቲ ባንታ ፖሊዳ ኦሱዋሰ ያሳ ኣቆ ኬሃቲላሰ ኤንታ ሃዳራ ኢሚዳ ኣንጾኪያ ማርካቤራ ሲሚደሶና።

27 ኣንጾኪያ ጋኪዳ ዎዴ ዎሳ ኬላ ኣሳ ሺሺዲ ያሳይ ኤንታራ ኦሊዲ ኦሱዋ ኡባኔ ኣይሁዴ ገደና ኣሳይ ኣማናና ማላ ኤንታው ዋቲ ፔንጌ ደዪዳኮ ኦዲደሶና።

28 ሄሳን አማኔይሳታራ ዳሮ ዎዴ ጋሞዒዶሶና።

15

ዬሩሳሌም ሸቆዋ

1 ኢሲ ኢሲ አሳቲ ዪሁዳፔ አንጾኪያ ቢዲ፣ «ሙሴ ዎጋሶ ሂንቲ ቃፃሬቶና ኢዲኮ አታናው ዳንዳዔቤታ» ጊዲ አማኔይሳታ ታማርሶ ደሚዶሶና።

2 ሄሲ ጳውሎሳኔ ባርናባሳ ኤንታራ ዳሮ ፓላማናዳኔ ካጫናዳ ኦሊሶ። ሄሳ ጊሾ፣ አንጾኪያን ዳዒያ ኢሲ ኢሲ አሳቲ ጳውሎሳራኔ ባርናባሳራ ዬሩሳሌም ቢዲ ሃዋሬታራኔ ጨማታራ ጋሂቲዲ ሄ ኦዳ ቢላና ማላ ቆፋ ቃቺዶሶና።

3 ዎሳ ከላይ ኤንታ ከቲን ቢዶሶና። ኤንቲ ሲርፊንቄ ሳማሬራ አዲሼ አይሁዳ ጊዶናይሳቲ ያሳኮ ዋኒዲ ሲሚዳኮ ኦዲዶሶና። ሄሲ አማኔይሳታ ኡባ ዳሮ ኡፋይሲሶ።

4 ኤንቲ ዬሩሳሌም ጋኪዳ ዎዴ ዎሳ ከላይ፣ ሃዋሬቲኔ ጨማቲ ኤንታ ሞኪዶሶና። ያሳይ ባንታራ ኦሊዳባ ኡባ ኦዲዶሶና።

5 ሺን ፋሪሳዌታ ባጋፌ አማኒዳ ኢሲ ኢሲ አሳቲ ዳንዲ ኤቁዲ፣ «አይሁዳ ጊዶናሺን አማኒዳ አሳቲ ቃፃሬታናውኔ ሙሴ ሂጊያ ናጋናው ቤሴሰ» ያጊዶሶና።

6 ሃዋሬቲኔ ጨማቲ ሄሳ ዘሬታናው ሸቁዶሶና።

7 ዳሮ ሃሳዪዳፔ ጉዬ፣ ጳዒርሲ ዳንዲ ኤቁዲ፣ «ታ ኢሻቶ፣ አይሁዳ ጊዶናይሳቲ ዎንጌላ ቃላ ታ ዶናፔ ሲዒዲ አማናና ማላ ካሴቲዲ ታና ያሳይ ሂንቲ ጊዶፌ ዶሪዳይሳ ሂንቲ ኤሬታ።

8 አሳ ዎዛና ኤሪያ ያሳይ ጌሻ ኣያና ኦሰ አሚዳይሳዳ ኤንታወካ አሚዲ ቱማይሶ።

9 አማኖን ኤንታ ዎዛና ጌሺዳ ጊሾ ኦ ጊዶኒኔ ኤንታ ጊዶን ዲማቴላ ዎሊቤና።

10 ሄሳ ጊሾ፣ ኦ አዎቲኔ ኦኒ ቶካናው ዳንዳዒቦና ቃሞባራ አማኔይሳታ ሞርጌን ዎሊዲ ሃዒ አይሰ ያሳ ፓጩቲ?

11 ጎዳ ዬሱሰ ከሪሰቶሳ አጼ ከሃቴላን ኤንቲ አቲዳይሳዳ ኦካ አቲዳይሳ አማኖሰ» ያጊሰ።

12 አሳይ ሲዒ ጊዲ፣ ባርናባሲኔ ጳውሎሲ አይሁዳ ጊዶና አሳ ጊዶን ባንታ ባጋራ ያሳይ ኦሊዳ ማላታታኔ ኦራላባ ኡባ ኦዲሺን ሲዶሶና።

13 እንቲ ሃሳያ ኦንጊዳፔ ጉዬ ያይቆቢ፡ «አሻቶ፡ ታ ጌይሳ ሲባቲ፡፡

14 ያሳይ ኣይሁዴ ጊደናይሳታ ጊደፌ ባ ኣሴ ደራናው ኮዩዲ እንታና ኮይሮ ዋቲዲ ቆፒዳኮ ሲሞኒ ኦዲሰ፡፡

15 ናቤታ ቃላይ ሃይሳራ ጊኔሰ፡፡ ጌሻ ማፃፋን፡፡

16 ላይሳፌ ጉዬ፡ ታኒ ሲማና፡
ኩንዲዳ ዳዊቲ ካዎቲላ ዴንላና፡፡
ላሌቲዳ ኬላካ ዛራ ኤሳና፡፡

17 ኣቲዳ ኣሳ ኡባይ ታኮ ያና፡
ታኒ ፃጊዳ ኣይሁዴ ጊደና ኣሳ ኡባይ ታና ኮያና፡፡

18 ቤኒፔ ደማዳ ሄሲ ኤሬታና ማላ ኦሊዳ
ያሳይ፡ ታኒ ያጋይሰ) ያጌሰ፡፡

19 «ሄሳ ጊሾ፡ ታ ቆፋይ ያሳኮ ሲሚያ ኣይሁዴ ጊደናይሳታ ኮኒ ዋይሶናኮ ሎዎ፡፡

20 ሺን እንቲ ኤቃሰ ያርሼቲዲ ቱኒዳባ ሞና ማላ፡ ላይማቶና ማላ፡ ባወታ ሞና ማላኔ ሱሊ ኡዮና ማላ እንታው ኮኒ ዳብዳቤ ፃፋናው ኮሼሰ፡፡

21 ሙሴ ሂጌይ ቤኒፔ ደሚዲ ሳሞባታን ሳሞባታን ኣይሁዴ ዋሳ ኬላታን ናባቤቲሹ ካታማ ኡባን ሳባኬቲሰ» ያጊሰ፡፡

22 ሄሳፌ ጉዬ፡ ሃዋሬቲኔ ጨማቲ ዋሳ ኬላ ኣሳ ኡባራ ኢሲፌ ባንታ ጊደፌ ጉላ ኣሳታ ደሪዲ ጳዉሎሳራኔ ባርናባሳራ ኣንጾኪያ ዬዳናው ቆፋ ቃቺደሶና፡፡ እንቲ ዳሮ ቦንቹቲዳ ናሞው ኣሳታ ባርሳባሳ ጌቲቲያ ዩሁዳኔ ሲላሴ ደሪደሶና፡፡

23 ሃይሳዳ ጌቲቲ ፃፌቲዳ ዳብዳቤያ እንታ ቦላ ዬዲደሶና፡ «ኮኒ ሃዋሬቲኔ ጨማቲ ሂንቲ አሻቲ፡ ኣንጾኪያን፡ ሶሪያኒኔ ከለቂያን ዴዲያ ኣይሁዴ ጊደና አሻታሰ ኮ ሳርሉዋ ከቶሰ፡፡

24 «ኮኒ ከቶና ኣሳቲ ኮ ጊደፌ ቢዲ፡ ላይንቲ ቃፃሬታናወኔ ሂጊያ ናጋናው ቤሴሰ) ጊዲ፡ ሂንቲና ዋይሲዳይሳኔ ዩሎዩዳይሳ ሲባዲ፡፡

25 ኮኒ ደሲያ ባርናባሳኔ ጳዉሎሳ ደሬቲዳ ኣሳታራ ኢሲፌ ሂንቲኮ ከታናው ኢሲ ዋዛናን ኮ ቆፋ ቃቺዳ፡፡

26 እንቲ ኮ ጎዳ ዬሱሰ ከሪሰቶሳ ጊሾ ባንታ ዴዐዋ ኣሊ አሚደሶና፡፡

27 ሄሳ ጊሾ፡ ኮኒ ፃፊዳይሳ እንቲ ባንታ ደናን ጉጂዲ ሂንቲው ኡዳና ማላ ዩሁዳኔ ሲላሴ ከቲዳ፡፡

28 «ሃ ኮሼይሳታፔ ኣቲን ሃራ ቶሆ ሂንቴና ቶሶና ማላ ኑኔ ጌሻ ኣያናይ ኦዳ ቃቸዳ።

29 ኤቃሰ ያርሼቲዲ ቱኒዳባ ሞፐፔ፣ ሱጡ ኡዮፐፔ፣ ባወታ ሞፐፔ፣ ላይማቶፐፔ። ሃ ኡባፌ ሂንቴ፣ ሂንቴ ሁዒያ ናጊኮ ሎዖባ ኦጱታ» ያጊደሶና።

30 ሄሳ ጊሾ፣ ኪቲቲዳይሳቲ ሞይዜቲዲ ኣንዖኪያ ቢዲ ኣማኒያ ኣሳ ሺሺዲ፣ ዳብዳቤ ኢሚደሶና።

31 ኤንቴ ሄ ሚንጮሊያ ዳብዳቤያ ናባቢዳ ዎዴ ኡፋይቲደሶና።

32 ቃሲ ዪሁዲኔ ሲላሴይ ባንታ ሁዒን ናቤ ጊዲያ ጊሾ ኣማኔይሳታ ሎይሊ ዞሪዲ ሚንጮሊደሶና።

33 ኤንቴ ኣንዖኪያን ጉፋ ጋላሰ ኡቲዳፔ ጉዬ ኢሻቲ ሎዖራ ሞይዚን ባንታና ኪቲዳይሳታኮ ሲሚደሶና።

34 * [ሺን ሲላሴይ ያን ኣታናው ኮዪሰ።]

35 ቃሲ ጳወሎሲኔ ባርናባሲ ሃራ ዳሮ ኣሳታራ ኢሲፌ ጎዳ ቃላ ታማርሲሼኔ ዎንጌላ ኦዲሼ ኣንዖኪያን ጋሞዒደሶና።

ጳወሎሲኔ ባርናባሲ ሻኬቲደሶና

36 ጉፋ ጋላሳፔ ጉዬ ጳወሎሲ ባርናባሳኮ፣ «ኑኒ ጎዳ ቃላ ኡዲዳ ካታማ ኡባን ኣማኔይሳቲ ዋኒዲ ዴዒያኮ ጉዬ ሲሚሼ ዖሞሳና» ያጊሰ።

37 ባርናባሲ ማርቆሳ ጌቲቲያ ዮሃኒሳ ባንታራ ኤፋናው ኮዪሰ።

38 ሺን ጳወሎሲ ማርቆሳ ባንታራ ኤፋናው ኮዪቤና። ጋሶይካ፣ ኢ ጲንፊሊያን ሻኬቲዲ ኤንታራ ኦፋናው ቢቤና።

39 ኤንታ ጊደን ኢታ ኦሺ ኬዪን ኢሶይ ኢሱዎፌ ሻኬቲደሶና። ባርናባሲ ማርቆሳ ኤኪዲ ማርካቤራ ቆጲሮሳ ቢሰ።

40 ሺን ጳወሎሲ ሲላሴ ዶሪሰ፣ ኣማኔይሳቲ ጳወሎሳ ዖሳ ኣጶ ኬሃቲፋሰ ሃዳራ ኣሚዳፔ ጉዬ ኢ ኬዪዲ ቢሰ።

41 ያቲዲ፣ ዎሳ ኬፋታ ሚንጮሊሼ ሶሪያራኔ ኪልቂያራ ኣጲሰ።

16

ዒሞቲዮሲ ጳወሎሳራኔ ሲላሴራ ጋሂቲሰ

1 ጳወሎሲ ዳርቤኔ ሊሰዒራ ቢሰ። ያን ዒሞቲዮሳ ጊያ ኣማኒያ ኣሲ ዴዔሰ። ኢያ ኣያ ኣማኒያ ኣይሁዴ ማጫሰ፣ ኢያ ኣዋይ ጌሪኬ ኣሲ።

* 15:34 ኢሲ ኢሲ ማፃፋታን ፓይዶ 34 ባዋ። 15:38 ሃ.ኦ 13:13

2 ሊሰደራኒኔ ኢቆኒዮኔን ዳዒያ አማኔይሳቲ ዲሞቲዮሳባ ሎይሉዲ ማርካቲዶሶና።

3 ጳውሎሲ ዲሞቲዮሳ ባራ ኤፋናው ኮዪዲ፣ ኢያ አዋይ ገሪኬ ኣሲ ገዲዳይሳ ሄ ቤሳን ዳዒያ ኣይሁዴ ኡባይ ኤሪያ ጊሾ ኢያ ቃፃሪስ።

4 ኤንቲ ካታማታራ ቢሼ ዩሩሳላሜን ዳዒያ ሃዋሪቲኔ ጨማቲ ሞሉዳ ሂጊያ አማኔይሳቲ ናጋና ማላ ኤንታው ኦዲሼ ኣቋደሶና።

5 ሄሳ ጊሾ፣ ዋሳ ከላቲ አማኖን ሚኒሼ፣ ታይቦንካ ጋላስ ጋላስ ዳሪ ዳሪ ቢዶሶና።

ጳውሎሲ ማቄደኒያ ባናዳ ጃጌቲስ

6 ኢሲያን ቃላ ኦዶና ማላ ጌሻ ኣያናይ ኤንታ ዲጊዳ ጊሾ ጸርጌራኔ ጋላቲያ ቢታራ ኣቋደሶና።

7 ኤንቲ ሚሲያ ዛዋ ጋኪዳ ዋዴ ቢቲኒያ ባናው ኮዪዶሶና። ሺን ዩሱሳ ኣያናይ ኤንታ ዲጊስ።

8 ሄሳ ጊሾ፣ ኤንቲ ሚሲያ ማታራ ኣቋሼ ዲሮዳ ዋቋደሶና።

9 ጳውሎሲ ቃማ ቆንጨጭሳን ኢሲ ማቄደኒያ ኣሲ ባኮ፣ «ማቄደኒያ ፒናዳ ኦና ማዳርኪ» ያጊሼ ኤቂዲ ዋሲሺን ቤዒስ።

10 ቆንጨጭሳ ኢ ቤዒዳፔ ጉዬ ኤሌሲዲ ኦኒ ማቄደኒያ ባናው ኮዪዳ። ሄሲካ፣ ዋንጌላ ያን ዳዒያ ኣሳስ ኦዶናው ያሳይ ኦና ጃጊዳይሳ ኤሪዳ ጊሾሳ።

ሊዲያ ኪሪስቶሳ ኣማናሱ

11 ዲሮዳፔ ዳንዲዲ ማርካቤን ጌሊዲ ሳሞቲራቄ ቢዳ፣ ዋንቲላ ጋላስ ናጹሌ ቢዳ።

12 ያፔ ዳንዲዲ ማቄደኒያ ቢታን ዳዒያ ፊልጲሲዩሳ ጊያ ኮይሮ ካታማ ቢዳ። ቃሲ ፊልጲሲዩሲ ሮሜ ኣሳይ ዳዒያ ካታማ። ኦኒ ሄ ካታማን ጉላ ጋላስ ኡቲዳ።

13 ሳሞታታ ጋላስ ካታማፔ ጋፃን ሻፋ ዶናን ኣይሁዴቲ ያሳ ዋሲያ ቤሲ ዳዒይሳ ኤሪዲ ያ ቢዳ። ሄ ቤሳን ሺቂዳ ማጨሳስ ቃላ ኦዲዳ።

14 ኦና ሲዒያ ኣሳፔ ኢሲ ሊዲያ ጌቲቲያ ቲያቲሮና ካታማፔ ዪዳ፣ ያሳ ኣማኒዳ ዘዖ ኣፊላ ዛልዒያ፣ ማጨሲያ ዳዒዉሱ። ጳውሎሲ ኦዳይሳ ኢያ ሲዒና ማላ ያሳይ ኢ ዋዛና ዶዪስ።

15 ሊዲያ ባ ሶ ኣሳራ ኢሲፌ ፃማቄቲዳፔ ጉዬ ኦኮ፣ «ሂንቲ ታና ሳዳ ቱማ ኣማናሱ ጊኮ ታ ሶ ዩቋቲ» ጋዳ ሚንሳዳ ዋሳሱ።

ጳውሎሲኔ ሲላሲ ቃሼቲዶሶና

16 ኑኒ ያሳ ዋሲያ ቤሳ ቢሺን ኢታ ኣያኒ ኢ ቦላ ዳዒዲ ካይሲያ ኢሲ ጌላዎ ኣይሌይ ኑራ ጋሄታሱ። ኢያ ካያዳ ዳር ሚሼ ባ ጎዳታሰ ኤሃወሱ።

17 ጳውሎሳኔ ኑና ካላዳ፣ «ሃይሳቲ ኡባፌ ቦላ ያሳ ኣይሌታ! ኤንቲ ሂንቲ ኣታና ኦጊያ ኦዳይሳታ» ጋዳ ዋሳሱ።

18 ኡባ ጋላሰ ሄሳዳ ጋወሱ። ሺን ጳውሎሲ ዪሎቲዲ ጉዬ ሲሚዲ፣ ሄ ኣያና፣ «ዬሱስ ኪሪሰቶሳ ሱንጻን ኢፔ ኬያ» ጊዲ ከቲሰ። ኢራካ ኢታ ኣያናይ ኢፔ ኬዪ ኣጊሰ።

19 ሺን ኢ ጎዳቲ ባንታው ሚሼ ዳሚያ ኦጊይ ጳዪዳይሳ ቤዒዲ፣ ጳውሎሳኔ ሲላሴ ኦይኪዲ፣ ዳባባ ዳይናታ ሲንጼ ጎቺ ኤፊደሶና።

20 ዳይናታ ሲንጼ ኤንታ ኤፊዲ፣ «ሃይሳቲ ኣይሁዳ ኣሲ ጊዲሹ ኑ ካታማ ኣሳ ዳር ዋይሶሶና።

21 ኑኒ ሮሜ ቢታ ኣሲ ጊዲሹ ኤካናወኔ ኦላናው ዋጋ ጊደናባ ታማርሶሶና» ያጊደሶና።

22 ኣሳይ ኢሲ ባጋ ጊዲዲ፣ ጳውሎሳ ቦላኔ ሲላሴ ቦላ ዳንዲደሶና። ዳይናቲ ኤንታ ማዑዋ ቃሪዲ ፃምዓን ኤንታ ሾጫና ማላ ከቲደሶና።

23 ኤንታ ዳር ዋዲዳፔ ጉዬ ቃሾ ኬላ ጌልሲደሶና። ቃሾ ኬላ ናጌይሲ ኤንታ ሚንጼ ናጋና ማላ ከቲደሶና።

24 ቃሾ ኬላ ናጌይሲ ሄ ከታ ኤኪዲ፣ ጳውሎሳኔ ሲላሴ ቃሾ ኬላሰ ቆልዓ ጌልሲሰ። ኤንታ ቶሁዋ ዲዒሰ

25 ሺን ጊዲ ቢላሄ ጊዲያ ዋዳ ጳውሎሳራኔ ሲላሴራ ዋሲሼኔ ማዘውሬ ዩዒሼ ያሳ ጋላቶሶና። ቃሾ ኬላን ዳዒያ ሃራ ኣሳቲካ ኤንቲ ጊያባ ሲያሶና።

26 ቆፖና ቃሾ ኬላ ባሶይ ቃፃና ጋካናው ቢታ ቃይይ ሃኒሰ። ሄ ሳቲንካ ፔንጌ ኡባይ ዶዬቲ ኣጊሰ፤ ቃሹቲዳ ኣሳ ኡባ ሳንጻላታይ ቢርሼቲ ዋዲሰ።

27 ቃሾ ኬላ ናጌይሲ ዲሰኮፌ ባርኪዳ ዋዳ ቃሾ ኬላ ፔንጌ ኡባይ ዶዬቲዳይሳ ቤዒዲ ቃሾ ኣሳይ ኬሲ ኤኪ ቢዳባ ዳኒን ባና ዋዳናው ማሼ ኤኪሰ።

28 ሺን ጳውሎሲ ቃላ ቶቁ ኦላዲ «ኑ ኡባይ ሃይሳን ዳዒያ ጊሾ ኔኒ ኔና ቆሆፓ» ያጊሰ።

29 ቃሾ ኬላ ናጌይሲ ያምፔ ዋሲ ኤኪዲ ኤሌሲዲ ጋላ ዋዒሰ። ኮኮሪሹ ጳውሎሳ ሲንጻኒኔ ሲላሴ ሲንጻን ጉፋኒሰ።

30 ኤንታ ካሬ ኬሲዲ፣ «ታ ጎዳቶ፣ ታኒ ኣታናው ኣይ ኦላናው ቤሲ?» ያጊሰ።

31 ጳውሎስ ስለሰራ ኢየሱስ፡ «ጎዳ ዩሱስ ኪሪስቶስ አማና፤ ኔራኔ ኔ ሶ አሳራ አታና» ያገደሰና።

32 ኤንቲ ኢየሱስ ኢየ ሶን ዳዊያ ኡባስ ጎዳ ቃላ ኦዲደሰና።

33 ቃማ ሄ ሳቴንካ ቃሾ ከፋ ናጌይሲ ኤንታ ኤፊዲ ኤንታ ማዲንፋ ማጠሰ። ኤሌሲዲ ባ ሶ አሳ ኡባራ ፃማቄቲስ።

34 ጳውሎስ ስለሰራ ባ ሶ ኤፊዲ ኤንታው ካሊ አሊስ። ኢ ባ ሶ አሳ ኡባራ ያሳ አማኒዳ ጊሾ ኡፋይቲስ።

35 ሳዊይ ዋንቲን ዳይናቲ፡ «ሄ አሳታ ቢላ» ያገዲ ፖሊሴ ሃላቃታ ኢየሱስ ከቲደሰና።

36 ቃሾ ከፋ ናጌይሲ፡ «ሂንቴ ቢሌታና ማላ ዳይናቲ ከቲደሰና። ሂዛ፡ ከዩዲ ሳር ቢቴ» ያገዲ ሄ ከታ ጳውሎስ ኦዲስ።

37 ሺን ጳውሎስ ሄ ፖሊሴ ሃላቃታኮ፡ «ኑኒ ሮማ አሲ * ጊዲሺን ኤንቲ ኑና ፐርዲ ባይና አሳ ሲንፋን ዋዲዲ፡ ቃሾ ከፋን ዩገደሰና። ሃዲ ኑና ጌማን ከዩዲ ሶ ጎና? ሃኔና፡ ኤንቲ ባንታ ሁዔን ዩዲ ኑና ከሶ» ያገሰ።

38 ፖሊሴ ሃላቃቲ ዳይናታስ ሃሳ ኦዲን፡ ጳውሎስ ስለሰራ ሮማ ቢታ አሲ ጊዲዳይሳ ሲዲዳ ዋዴ ያዩደሰና።

39 ሃሳ ጊሾ፡ ዳይናቲ ዩዲ ኤንታኮ፡ «ኑኒ ሂንቴና ቆሃዳ» ገደሰና። ቃሾ ከፋፊ ካሬ ኤንታ ከሲዲ፡ ካታማፔ ከዩዲ ባና ማላ ዋሲደሰና።

40 ጳውሎስ ስለሰራ ቃሾ ከፋፊ ከዩዲ ሊዲያ ሶ ቢደሰና። ያን አማኔይሳታራ ጋሄቲዲ ኤንታ ማንሐሊዲ ከዩዲ ቢደሰና።

17

ጳውሎስ ቴሴሎንቄን ታማርሲስ

1 ጳውሎስ ስለሰራ አምፊጶሊሳራ ኢጶሎኒያራ አዲዲ ቴሴሎንቄ ቢደሰና። ያን አይሁዴ ዋሳ ከሊ ዳዔስ።

2 ጳውሎስ ካሴይሳዳ ያ ጌሊስ። ያን ሄቹ ሳሚንታ ያሳ ቃላፔ አሳስ ኦዲስ።

3 ኪሪስቶስ ዋዬ ኤካናወኔ ሃይቆፔ ዴንዳናው ቤሴይሳ ኤንታው ቆንጩሲዲ ኦዲሼ፡ «ዩሱስ ሃ ታኒ ሂንቴው ኦዴይሲ ኪሪስቶስ» ያገሰ።

* 16:37 ሮማ አሲ፡ ጳውሎስ ሮማ አሲ ያገዲ ባና ያገደይ ሄ ዋዴ አይሁዴ ቢታ ሃሬይ ሮማ ካዋቱላ ጊዲዳ ጊሾሳ። ሄ ዋዴ ሮማ ቢታን ዳዊያ አሳይ ፐርዲ ባይና ጋራፊቶና።

4 ኤንታፌ ኢሶቲ ኢሶቲ ኦዳይ ቱማ ገዳይሳ ማዒዲ ጳውሎሳጊኔ ሲላሴራ ኢሲፊዶሶና። ሄሳዳካ፣ ያሳ ጎይኒያ ዳር ገሪኬ ኣሳይኔ ዳር ቦንቹቲዳ ማጫሳቲካ ኤንታራ ኢሲፊዶሶና።

5 ሺን ኣይሁዳቲ ቃናቲዲ ኢሲ ኢሲ ኦሶይ ባይና ኢታ ኣሳታ ኦጌፔ ሺሺዶሶና። ካታማን ቡቁላ ኬሲዶሶና፤ ጳውሎሳኔ ሲላሴ ኣሳሰ ኣላ ኢማናው ኮዪዲ ያሶና ኬሳ ቱቁዶሶና።

6 ጳውሎሳኔ ሲላሴ ኤንታው ቤንቶና ኢዲን፣ ያሶናኔ ኢሲ ኢሲ ኣማኔይሳታ ካታማ ሃላቃታኮ ጎቺ ኤፊዲ፣ «ሃይሳቲ ቢታ ኡባ ቡቁይሳቲ ሃዒ ኦኮ ዪዶሶና።

7 ያሶኒ ኤንታ ባ ሶን ዎሊሰ። ሃይሳቲ፣ «ዬሱሳ ገያ ሃራ ካዎይ ዴዴሰ» ገዲ ቁሳሬ ኪታ ማንሶሶና» ያገዲ ቶቁ ገዲ ቃላን ኦዲዶሶና።

8 ሺቁዳ ኣሳይኔ ካታማ ሃላቃቲ ሄሳ ሲዒዲ ሃናናባ ቆዪዶሶና።

9 ሃላቃቲ ያሶናኔ ሃራታ ዎሴን ቢርሺዶሶና።

ጳውሎሲ ቤሪያን ታማርሲስ

10 ኣማኔይሳቲ ጳውሎሳኔ ሲላሴ ቃማራ ቤሪያ ዬዲዶሶና። ቤሪያ ጋኪዲ፣ ኣይሁዳ ዎሳ ኬላ ጌሊዶሶና።

11 ቤሪያ ኣሳቲ ቴሴሎንቁ ኣሳታፔ ኣዲዳ ሱሬታ። ኤንቲ ቃላ ኩሚሳ ዎዛናፔ ኤኪዶሶና፤ ጳውሎሲ ገዳይሲ ቱማ ገዳይሳ ሻኪ ኤራናው ጋላሰ ጋላሰ ጌሻ ማፃፋታ ፃናዖሶና።

12 ሄሳ ገሾ፣ ኤንታፌ ዳርቲ፣ ገሪኬታፔካ ቦንቹቲዳ ዳር ማጫሳቲኔ ዳር ኣዳቲ ኣማኒዶሶና።

13 ሺን ቴሴሎንቁን ዳዒያ ኣይሁዳቲ ጳውሎሲ ያሳ ቃላ ቤሪያንካ ኦዲዳይሳ ሲዒዳ ዎዴ ቤሪያ ዪዲ ኣሳ ቡቁዶሶና።

14 ሃሳፌ ጉዬ፣ ኣማኔይሳቲ ኤሌሲዲ ጳውሎሳ ኣባ ማቲ ዬዲዶሶና። ሺን ሲላሴይኔ ዲሞቲዮሲ ቤሪያን ኣቲዶሶና።

15 ጳውሎሳ ሞይዚዳ ኣሳቲ ኣቴና ጋሊዶሶና። ሄ ኣሳቲ ሲላሴይኔ ዲሞቲዮሲ ባንታው ዳንዳዔቲዳ ሚላ ኤሌሲዲ ባኮ ያና ሚላ ጳውሎሲ ኪቲዳ ኪታ ኤኪዲ ቤሪያ ሲሚዶሶና።

ጳውሎሲ ኣቴና ቢስ

16 ጳውሎሲ ኣቴናን ሲላሴይኔ ዲሞቲዮሳ ናገሼ፣ ካታማን ኤቁ ኩሚዳይሳ ቤዒዲ ዪሎቲሰ።

17 ሄሳ ገሾ፣ ኣይሁዳ ዎሳ ኬላን ኣይሁዳታራኔ ያሳ ጎይኒያ ኣይሁዳ ገዶና ኣሳታራ ቃሲ ባራ ጋሄቲያ ኣሳታራ ኡባ ዎዴ ፓላሜሰ።

18 ኤጲቆርሳን ኢስቶይኬ ጌቴቲያ ጨጋታፔ ኢሲ ኢሲ ኤራንቸቲ ጳውሎሳራ ፓላሚዶሶና። ኤንታፊ ኢሶቲ ኢሶቲ፣ «ሃ ዮያማይ ኣይ ኦዳናው ኮዪ?» ያጊዶሶና።

ሃራቲ ጳውሎሲ ዬሱሳባን ሃይቆፔ ኢ ዴንዲዳይሳ ባንታው ኦዲዳ ጊሾ «ኦራላ ያሳታባ ኦዲያ ዳኔስ» ያጊዶሶና።

19 ጳውሎሳ ኦይኪዲ ኣርዮስፓጎሳ ጊያ ሺቆ ቤሳ ኤፊዲ፣ «ሃ ኔ ታማርሲያ ኦራላባይ ኣይቤኮ ኦና ኤሪሲኪ?»

20 ኣይስ ጊኮ፣ ኔ ኦስ ኦራላባ ኦዳሳ፤ ሂዛ ሄሲ ኣይቤኮ ኦኔ ኤራናው ኮዮስ» ያጊዶሶና።

21 ኣቴና ኣሳ ኡባይኔ ያን ዴዲያ ኢማላቲ ኦራላባ ኦዴቶናኔ ሲዶና ፔዖኮና።

22 ጳውሎሲ ኣርዮስፓጎሳን ሺቂዳ ኣሳ ሲንሳን ኤቂዲ፣ «ኣቴና ኣሳው፣ ሂንቲ ያሳታስ ኡባባን ዳሮ ያዬይሳ ታኒ ቤሳይስ።

23 ታኒ ሂንቲ ካታማራ ዩያሼ ሂንቲ ጎይኒያ ቤሳታ ቤዲያ ዎዴ (ኤራቶና ያሳስ) ጌቴቲ ያፌቲዳ ያርሾ ቤሳ ዴማስ። ሃ ሂንቲ ኤሮናሺን ጎይኒይሳ ታኒ ሂንቲው ኦዳይስ።

24 ሳባኔ ሳባን ዴዲያ ኡባባ ሜዲዳ ያሳይ፣ ሳሉዋኔ ሳባ ጎዳይ፣ ኣሲ ኬዲዳ ኬሳን ዴና።

25 ኢ ዴዖ፣ ሹዎፖኔ ኡባባ ኣሳ ኡባስ ኢሚያ ጊሾ ፓጩ ዴዲያ ኣሳዳ ኣሳ ማዴ ኮዬና።

26 ያሳይ ኣሳ ዜሬሌ ኡባ ኢሲ ኣዲያፌ ሜዲዲ ቢታ ኡባን ዎሊስ። ያቲዲ ኤንቲ ዴዳና ዎዲያሲኔ ቤሳስ ዛዋ ኢሚስ።

27 ኢ ሄሳ ኦሊዳይ ኣሲ ኢያ ኮያና ሜላኔ ፒልጊዲ ዴማና ሜላሳ። ሃኒኮካ ኢ ኦፔ ጌሚቤና።

28 ሂንቲፌ ኢሲ ኢሲ ዬዲይሳቲ፣ (ኦኒ ኢያ ናይታ) ጊዳይሳዳ፣ (ኦኒ ኢያን ፓዓ ዴዖስ፣ ቃዖስ።)

29 ሂዛ፣ ኦኒ ያሳ ናይታ ጊዲያ ጊሾ (ያሳይ ኣሳ ሂላቴላኒኔ ቆፋን ዎርቃፌ ዎይኮ ቢራፔ ዎይኮ ሹቻፌ ኦሴቲዳባ ዳኔስ) ያጊዲ ቆፓናው ቤሴና።

30 ሄሳ ጊሾ፣ ያሳይ ካሴ ዎዴ ኣሳይ ኤሮና ኦሊዳይሳ ኣጊዲ ኣዲስ፣ ሺን ሃዲ ኡባሶን ዴዲያ ኣሲ ኡባይ ናጋራፔ ሲማና ሜላ ኪቴስ።

31 ኣይስ ጊኮ፣ ያሳይ ባ ዶሪዳ ኣዲያን ሳባን ዴዲያ ኣሳ ኡባ ቦላ ዲሎ ፒርዳ ፒርዳናው ቃማ ጊጊሲ ዎሊስ። ኢያ ሃይቆፔ ዴንሊዲ ሄሳ ኣሳ ኡባስ ቱማዬስ» ያጊሲ።

32 ከንታፊ ኢሲ ኢሲ አሳቲ ሃይቆፔ ዳንደባ ጳውሎሳፔ ሲዒዲ፣ ኢያ ቦላ ቁልቁሲዶሶና። ሺን ሃራቲ፣ «ኑኒ ሄሳ ኔፔ ጉጂዲ ሲዓናው ኮዮስ» ያጊዶሶና።

33 ሄሳ ጊሾ፣ ጳውሎሲ ከንታ ጊዶፊ ከዪስ።

34 ሺን ኢሲ ኢሲ አዳቲ ጳውሎሳራ ጋሄቲዲ አማኒዶሶና። ከንታ ጊዶፊ አርዮስፓጎሳን ሺቁዋን ዳዒያ ዲዮናስዮሳ ጊያ አዳይ፣ ዳማርሶ ጊያ ኢሲ ማጫሲያኔ ሃራቲ ዳዶሶና።

18

ጳውሎሲ ቆርንቶሳ ቢስ

1 ሃሳፊ ጉዬ፣ ጳውሎሲ አቴናፔ ከዪዲ፣ ቆርንቶሳ ቢስ።

2 ያን አቁላ ጊያ ጳንዶሳን ዩሌቲዳ ኢሲ አይሁዳ አሲ ዳሚስ። አይሁዳ አሳ ኡባይ ሮሜፔ ከያና ሜላ ካዎይ ቃላዉዲዮሲ ከቲዳ ጊሾ ጉላ ዎዴፔ ካሴ ኢ ባ ማቼ ጲሪስቁላራ ፃሌፔ ዪስ። ጳውሎሲ ከንታራ ጋሄታናው ቢስ።

3 ኢያ ኦሶይ ከንታይሳዳ ዲንካኔ ሲኮ ጊዲያ ጊሾ ከንታራ ኡቲዲ ኢሲፊ ኦሊስ።

4 ጳውሎሲ ሳምባታ ኡባን አይሁዳታኔ ገሪኬታ አማንላናው አይሁዳ ዎሳ ኬላን ፓላሜስ።

5 ሲላሴይኔ ፃዎቲዮሲ ማቄዲያፔ ዪዳ ዎዴ ጳውሎሲ ባ ኩሜላ ዎዲያ ኢሚዲ አይሁዳታስ ዩሱሲ ኢ፣ ኪሪስቶሳ ጊዲ ቃላ ኦዲስ።

6 ሺን ከንቲ ጳውሎሳ ኢዲዲ ኢያ ጫዪን ጳውሎሲ ባ ማዑዋፔ ባና ቆቆፊሼ፣ «ሂንቲ ጎሜይ ሂንቲና አይኮ፤ ታኒ ሄሳን ዳዒኬ። ሂዛፔ ጉዬ፣ ታኒ አይሁዳ ጊዶና አሳኮ ባይስ» ያጊስ።

7 ያፔ ከዪዲ ያሳ ጎይኒያ ቲቶስ ዮስዶሳ ጊያ ኡራ ሶ ቢስ። ዮስዶሳ ኬላይ አይሁዳ ዎሳ ኬላ ማታን ዳዔስ።

8 አይሁዳ ዎሳ ኬላ ሃላቃይ ቃሪስጸሲ ባ ሶ አሳ ኡባራ ጎዳ አማኒስ። ቆርንቶሳ አሳታፔካ ዳርቲ ያሳ ቃላ ሲዒዳ ዎዴ አማኒዲ ፃማቄቲዶሶና።

9 ጎዳይ ኢሲ ቃማ ጳውሎሳስ ቆንጨዲ፣ «ያዮፋ፤ ኦዳ፣ ሲዒ ጎፓ።

10 ታኒ ኔራ ዳዒይስ። ታው ሃ ካታማን ዳር አሲ ዳዒያ ጊሾ ኔና ቆሂዲ ኢታባን ዩጋና አሲ አኒካ ባዋ» ያጊስ።

11 ሄሳ ጊሾ፣ ጳውሎሲ ያሳ ቃላ አሳ ታማርሲሼ ኢሲ ላይሊኔ ኡሱፑን አጌና ከንታራ ኡቲስ።

12 ጋሊዮሲ ኣካያ ቢታ ኣይሲያ ዎዴ ኣይሁዴቲ ኢሲፌ ጳውሎሳ ቦላ ዴንዲዲ ፐርዳ ኬሌ ኢያ ኤፊዲ፤

13 «ሃ ኣዴይ ሂጊያ ኢዲዲ፤ ኣሳይ ያሳ ጎይናና ማላ ኦሌስ» ያጊዶሶና።

14 ጳውሎሲ ሃሳያና ሃኒሺን፤ ጋሊዮሲ ኣይሁዴታኮ፤ «ኣይሁዴቶ፤ ሄሲ ኢታ ኦሶ ዎይኮ ናቆ ጊዲያኮ ታኒ ሂንቴባ ዲንዳዳ ሲዳናው ቤሴስ።

15 ሺን ቃላስ፤ ሱንጎሲኔ ሂንቴ ሂጊያስ ሂንቴ ፓላሚያባ ጊዲኮ ሂንቴ፤ ሂንቴው ቢሊቴ፤ ሄሳ ታኒ ፐርዲኬ» ያጊሲ።

16 ያቴዲ፤ ኤንታ ፐርዳ ኬላፊ ካሬ ኬሲስ።

17 ሄሳፊ ጉዬ፤ ገሪኬ ኣሳ ኡባይ ኣይሁዴ ዎሳ ኬላ ሃላቃ ሶስቴኒሳ ኦይኪዲ ፐርዳ ኬላ ሲንጎን ዎዲዶሶና። ሺን ጋሊዮሲ ሄሳ ፓፃባ ጊቤና።

ጳውሎሲ ኣንጾኪያ ቢስ

18 ጳውሎሲ ዳሮ ጋላስ ቆሮንቶሳን ኡቲዳፔ ጉዬ ኣማኒያ ኣሳ ሳርሊዲ፤ ጲሪስቂሊራኔ ኣቁላራ ማርካቤራ ሶሪያ ቢስ። ሺን ኢ ባናፔ ሲንሌ ባው ጋሶይ ዴዲያ ጊሾ ኪንኪሪያ ካታማን ባ ሁዲያ ቡሉሴቲስ።

19 ኤንቲ ኤፊሶና ጋኪዳ ዎዴ ጳውሎሲ ጲሪስቂሊኔ ኣቁላ ያን ኣጊስ። ሺን ባው ኣይሁዴ ዎሳ ኬሌ ጌሊዲ ኣይሁዴታራ ኦዴቲስ።

20 ኤንቲ ባንታራ ዳሮ ዎዴ ኡታና ማላ ጳውሎሳ ዎሲዶሶና ሺን ኢ ኢዲስ።

21 ኤንታፊ ሻኬቲሹ፤ «ታኒ ያ ባሊያ ዬሩሳላሜን ቦንቻናው ቤሴስ። ሺን ያሲ ጊኮ ሂንቴኮ ሲማዳ ያና» ያጊዲ ኤፊሶናፔ ማርካቤራ ቢስ።

22 ቂሳሪያ ጋኪዳ ዎዴ ዬሩሳላሜ ቢዲ ዎሳ ኬላ ኣሳ ሳርሊዳፔ ጉዬ ኣንጾኪያ ቢስ።

23 ያን ጉላ ዎዴ ጋምዲዳፔ ጉዬ ኣማኒያ ኣሳታ ኡባ ሚንሌሌሽ ጋላቲያራኔ ጲርጌራ ኣዲስ።

ኣጲሎሲ ኤፊሶናኒኔ ቆሮንቶሳን

24 ኢስኪንዲሪያን ዬሌቲዳ ኢሲ ኣጲሎሳ ጊያ ኣይሁዴ ኣሲ ኤፊሶና ቢስ። ኢ ኦዳ ኤሪያ ኣሲኔ ያሳ ቃላ ዳሮ ኤሪያ ኣሲ።

25 ኢ ጎዳ ኦጊያ ታማሪዲ፤ ኣያናን ፀጌቲዲ ዬሱሳባ ሱሬ ታማርሴስ። ጊዶሺን፤ ዮሃኒሳ ዊንቃቲያ ፃላላ ኤሬስ።

26 ኢ አይሁዴ ዋሳ ከጻገን ያዮና ታማርሱስ። ጲሪሰቂሊኔ አቁሊ ኢ ኦዴይሳ ሲዒዳ ዋዴ ኢያ ባንታራ ሶ ኤፊዲ ያሳ ኦጊያ ካሴይሳፊ ጌሺዲ ኢያው ኦዲዶሶና።

27 አጲሎሲ አካያ ባናው ኮዪን ኤፌሶናን ዴዒያ አማኒያ አሳይ ኢያ ቆፋ ኤኪዲ አካያን ዴዒያ አማኔይሳቲ ኢያ ሞካና ሜላ ኤንታው ዲብዲቤ ፃፊዶሶና። ኢ ያ ጋኪዳ ዋዴ ያሳ አቆ ከሃቴላ ባጋራ ዬሱስ ኪሪሰቶሳ አማኒዳይሳታ ዳሮ ማዲስ።

28 አይስ ገኮ፣ ዬሱሲ ኢ ኪሪሰቶሳ ጊዴይሳ አይሁዴታስ ያሳ ቃላፕ ቆንጨሲዲ ዴሪያ ሲንላን ሚንላ ኦዲዲ ኤንታ ላሊስ።

19

ጳውሎሲ ኤፌሶና ቢስ

1 አጲሎሲ ቆሮንቶሳን ዴዒሺን፣ ጳውሎሲ ቆሞ ባጋራ አቋዲ ኤፌሶና ቢስ። ያን ኢሲ ኢሲ አማኒያ አሳታ ዴሚስ።

2 ኤንታኮ፣ «ሂንቴ አማኒዳ ዋዴ ጌሻ አያና ኤኪዴቲ?» ያጊዲ ኦይቸስ።

ኤንቲ፣ «አካይ፣ ኤኪቦኮ፤ ሃሪ አቶሺን፣ ጌሻ አያኒ ዴዒያባካ ሲዒቦኮ» ያጊዶሶና።

3 ጳውሎሲ ኤንታኮ፣ «ያቲን፣ አይቢን ፃማቄቲዴቲ?» ያጊስ።

ኤንቲ፣ «ኦኒ ዮሃኒሳ ዊንቃቲያን ፃማቄቲዳ» ያጊዲ ዛሪዶሶና።

4 ጳውሎሲ፣ «ዮሃኒሲ ባፔ ጉዬራ ያ ዬሱስ ኪሪሰቶሳን አሳይ አማናና ሜላ አሳስ ኦዲሼ፣ ናጋራፔ ሲሞ ቤሲያ ዊንቃቲያን ፃማቄስ» ያጊስ።

5 ኤንቲ ሄሳ ሲዒዳ ዋዴ ጎዳ ዬሱስ ኪሪሰቶሳ ታማሬ ጊዳናው ፃማቄቲዶሶና።

6 ጳውሎሲ ባ ኩሺያ ኤንታ ቦላ ዋሊዳ ዋዴ ጌሻ አያኒ ኤንታ ቦላ ዋቋን፣ ዲማ ዲማ ዶናን ኦዴቲዶሶና፤ ቃሲ ቲንቢቲ ኦዲዶሶና።

7 ሄ ቤሳን ታማኔ ናሞዓ ጊዲያ አሳቲ ዴዶሶና።

8 ጳውሎሲ አይሁዴ ዋሳ ከጻ ጌሊዲ፣ ያሳ ካዎቲላባ ያዮና ፓላሚሼኔ ሎይሊ ቆንጨሲሼ ኤንታራ ሄሹ አጌና ጋካናው ጋሞሲስ።

9 ሺን ኤንታፊ ኢሶቲ ኢሶቲ ቆቤ ጊዲዲ ዳሮ አሳ ሲንላን ጎዳ ኦጊያ ጫዬዲ አማናና ኢዲዶሶና። ጳውሎሲ አማኔይሳታ

19:4 ማቶ 3:11፤ ማር 1:4፣ 7-8፤ ሉቃ 3:4፣ 16፤ ዮሃ 1:26-27

ኤንታፌ ሻኪ ኤኪዲ ዲራኖሳ ጊያ ቲሚርቲ ኩላን ኡባ ዋዴ ኤንታ ታማርሲስ።

10 ጳውሎሲ ናምዑ ላይሊ ጋካናው ቃላ ኦዲስ። ሄሳ ጊሾ፣ ኢሲያን ዴዒያ ኣሳ ኡባይ፣ ኣይሁዴቲኔ ኣይሁዴ ጊዶናይሳቲ ጎዳ ቃላ ሲዒዶሶና።

ፆሳይ ጳውሎሳ ኩሼን ኦሊዳ ማላታታ

11 ፆሳይ ጳውሎሳ ኩሼን ዋልቃማ ማላታታ ኦሊስ።

12 ሄሳ ጊሾ፣ ኣሳይ ኢያ ቦላ ቦቹዳ ማራቢያ ዋይኮ ማዑዋ ሃርጋንቸታስ ኤፎሶና። ኤንቲካ ፓዖሶና፤ ቱና ኣያናቲካ ኤንታፌ ኬዮሶና።

13 ቱና ኣያናታ ኬሲሼ ዩያ ኣይሁዴታፔ ኢሶቲ ኢሶቲ፣ «ጳውሎሲ ሳባኪያ ዩሱሳ ሱንላን ኬዩቲ ጊዲ ሂንቲና ኪቶስ» ያጊዲ፣ ቱና ኣያናቲ ኦይኪዳ ኣሳታ ቦላ ጎዳ ዩሱሳ ሱንላ ጭጊዶሶና

14 ካሂኔ ሃላቃ ኣሰቁዌ ጊያ ኢሲ ኣይሁዴ ኣዲያስ ሄሳ ኦሊያ ላፑን ናይቲ ዴዖሶና።

15 ሺን ቱና ኣያናይ ኤንታኮ፣ «ታኒ ዩሱሳካ ጳውሎሳካ ኤራይስ፣ ሺን ሂንቲ ኦናንቲ?» ያጊስ።

16 ቱና ኣያናይ ኦይኪዳ ኣዴይ ኤንታ ቦላ ጉፒ ዋዲዲ፣ ኤንታ ማዲንዲሲዲ፣ ሄ ኬላፌ ካሎ ባቃታና ጋካናው ዋልቃሚስ።

17 ኤፌሶናን ዴዒያ ኣይሁዴቲኔ ኣይሁዴ ጊዶናይሳቲ ኡባይ ሄሳ ሲዒዲ ዳር ያዩዶሶና። ጎዳ ዩሱሳ ሱንላይ ዳር ቦንቹቲስ።

18 ኣማኔይሳታፔ ዳርቲ ባንታ ኦሊዳ ኢታ ኦሱዋ ፓዲሼኔ ቆንጮን ኦዲሼ ዮሶና።

19 ቢቲይሳታፔ ዳርቲ ባንታ ማፃፋታ ሺሺዲ ኣሳ ኡባ ሲንላን ፀጊዶሶና። ሄ ማፃፋታ ጋቲያ ቆዳይ ኢሻታሙ ሙኩሉ ቢራ ሳንቲሚ * ጊዲስ።

20 ሄሳዳ ሃኒዲ ፆሳ ቃላይ ዲጩሼኔ ዳልጊሼ ቢስ።

ኤፌሶና ካታማን ኦሺ ዴንዲስ

21 ሄሲ ፖሌቲዳፔ ጉዬ ጳውሎሲ፣ «ታኒ ዩሩሳላሚ ባ ሲማዳ ሮሜካ ባናው ቤሴስ» ያጊዲ ማቁዶኒያራኔ ኣካያራ ኣዲዲ ዩሩሳላሚ ባናው ቆፋ ቃቸስ።

22 ቃሲ ባና ማዴይሳታፔ ናምዒታ ዲሞቲዮሳኔ ኤራሰዖሳ ማቁዶኒያ ኪቲዲ፣ ባው ኢሲያን ጉላ ዋዴ ጋምዒስ።

* 19:19 ቢራ ሳንቲሚ፡ ማቶሳ 26:15 ጻለቲ።

- 23 ሄ ዎዴ ጎዳ ኦጊያ ጊሾ ኤፌሶናን ዎልቃማ ካቺ ኬዩሰ።
- 24 ኢሲ ቢራ ኦሊያ ዲሜዲሮሳ ጊያ ኡሪይ ኦርጻሚሲ ኤቃ ኬላ ሚሲሊያ ቢራፔ ኦሊዲ ዳሮ ዎጄ ዴሜሰ።
- 25 ሄሳ ጊሾ፣ ሄሳ ማለ ኦሶ ኦሌይሳታ ኢሲፌ ሺሺዲ፣ «ኣሳው፣ ኦ ዲሬቴላይ ሃ ኦሱዋን ጊዴይሳ ሂንቴ ኤሬታ።
- 26 ሃይሲ ጳውሎሲ፣ ሳሳ ኩሺን ኦሴቴዳይሳቲ ያሳታ ጊደኮና) ያጊዲ፣ ኤፌሶናኒኔ ጉላ ቢታታፔ ኣቲን ኩሚላ ኢሲያ ኡባን ዴዲያ ዳሮ ኣሳ ኦዲ ኣማንሉዳይሳኔ ባሌሉዳይሳ ሂንቴ ቤዒዴታኔ ሲዒዴታ።
- 27 ማቶ ጊዲዳይ፣ ኦ ኦሶይ ካጄቴይሳ ፃላላ ጊደናሺን ኢሲያኒኔ ቢታ ኡባን ዴዲያ ኣሲ ጎይኒያ ጊታ ያሴ ኦርጻሚሲ ኬላይ ቦንቹቶና ኣቴይሳኔ ኢ ጊታቴላይካ ኩንዳናይሳ» ያጊሰ።
- 28 ኣሳይ ሄሳ ሲዒዳ ዎዴ ሽኔን ፀጌቴዲ፣ «ኤፌሶና ኦርጻሚሳ ጊታ» ያጊዲ ዋሲደሶና።
- 29 ሄ ዋሶይ ካታማ ኡባ ጋኪሰ። ጳውሎሳራ ሃሙቴያ ማቄደኒያ ኣሳታ፣ ጋዮሳኔ ኣርሰዲሮኮሳ ኦይኪዲ ጎቺሼ ካሳ ቤሳ ዎዲደሶና።
- 30 ጳውሎሲካ ኣሳይ ሺቁዳሱዋ ጌላናው ኮዩሰ፣ ሺን ኣማኔይሳቲ ኢያ ዲጊደሶና።
- 31 ኢሲያ ቢታ ሃላቃታፔ ጳውሎሳ ላጌ ጊዲዳ ኢሶቲ ኢሶቲ ጳውሎሳኮ ኪቴዲ፣ «ካሳ ቤሳ ቆንጮን ኬያዳ ቤንቶፋ» ጊዲ ኢያ ዎሲደሶና።
- 32 ሺቁዳ ኣሳሰ ሃናናባይ ጳይሰ፤ ዳሪያ ባጋ ኣሳይ ሃሪ ኣቶሺን ኣይሰ ሺቁዳኮ ኤሮና ጊሾ ኢሶይ ኢሲባሰ ዋሲያ ዎዴ ሃንኮይ ሃራባሰ ዋሴሰ።
- 33 ኣይሁዳቲ ኢስኪንዲሬ ጊያ ኣዲያ ኣሉ ቤሲን፣ ኢሲ ኢሲ ኣሳይ ኢ ጋናባ ኦዲዲ ኢያ ሲንሌ ኣሉደሶና። ኢ ኣሳይ ሲዒ ጋና ማለ ባ ኩሺያን ማሊ ቤሲዲ፣ ኣሳሰ ሞቴታናው ኤቁሰ።
- 34 ሺን ኢስኪንዲሬይ ኣይሁዳ ኣሲ ጊዲዳይሳ ኣሳይ ኤሪዳ ዎዴ ናሞው ሳቴ ጊዳናይሳ ማለ ኡባይ ኢሲ ቃላን፣ «ኤፌሶና ኦርጻሚሳ ጊታ» ያጊዲ ዋሲደሶና።
- 35 ወርሴላን ካታማ ፃፊይ ኣሳ ሲዒ ኦሊዲ፣ «ኤፌሶና ኣሳው! ኤፌሶና ካታማይ ጊታ ኦርጻሚሲ ኤቃ ኬላኔ ሳሎፔ ዎጄዳ፣ ኢ ሹቻ ሚሲሊያ ናጌይሳ ጊዴይሳ ኤሮና ኣሲ ባዎ።
- 36 ሃይሳ ካሺ ጊያ ኣሲ ባይና ጊሾ ሂንቴ ሲዒ ጋናዉኔ ዲርጊዲ ኣይኮ ኦላና ኣጋናው ቤሴሰ።
- 37 ሂንቴ ሃ ኣሳታ፣ ኤቃ ኬላ ሚሽ ካይሶቲቦናይሳታኔ ኦ ያሳታ ጫይቦናይሳታ ኤሂዴታ።

38 ሄሳ ገሾ፣ ዲሜዲሮሲኔ ኢያራ ዳዲያ ኦሳንቸቲ ኣሳ ሞታናው ኮይኮ፣ ፐርዳ ኮላይ ደያ ዳዴሰ፤ ዳይናቲካ ዳዎሶና፤ ኤንቲ ሞታናው ዳንዳዎሶና።

39 ሺን ሂንቲ ሃራ ኦዳ ኮይኮ፣ ሻንጎ ሺቆን ኦዳይ ቤዔቶ።

40 ሄሳ ገደና ኢዲኮ ሃቺ ሃኒዳባሰ ሮሜ ካዎቲላይ ኦና ኦይቻና። ሃ ቡቁላሰ ጋሶይ ባይና ገሾ ኮኒ ጋሶ ኦዳናው ዳንዳዎኮ»

41 ያገዲ ሺቁዋ ላሊሰ።

20

ጳውሎሲ ማቄዲያኔ ገሪኬ ቢሰ

1 ዋሶይ ዳጩዳፔ ጉዬ ጳውሎሲ ኣማኒያ ኣሳታ ያገሲዲ ኤንታ ዘሪዳፔ ጉዬ ሳርሊዲ ማቄዲያ ባናው ኬዩሰ።

2 ኢ ኣጲያ ቢታታን ዳዲያ ኣማኒያ ኣሳ ቃላ ኦዲዲ ሚንሌዳፔ ጉዬ ገሪኬ ቢታ ቢሰ።

3 ኢ ያን ሄቭ ኣጌና ኡቲዲ፣ ማርካቤራ ሶሪያ ባናው ቆፒዲ ዳዲሺን፣ ኣይሁዳቲ ባና ዎቆናው ኮይይሳ ኤሪዲ ማቄዲያሪ ጉዬ ሰማናው ኮይሰ።

4 ጳውሎሳ ሞይዚዳይሳቲ ቤሪያፔ ጳርሁሳ ናዓ ሶጳዊሮሳ፣ ቲሴሎንቄሬ ኣርሰዊሮኮሳኔ ሲኮንዲሳ፣ ዳርቤሬ ጋዮሳ፣ ኢሲያፔ ቲኪቆሳ፣ ዊሪሬሞሳኔ ዊሞቲዮሳ።

5 ሄሳቲ ሲንሌ ቢዲ ኦና ዊሮዓዳን ናሳሶና።

6 ኮኒ ኡይላ ባሊያ ቦንቺዳፔ ጉዬ ፊልጲሲዩሳፔ ማርካቤራ ዳንዲዲ፣ ኢቻሻንሶ ጋላሳን ኤንታ ዊሮዓዳን ጋኪዲ ያን ላፑን ጋላሰ ጋምዒዳ።

ጳውሎሲ ዊሮዓዳን

7 ሳሚንታሬ ኮይሮ ጋላሳን ኮኒ ኡይላ ማንላናው ሺቁዲ ዳዲሺን፣ ጳውሎሲ ዎንቴሌ ባናው ቆፒዳ ገሾ ኤንታው ቃላ ኦዲሺ ገዲ ቢላሂ ጋካናው ኦዳ ኣዲሲሰ።

8 ኮኒ ሺቁዲ ኡቲዳ ፖቂያን ዳሮ ፖይይ ዳዴሰ።

9 ኤወዊኮሳ ገያ ኢሲ ናዓቲላይ ማሰኮቲ ቦላ ኡቲዲ፣ ባና ደገዲ ጲሰኪሰ። ጳውሎሲ ኦዳ ኣዲሲዳ ዎዴ ኤወዊኮሲ ጲሰኮ ኤዩዲ ሄቭንሶ ፖቂያፔ ኩንዲዲ ሃይቁዳይሳ ኣሳይ ዳንሊሰ።

10 ሺን ጳውሎሲ ዎጲዲ፣ ኢያ ቦላ ጉፋኒሰ። ኢያ ኢዲሚዲ፣ «ኢ ሃይቁቤና፣ ሂርጎፊቲ» ያገሰ።

11 ሄሳሬ ጉዬ፣ ፑዴ ፖቂያ ቦላ ኬዩዲ ኡይላ ማንሊዲ ሚሰ። ሳዲ ዎንታና ጋካናው ኣሳሰ ኦዲዳፔ ጉዬ ዳንዲዲ ቢሰ።

12 ሄ ፓዊዳ ናቴላ ሶ ኤፊዲ ዳሮ ኡፋይቲዶሶና።

ጳውሎሲ ዲዮናዶስ ሚሊዳ ቢስ

13 ሺን ጳውሎሲ ባና ያፔ ሞካና ማላ ኮስ ኦዲዳ ጊሾ ካሴቲዲ ማርካቢያኮ ቢዲ፣ አሶሳ ባናው ዳንዲዳ። አይስ ጊኮ፣ ኢ ቶሆን ባናው ቆፒዳ ጊሾ ኦና ሄሳፉ ከቲስ።

14 ኢ ኦራ አሶሳን ጋሄቲን ማርካቢያን ኢያ ኤኪዲ ሚዳሊኔ ቢዲ።

15 ዋንቴላ ጋላስ ያፔ ዳንዲዲ ማርካቤራ ከዮሳ ሲንፍን ዳዲያ ቤሳ ጋኪዳ፤ ቃሲ ዋንቴላ ጋላስ ሳሞሳ ፒኒዲ ካሊያ ጋላስ ሚሊዳ ጋኪዳ።

16 ጳውሎሲ ኢሲያን ዳር ጋሞዖና ኤፌሶና ማታራ አጳናው ቆፒስ። ባው ዳንዲዳቲኮ ጳንዩቆስዩ ባሊያ ጋላስ ዩሩሳላሜ ጋካናው ኤሶቴስ።

ጳውሎሲ ኤፌሶና ጨማታ ዞሪስ

17 ጳውሎሲ ሚሊዳፔ ኤፌሶና ከቲዲ ዋሳ ኬላ ጨማታ ዩጊሲስ።

18 ዋሳ ኬላ ጨማቲ ኢያኮ ዪን፣ ኤንታኮ ሃይሳዳ ያጊስ፡ «ታኒ ኢሲያ ጌሊዳ ኮይር ጋላሳፔ ዶሚዳ ሂንቴራ ዳዲዳ ዋዴ ኡባን ዋና ዳዲዳኮ ሂንቴ ኤሬታ።

19 አይሁዳቲ ዲላቲዲ ታ ቦላ ሜቶ ጋሊኮካ ታኒ አሽኬቴላኒኔ ዳር አፋላን ጎዳስ አላስ።

20 ዳባባንካ ሂንቴ ኬላን ኬላን ሂንቴና ታማርሲሼ ሂንቴና ማዲያባፔ ኢሲባካ ፓጨሳቢኬ።

21 ታኒ አይሁዳታሲኔ አይሁዳ ጊዶናይሳታስ ናጋራፔ ያሳኮ ሲማና ማላኔ ኦ ጎዳ ዩሱሳ አማናና ማላ ማርካታስ።

22 «ያን ታና አይቢ ጋካኔኮ ኤሪኬ፣ ሺን ሃዲ ታኒ ጌሻ አያናስ ከቲታዳ ዩሩሳላሜ ባይስ።

23 ጌሻ አያናይ ቃሾይኔ ዋዬይ ታና ናጌይሳ ካታማ ኡባን ታው ማርካቲስ።

24 ሺን ታ ዋላ ፖላናዉኔ ጎዳ ዩሱስ ከሪስቶሳፔ ኤኪዳ ኦሱዋ፣ ያሳ አጼ ኬሃቴላ ዋንጌላ ማርካቴይሳ ፖላናው ታ ሼምፒው ፓላናባዳ ቆዳይስ።

25 «ታኒ ሃዲካ ያሳ ካዋቴላ ማርካታሼ ሂንቴ ኡባ ጊዶን ዩያስ፡ ሂዛፔ ጉዬ ሂንቴፌ ኦኒካ ታና ቤዖናይሳ ኤራይስ።

26 ሃሳ ጊሾ፣ ሂንቴፌ ኢሲ ኡራይ ጳዩኮካ ታ ኦይሼቶናይሳ ሃቺ ሂንቴው ጌሻዳ ኦዳይስ።

27 አይስ ጊኮ፡ ያሳይ ኦላናው ቆፒዳባ ኡባ ሂንቲው አይቢባካ አሾና ኦዳስ።

28 «ባ ናባ ሱላን ዋዚዳ ያሳ ዋሳ ኬላ ናጊቲ። ጌሻ አያናይ ሂንቲና ሃላቃ ኦሊዲ ደሪዳ ዉዲያሲኔ ሂንቲ ሁዒያሰ ናጊቲቲ።

29 ታኒ ቢዳፔ ጉዬ፡ ዉዲያሰ ቃጴቶና ኢታ ሱጵሜቲ ሂንቲ ጊዳ ጌላናይሳ ታ ኤራይስ።

30 አማኔይሳታ ባንታ ጌዶ ካሌላናው ዋርዶ ታማርሲያ አሳቲ ሂንቲ ጊዳፌ ዴንዳና።

31 ሄሳ ጊሾ፡ ታኒ ሄዙ ላይሊ ቃማኔ ጋላስ አፋላን ሂንቲና ሁዒን ሁዒን ሚንሌሊዳይሳ ቆፒሼ ናጊቲቲ።

32 «ሃዒካ ሂንቲና ሚንላናውኔ ጌሻ አሳራ ላቲሳናው ዳንዳዒያ ያሳሲኔ ኢያ አጼ ከሃቴላ ቃላስ ሂንቲና ሃዳራ ኢማይስ።

33 «ታኒ ኦፔካ ቢራ ዋይኮ ዋርቃ ዋይኮ አፊላ አዋታቢኬ።

34 ታኒ ታ ኩሼን አላዳ ታናኔ ታራ ዴዒይሳታ ኮሺዳባ ማዲዳይሳ ሂንቲ፡ ሂንቲ ሁዒን ኤሬታ።

35 ሂንቲ ሃይሳዳ ዳቡሪዲ ኦሊሼ ዳቡራንቾታ ማዳናይሳኔ ጎዳ ዬሱሲ፡ «ኤኬይሳፌ ኢማይሲ አንጃቲዳይሳ» ጊዳ ቃላ ሂንቲ ቆፓናው ቤሴይሳ ታኒ ሂንቲና ኡባባን ቤሳስ» ያገሰ።

36 ጳዉሎሲ ሄሳ ኦዲ ኦንጊዲ ኤንታ ኡባራ ጉልባቲዲ ያሳ ዋሲስ።

37 ኤንቲ ኡባይካ ጳዉሎሳ ኢዲሚዲ ዬኪዲ ዬሪዶሶና።

38 ኢ ዛሪዲ፡ «ታና ቤዒኬታ» ያገዲ ቃላይ ኤንታ ዳር አዛንሊስ። ኤንቲ ማርካቢያ ጋካናው ኢያ ዋይዚዶሶና።

21

ጳዉሎሲ ዬሩሳሌሜ ቢስ

1 ኦኒ ኤፌሶና ጨማታፔ ሻኬቲዳ ሜላ ቆሴ ቢዳ። ዋንቲላ ጋላስ ሮዳ ጋኪዲ ያፔ ጳፃራ ቢዳ።

2 ሲሮፊንቄ ፒኒያ ማርካቤ ዴሚዲ ኢያን ጌሊዲ ባናው ዴንዲዳ።

3 ኦኒ ቆጲሮሳ ቤዓናው ዳንዳዒያ ሶ ዩዲ፡ ቆጲሮሳ ሃዲሮሳ ባጋ አገዲ ሶሪያ ቢዳ። ማርካቤይ ባ ጫና ያን ዋላናው ኮዩዳ ጊሾ ፃሮሳ ቢዳ።

4 ያን አማኒያ አሳታ ዴሚዲ ኤንታራ ላፑን ጋላስ ኡቲዳ። ጳዉሎሲ ዬሩሳሌሜ ቦና ሜላ ኤንቲ ኢያው አያናን ኦዲዶሶና።

5 ኑኒ ኤንታራ ኡቲያ ዎዴይ ዉሪን ከዪዲ ቢዳ። ኤንቲ ኡባይ ባንታ ማጫሳታሪኔ ባንታ ናይታራ ኢሲፌ ካታማፔ ካሬ ከሲዲ ኑና ሞይዚዶሶና። ኑኒ ኣባ ዶናን ጉልባቲዲ ያሳ ዎሲዳ።

6 ሄሳፌ ጉዬ፣ ዎሊ ሳርሒዲ ኑ ማርካቢያን ጌሊዳ፤ ኤንቲ ባንታ ሶ ሰሚዶሶና።

7 ኑኒ ኣባ ኦጊያ ኦንጊዲ፣ ሂሮሳፔ ጳጳሌማይሳ ጋኪዳ። ያን ኣማኒያ ኣሳታ ሳርሒዲ፣ ኤንታ ማታን ኢሲ ጋላስ ፔዒዳ።

8 ዎንቴላ ጋላስ ከዪዲ፣ ቁሳሪያ ቢዳ። ሳባኪያ ፊልጶሳ ሶ ጋኪዲ ኢያ ማታን ኡቲዳ። ኢ ዬሩሳላሜን ካሴ ዶሬቲዳ ላፑናታፔ ኢሱዋ።

9 ፊልጶሳሳ ናቤ ጊዲዳ ኦይዲ ጌላዎ ናይቲ ዴዎሶና።

10 ኑኒ ኡንዴና ጋላስ ያን ኡቲዲ ዴዒሺን ኣጋቦሳ ጊያ ናቤይ ዪሁዳፔ ቁሳሪያ ዪሱ።

11 ኑኮ ዪዲ ጳዉሎሳ ሳቂያ ኤኪዲ ባ ኩሺያኔ ባ ቶሁዎ ቃቺዲ፣ «ጌሻ ኣያናይ ሃ ሳቂያ ጎዳ፣ ዬሩሳላሜን ኣይሁዴቲ ሃይሳዳ ቃቺዲ፣ ኣይሁዴ ጊዶና ኣሳስ ኣሒዲ ኢማና ያጌስ» ያጌስ።

12 ኑኒ ሄሳ ሲዒዳ ዎዴ ኑኔ ያን ዴዒያ ኣሳቲ ጳዉሎሲ ዬሩሳላሜ ቦና ሜላ ዎሲዳ።

13 ሺን ጳዉሎሲ ዛሪዲ፣ «ሂንቴ ሃይሳዳ ዬኪሼ ኣይስ ታ ዎዛና ሹጊሴቲ? ታኒ፣ ጎዳ ዬሱሳ ሱንጎ ጊሾ ቃሹቴላ ፃላላ ጊዶናሺን ዬሩሳላሜን ሃይቃናዉካ ጊጌታስ» ያጌስ።

14 ኑ ዞሪያ ኢ ኤኮና ኢዲን፣ «ጎዳ ሸኔይ ሃና» ያጊዲ ሲዒ ጊዳ።

15 ያን ጉላ ዎዴ ጋሞዒዳፔ ጉዬ ጊጌቲዲ ዬሩሳላሜ ባናው ከዪዳ።

16 ቁሳሪያን ዴዒያ ኣማኒያ ኣሳታፔ ጉላቲ ኑራ ቢዶሶና። ኤንቲ ኑኒ ሸምፓናሱዋ ሚናሶና ጊያ ቆጶሪሳ ኣዲያ ሶ ኤፊዶሶና። ሚናሶኒ ኮይሮ ኣማኒዳ ኣሳፔ ኢሱዋ።

ጳዉሎሲ ዬሩሳላሜ ጋኪሰ

17 ኑኒ ዬሩሳላሜ ጋኪዳ ዎዴ ኣማኒያ ኣሳቲ ኑና ኡፋይሳን ሞኪዶሶና።

18 ዎንቴላ ጋላስ ጳዉሎሲኔ ኑኒ ያይቆባራ ጋሂታናው ቢዳ። ዎሳ ከላ ጨማቲ ኡባቲካ ያን ዴዎሶና።

19 ጳዉሎሲ ኤንታ ሳርሒዳፔ ጉዬ ኣይሁዴ ጊዶና ኣሳ ጊዶን ባ ባጋራ ያሳይ ኦሒዳባ ኡባ ኤንታው ኑዲሰ።

20 ኤንቲ ሄሳ ሲዲዳ ዋዴ ያሳ ጋላቲዲ ጳውሎሳኮ ሃይሳዳ ያገደሶና፡ «ኑ ኢሻው፡ አይሁዳታ ጊደን አፑን ሙኩላቲ ያሳ አማኒዳኮ ኔ በዓሳ፤ ኤንቲ ኡባይካ ሂጊያ ሚንሏ ናሳሶና።

21 ኔኒ አይሁዳ ጊደናይሳታ ቢታን ዴዲያ አይሁዳ ኡባይ ባንታ ናይታ ቃፃሮና ሜላ፡ አይሁዳታ ዋጋ ካሎና ሜላኔ ሙሴ ሂጊያ ኢፃና ሜላ ኔኒ ታማርሴይሳ ዬሩሳላሜን ዴዲያ አይሁዳቲ ሲዲደሶና።

22 ያቲን አይቢ ሎዎ? ኔኒ ዬዳይሳ ዳሮቲ ሲዓና።

23 «ሄሳ ጊሹ፡ ኑኒ ኔው ኦዴይሳ ሲዓ፤ ጋሶይ ዴዲያ ኦይዱ አሳቲ ኑ ማታን ዴደሶና።

24 ኤንታ ኤካዳ ኤንታራ ጌያ፤ ቃሲ ኤንቲ ባንታ ሁዲያ ሜዳታና ሜላ ኤንታው ሚሼ ኢማ። ኤንቲ ካሴ ኔባ ሲዲዳይሲ ቱማ ጊደናይሳኔ ኔኒ ኔ ሁዴንካ ሂጌ ናጊያ አሲ ጊዴይሳ ኡባይ ኤራና።

25 «ሺን አማኒዳ አይሁዳ ጊደና አሳታ ጊዲኮ፡ ኤንቲ ኤቃሰ ያርሹቲዳባ ዋና ሜላ፡ ሱሉ ኡዮና ሜላ፡ ባወታ ዋና ሜላኔ ላይማቶና ሜላ፡ ኑኒ ኦዳ ቃቺዲ፡ ኤንታው ዳብዳቤ ፃፊዳ» ያገደሶና።

26 ሄሳፌ ጉዬ፡ ጳውሎሲ ዋንቱላ ጋላሰ አሳታ ኤኪዲ፡ ኤንታራ ጌዩሰ። ኢ ባንታ ጌያ ጋላሳይ አዉዴ ፖሌቲያኮ ኤሪሳናዉኔ ባንታ ያርሹዋ አዉዴ ያርሻኔኮ ኤሪሳናው ያሳ ኬሌ ጌሊሰ።

ጳውሎሲ ኦይኬቲሰ

27 ላፑን ጋላሳይ ዉራና ሃኒሺን፡ ኢሲያፔ ዬዳ አይሁዳቲ ያሳ ኬላን ጳውሎሳ በዲዲ፡ አሳ ኡባ ዴንሌሌዲ ጳውሎሳ ኦይኪደሶና።

28 «ኢሰራዔሌ አሳው፡ ኑና ማዲቲ፤ ሃ ኡራይ፡ ኑ ዴሪያ፡ ኑ ሂጊያኔ ሃ ያሳ ኬላ ኢፃና ሜላ አሳ ኡባ ታማርሴሰ። ሄሲካ ጊደና ኢፃን አይሁዳ ጊደናይሳታ ያሳ ኬሌ ጌልሲዲ፡ ሃ ጌሻ በሳ ቱኒሲሰ» ያገደሶና።

29 ኤንቲ ሄሳ ጊዳይ ካሴ ኤፌሶና ፃሮፊዋሳ ጳውሎሳራ ካታማን በዲዳ ጊሹ ሃዲ ጳውሎሲ ያሳ ኬሌ ኢያ ኤኪ ጌሊዳባ ኤንታው ዳኒሰ።

30 ካታማ ኡባይ ቡቄቲሰ፤ አሳ ኡባይ ሺቂዲ ጳውሎሳ ኦይኪዲ ያሳ ኬላፌ ካሬ ጎቺደሶና። ያሳ ኬላ ፔንጌቲ ኤሌሲዲ ጎርዴቲደሶና።

31 አሳይ ጳውሎስ ዋዳና ሃኒሺን፡ «ዬሩሳሌም ካታማይ ኩሜሌ ቡቁቲስ» ገያ ኦዳይ ሮሜ ሻላቃኮ ጋኪስ።

32 ሻላቃይ ዋታዳሬታኔ ማቶ ሃላቃታ ኤኪዲ ዋደሽ ዪስ። አሳይ ሻላቃኔ ዋታዳሬታ ቤዒዳ ዋደ ጳውሎስ ዋደይሳ አጋገደሶና።

33 ሄ ዋደ ሻላቃይ ሸቂዲ፣ ጳውሎስ ኦይኪዲ፣ ናሞዑ ሳንላላታን ቃሼታና ሜላ ከቲስ። ያቲዲ፣ ኢ ኦኮኮኔ አይ ኦሊዳኮ አሳ ኦይቺስ።

34 አሳፔ ባጋይ ኢሲባ ገዲ ዋሲያ ዋደ ሃራቲ ሃራባ ገዲ ዋሴስ። ዋሶይ ዳሪዳ ገሾ ሻላቃይ ቱማ ሻካንው ዳንዳዔቶና ኢዲን፣ ዋታዳሬቲ ጳውሎስ ባንታ ዳዒያሶ ኤፋና ሜላ ከቲስ።

35 ጳውሎሲ ዬዲ ኬያ ዳላ ጋኪያ ዋደ አሳ ሱጌላ ገሾ ዋታዳሬቲ ኢያ ቶኪደሶና።

36 ዳሮ አሳይ፡ «ኢ ሃይቆ!» ያገዲ ዋሲሼ ካሎሶና።

ጳውሎሲ ሞቱዋሰ ዛሮ ኢሚስ

37 ዋታዳሬቲ ጳውሎስ ባንታ ዳዒያሶዋ ጌልሳና ሃኒሺን፣ ጳውሎሲ ሻላቃኮ፡ «ታኒ ኔው ኢሲባ ኦደ?» ያገሰ።

ኢ ጳውሎስ፡ «ኔኒ ገሪኬ ደና ኤራይ?»

38 ኔኒ ሃይሳፌ ሲንጤ ቡቁሌ ሜዲዲ ሸምፖ ዋዲዳ ኦይዲ ሙኩሉ አሳታ ኤኪዲ ባዞ ጌሊዳ ገብጻ ኡራ ገዲኪ?» ያገሰ።

39 ሺን ጳውሎሲ፡ «ታኒ፣ ከልቂያን ዳዒያ ኤሬቲዳ ቱርሴሴ ካታማን ዬሌቲዳ አይሁዳ አሲ። ሃያና ታና ኦዲሳርኪ?» ያገሰ።

40 ሻላቃይ ኢያኮ፡ «ኦዳ» ያገሰ ጳውሎሲ ዳላ ቦላ ኤቂዲ፣ አሳይ ሲዒ ጋና ሜላ ባ ኩሺያን ማሊስ። አሳይ ሲዒ ገን ኢብራይስጫ ደናን ሃይሳዳ ያገሰ።

22

1 «ታ ኢሻቶ፣ ታ አዋቶ፣ ታኒ ሃዒ ሃንቴው ኢሚያ ዛሩዋ ሲዒቱ።»

2 ጳውሎሲ ኤንታው ኢብራይስጫ ደናን ኦዳይሳ ሲዒዲ ካሴይሳፌ አሊዲ ሲዒ ገደሶና። ኢ ካሊዲ፣

3 «ታኒ ከልቂያን ዳዒያ ቱርሴሴን ዬሌታዳ ሃ ካታማን ዲጫስ። ታ አሰታማሬይካ ጋማሊያሌ፣ ታኒ ኑ አዋታ ሂጊያ ሚንላ ታማሪዳ፣ ሃቺ ሃንቴ ኡባይ ሃኔይሳዳ ያሳሰ ሚሼቲያ አይሁዳ አሲ።

22:3 ሃ.ኦ 5:34-39

4 ታኒ ሃ ኦጊያ ካሊያ ማጫታኔ አዳታ ኦይካዳ ቃሾ ኬላን ጌጋሽን ኤንታ ዋዲሳና ጋካናው ዋዬ ቤሲዳ አሲ።

5 ሃሳዳካ፣ ካሂኔ ሃላቃይኔ ሻንጎ ኡባይ ታባ ማርካታናው ዳንዳዔስ። ታኒ ዳማስቆን ዳዒያ ኤንታ ኢሻታስ ኤንታፌ ዳብዳቤ ኤካዳ ያን ዳዒያ አሳቲ ቃሹቲዲ ሴሬታና ሜላ ዬሩሳላሜ ኤንታ ኤሃናው ያ ባስ።

6 «ታኒ ባዳ ዳማስቆ ማቲዳ ዋዴ ሴታ ጋላስ ቆፖና ሳሎፔ ጌታ ፖያይ ታ ዩሹዋን ፖሲስ።

7 ታኒ ሳዓን ኩንዳ ዳዒሺን፣ (ሳያላ፣ ሳያላ፣ ታና አይስ ጎዳይ?) ጌያ ቃላ ሲዓስ።

8 ታኒ ዛራዳ፣ (ጎዳው፣ ኔኒ ኦኔ?) ያጋስ።
ኢ ዛራዳ፣ (ታኒ፣ ኔኒ ጎዲያ ናዚሬቲ ዬሱሳ) ያጌስ።

9 ታራ ዳዔይሳቲ ፖዑዋ ቤዒዶሶናፔ ኦቲን ታው ኦዳይሳ ቃላ አኬኪቦኮና።

10 «ታኒ፣ (ጎዳው፣ ታ አይ ኦሉ?) ያጋስ።
«ጎዳይ ታኮ፣ (ዳንዳዳ ዳማስቆ ባ። ኔኒ ኦላና ሜላ ያሳይ ቆፒዳባ ኡባይ ያን ኔው ኦዳታና) ያጌስ።

11 ሄ ዋልቃማ ፖዑዋ ጋሶን ታ አይፌይ ቆቂን፣ ታራ ዳዒያ አሳቲ ታ ኩሺያ ኦይኪዲ፣ ታና ጎቺን ዳማስቆ ጋካስ።

12 «ዳማስቆን ዳዒያ አይሁዴ ኡባይ ዳሮ ቦንቺያ ኢሲ ሃናኒያ ጌያ አዳይ፣ ኑ ሂጊያ ቦንቺይሲኔ ያሳ ሚንሱ ዋሴይሲ ዳዔስ።

13 ሃናኔይ ታኮ ዩዲ፣ ታ ማታን ኤቂዲ፣ (ታ ኢሻው ሳያላ፣ ያላ) ያጌስ። ኤሌሳዳ ታኒ ኢያ ያላ አጋስ።

14 «ኢ ታኮ፣ (ኑ አዋታ ያሳይ ኔኒ ኢያ ሽኒያ ኤራና ሜላ፣ ኢያ ያሎ ናዓ ቤዓና ሜላኔ ኢያ ዶናፔ ቃላ ሲዓና ሜላ ካሴቲዲ ኔና ዶሪስ።

15 ኔኒ ቤዒዳባኔ ሲዒዳባ አሳ ኡባ ሲንላን ኢያው ማርካታና።

16 ሃዒ አይስ ጋምዓይ? ዳንዳዳ ፃማቂታ፤ ኢያ ሱንሳ ያጋዳ ኔ ናጋራፔ ሜጩታ) ያጌስ።

17 «ታኒ ጉዬ ዬሩሳላሜ ሲማዳ ያሳ ኬላን ዋሲሺን፣ ታው ቆንጩሳ ቤንቲስ።

18 ቆንጩላን ጎዳይ ታኮ፣ (ኔ ታው ማርካቲያ ማርካቴላ አሳይ ኤኮና ጊሾ ኤሌሳዳ ዬሩሳላሜፔ ኬያ) ያጌሺን ቤዓስ።

19 «ታኒ፣ (ጎዳው፣ አይሁዴ ዋሳ ኬላ ኡባን ኔና አማኔይሳታ ኦይካዳ ዋዲዳይሳኔ ቃሾ ኬላን ዬጊዳይሳ ኤንቲ ኤሮሶና።

20 ኤንቲ ኔ ማርካ ኢስጻፋኖሴ ዋጂያ ዋዴ ታኒ ሄ ኦዳን ኢሲፋስ። ቃሲ ኤንታ ማታን ኤቃዳ ኢያ ዋጂይሳታ ማዑዋ ናጋይስ) ያገሰ።

21 «ጎዳይ ታኮ፣ ታኒ ኔና ኣይሁዴ ጊደና ኣሳኮ ሃሆሶ ከቲያ ጊሾ ዳንዳዳ ባ) » ያገሰ።

ጳውሎሲ ሮሜ ኣሲ ጊዳይሳ ቆንጨሲስ

22 ጳውሎሲ ሄ ቃላ ኦዲዲ ኦንጋና ጋካናው ኣሳይ ኢ ጌይሳ ሲዖሶና። ሄሳፌ ጉዬ፣ ባንታ ቃላ ቶቁ ኦሴዲ፣ «ሃይሳ ቢታፌ ቆይሳ! ኢ ዳናው ቤሴና» ያገደሶና።

23 ኤንቲ ዋጫሚሺን፣ ባንታ ማዑዋ ቦላ ሆሊሺኒኔ ባና ቦላ ላሊሺን፤

24 ሻላቃይ ቤዒዲ ዋታዳሬቲ ጳውሎሳ ባንታ ዳዒያሱዋ ኤፋና ሜላ ከቲስ። ቃሲ ኣሳይ ኣይስ ሄሳዳ ዋጫሚዳኮ ኤራናው ኮዩዲ ጳውሎሳ ሊሶን ጋራፊዲ ፒልጋና ሜላ ኤንታ ከቲስ።

25 ሺን ዋታዳሬቲ ጳውሎሳ ዳፎን ሚንሉ ቃቺዲ ጋራፋና ሃኒያ ዋዴ ጳውሎሲ ባ ማታን ኤቁዳ ማቶ ሃላቃኮ፣ «ሮሜ ኣሲ * ፒርዲ ባይና ጋራፌይሲ ሂንቲው ዋጌ?» ያገሰ።

26 ማቶ ሃላቃይ ሄሳ ሲዒዳ ዋዴ ሻላቃኮ ቢዲ፣ «ሃ ኣዳይ ሮሜ ኣሲ። ኔኒ ኣይ ኦላናው ቆፓይ?» ያገዲ ኦይቺስ።

27 ሻላቃይ ጳውሎሳኮ ሺቁዲ፣ «ኔኒ ሮሜ ኣሴ? ኣኔ ታው ኦዳ» ያገሰ።

ጳውሎሲ፣ «ኤ» ያገሰ።

28 ሻላቃይ ዛሪዲ፣ «ታኒ ሃ ጋዴቴላ ዳሮ ሚሺን ሻማስ» ያገሰ።

ሺን ጳውሎሲ፣ «ታ ሃ ጋዴቴላ ዩሌቴላን ዳማ ኤካስ» ያገሰ።

29 ሄሳ ጊሾ፣ ጳውሎሳ ፒልጋናው ቆፒዳይሳቲ ኢራ ኢያፔ ሻኬቲደሶና። ሻላቃይ ሮሜ ኣሲ ሳንላላታን ቃቺዳይሳ ኤሪዳ ዋዴ ያዩስ።

ጳውሎሲ ኣይሁዴ ሻንጎ ሲንሌ ሺቁስ

30 ዋንቴላ ጋላስ ሻላቃይ፣ ኣይሁዴቲ ጳውሎሳ ኣይስ ሞቲዳኮ ጌሺ ኤራናው ኮዩስ። ካሂኔ ሃላቃቲኔ ሻንጎ ኡባይ ሺቃና ሜላ ከቲስ፤ ቃሲ ጳውሎሳ ቃሾፔ ቢሊሲዲ ኤንታ ሲንላን ኤሲስ።

22:20 ሃ.ኦ 7:58 * 22:25 ሮሜ ኣሲ: 16:37 ያሊቲ።

23

1 ጳውሎስ ሸቆዋ ጫዲ ጻሊዲ፣ «ታ አሻቶ፣ ታኒ ሃቺ ጋካናው ያሳ ሲጎሳጎ ታ ዴፖ ኡባን ሎፖ ዋዛናን ዴባስ» ያገለገለ።

2 ካሂኔ ሃላቃይ ሃናኔይ፣ ጳውሎስ ደናን ባቃና ማላ ኢያ ማታን ኤቁዳይሳታ ከተሰ።

3 ሄ ዎዴ ጳውሎስ ኢያኮ፣ «ላ ኔ ቦቁንቴ ቲዩዳ ጎዳ ዳኔይሶ፣ ያሳይ ኔና ባቃና። ኔኒ ታ ቦላ ሂጊያፉ ፐርዳናው ኡታዳ ዴባሼ ሂጊይ ባይና ታና ባቃና ማላ ከታይ?» ያገለገለ።

4 ጳውሎስ ማታን ኤቁዳይሳቲ ኢያኮ፣ «ኔ ያሳ ካሂኔ ሃላቃ ጫያይ?» ያገደሶና።

5 ጳውሎስ፣ «ታ አሻቶ፣ ኢ ካሂኔ ሃላቃ ጊዲዳይሳ ታኒ ኤራቢኬ፤ አይስ ጊኮ ያሳ ቃላን፣ ሩኔ ዴሪያ አይሴይሳ ቦላ ኢታ ቃላ ሃሳዮፓ፣ ጌቲቲ ፃፊቲስ» ያገለገለ።

6 ሺን ጳውሎስ ሄ ቤሳን ዴባያ አሳፔ ባጋቲ ሳዲቃዌታ፣ ባጋቲ ፋሪሳዌታ ጊዴይሳ ቤባዲ፣ «ታ አሻቶ፣ ታኒ ፋሪሳዌኔ ፋሪሳዌናባ፤ ሃይቁዳይሳቲ ሃይቆፔ ዴንዳና፣ ጋዳ ታኒ ኡፋይሳን ናጊያ ጊሽ ኤንቲ ታ ቦላ ፐርደሶና» ያገዲ ኦዲስ።

7 ጳውሎስ ሄሳ ጊዳ ዎዴ ፋሪሳዌታ ጊደኒኔ ሳዲቃዌታ ጊደን ኦሺ ኬዩን ሻኬቲደሶና።

8 አይስ ጊኮ፣ ሳዲቃዌታ፣ «ሃይቁዳ አሲ ዴንዳና፤ ከታንቸይካ አያኒካ ባዋ» ያጎሶና። ሺን ፋሪሳዌቲ ናምባይካ ዴዔይሳ አማኖሶና።

9 ጊታ ካቺ ከዩስ፤ ፋሪሳዌታ ባጋ ጊዲዳ ሂጊ አስታማሬቲ ዴንዲ ኤቁዳ፣ «ሃ ኡራ ቦላ አይቤ ባላካ ዴሚቦኮ፤ ኢያው አያኒ ዎይኮ ከታንቸይ ሃሳዮና አጌና» ያገዲ ፓላሚደሶና።

10 አሻይ ደሪን አሳይ ጳውሎስ ሻቁሬፉና ማላ ጊዲ፣ ሻላቃይ ባ ዎታዳሬቲ ዎጲዲ ኤንታ ጊደፌ ኢያ ኤሌሲ ከሲዲ ባንታ ዴባያሱዋ ኤፋና ማላ ከተሰ።

11 ሄ ቃማ ጎዳይ ጳውሎስ ማታን ኤቁዳ፣ «ጳውሎስ፣ ኔኒ ታው ዩሩሳሌሜን ማርካቲዳይሳዳ ሮሜንካ ማርካታናው ቤሴስ፤ ሚና፤ አይኮይ ባዋ» ያገለገለ።

ጳውሎስ ዎጲናው ማቁቲደሶና

12 ዎንቴሳ ጋላስ አይሁዴቲ፣ «ጳውሎስ ዎጲና ዴባሼ ሞኮ ኡዮኮ» ጊዲ ጫቁደሶና።

23:3 ማቶ 23:27-28 23:5 ኬሳ 22:28 23:6 ሃ.ኦ 26:5፤ ፊል 3:5
23:8 ማቶ 22:23፤ ማር 12:18፤ ሉቃ 20:27

- 13 ጳውሎስ ሰላ ህጻን ማቅቲዳ አሳቲ ኦይታማፔ ዳርሶና።
- 14 ኤንቲ ካሂኔ ሃላቃታኮኔ ዳሪያ ጨማታኮ ቢዲ፣ «ኮኔ ጳውሎስ ዎዶና ዳዲሼ ካሌ ጊያባ ሞኮ ጊዲ ጫቁዳ።
- 15 ሂዛ፣ ሂንቴኔ ሻንጎይ ኢያባ ጌሺዲ ፒልጊያባይ ዳዲያ ዳኒሲዲ፣ ጳውሎስ ሂንቴኮ ኤሃና ማላ ሻላቃ ኦይቲ። ኮኔ ኢ ሃ ሸቁዎ ጋካናፔ ሲንሌ ኢያ ዎዳናው ጊጊዲ ኡቲዳ» ያጊደሶና።
- 16 ሺን ጳውሎስ ማቲ ናዳይ ህ ማቁዎ ሲዲዳ ዎዶ ቢዲ ዎታዳሬቲ ዳዲያሱዎ ጌሊዲ፣ ጳውሎስ ኦዲሰ።
- 17 ጳውሎስ ማቶ ሃላቃታፔ ኢሱዎ ግጊዲ፣ «ሃ ናዳይ ሻላቃስ ኦዲያባይ ዳዲያ ጊሾ ኢያ ሻላቃኮ ኤፋ» ያጊሰ።
- 18 ማቶ ሃላቃይ ናዳ ሻላቃኮ ኤፊዲ፣ «ቃሾ ኩፋን ዳዲያ ጳውሎስ ታና ባኮ ግጊዲ፣ ሃ ናዳይ ኔው ኦዲያባይ ዳዲያ ጊሾ ኢያ ኔኮ ኤሃና ማላ ታና ዎሲስ» ያጊሰ።
- 19 ሻላቃይ ናዳ ኩሺያ ኦይኪዲ፣ ዲማ ካሬ ኬሲዲ፣ «ኔኔ ታው ኦዳናባይ ኦይቤ?» ያጊዲ ኦይቲሰ።
- 20 ናዳይ ሻላቃኮ፣ «ኦይሁዳቲ ጳውሎስ ካሴፔ ማንሌ ፒልጋናው ኮዬዳባ ዳኒሲዲ ኔኔ ዎንቶ ኢያ ሸቁዎ ኤሃና ማላ ኔና ዎሳናው ዘሬታ ቃቲደሶና።
- 21 ሺን ኔኔ ኤንቲ ጊያባ ሲጎፓ። ኦይሰ ጊኮ፣ ኦይታማፔ ዳሪያ አሳቲ ጳውሎስ ዎዶና ዳዲሼ (ካሌ ሞኮ፣ ሃሌ ኡዮኮ) ጊዲ ጫቁዲ፣ ቆሴቲዲ ኢያ ናጎሶና። ሃዲ ኔ ጊያባ ፃላላ ሲዳናው ናጎሶና» ያጊሰ።
- 22 ሻላቃይ ዛሬዲ፣ «ሃ ኦዳ ኔ ታው ኦዲዳይሳ ሃራ ኦዳሰካ ኦደፓ» ያጊዲ ናዳ ጉዬ ዬዲሰ።

ጳውሎስ ዳሪያ ኦይሲያ ፊልኪሳ ሲንሌ ሸቁስ

- 23 ሻላቃይ ማቶ ሃላቃታፔ ናሞዳታ ግጊዲ፣ «ቃማሬ ህቡ ሳቲን ቁሳሪያ ባናው፣ ናሞው ጭቱ ዎታዳሬታ፣ ላፑን ታው ፓራ አሳታኔ ናሞው ጭቱ ቶራንቾታ ጊጊሲ።
- 24 ዳሪያ ኦይሲያ ፊልኪሳኮ ጳውሎስ ሳሮ ጋላናው ቶጋ ማህ ጊጊሲ።» ያጊዲ ኤንታ ኪቲሰ።
- 25 ሻላቃይ ፊልኪሳስ ሃይሳዳ ጊያ ዳብዳቤ ፃፊሰ።
- 26 «ቃላዉዲዮሳ ሉሲዮሳፔ ዳሪያ ኦይሲያ ቦንቾ ፊልኪሳስ፣ ሳሮይ ኔው ጊድ።
- 27 ኦይሁዳቲ ሃ ኡራ ኦይኪዲ ዎዳና ሃኒሺን፣ ኢ ሮማ ቢታ አሲ ጊደይሳ ኤራዳ ዎታዳሬታራ ጋካዳ ኢያ ኦሻሰ።

28 ኤንቲ ኢያ ኣይሰ ሞቲያኮ ኤራናው ኮያዳ ኤንታ ሺቁዋን ኢያ ሺሻሰ።

29 ኤንቲ ባንታ ሂጊያሰ ኢያ ሞቲዳይሳፌ ኣቲን ኢያ ዎዲሲያባ ዎይኮ ቃሺሲያባ ጊዶናይሳ ታ ዳማሰ።

30 ኤንቲ ሃ ኡራ ቦላ ማቄቲዳ ዘገርሳይ ታና ጋኪን፡ ታኒ ኤሌሳዳ ኢያ ኔኮ ዩዳሰ። ኢያ ሞቲይሳቲ ኔ ሲንላን ቢዲ ሞታና ማላ ኪታሰ» ያገሰ።

31 ሄሳ ገሾ፡ ዎታዳሬቲ ኪቲቲዳይሳዳ ጳዉሎሳ ኤኪዲ፡ ቃማ ኣንቲጳጸሪሳ ጋሊዶሶና።

32 ዎንቴላ ጋላሰ ፓራ ኣሳቲ ኢያራ ባና ማላ ኦሊዲ ቶሆ ኣሳቲ ጉዬ ሰሚዶሶና።

33 ቶጋይ ቁሳሪያ ጋኪዲ ዳብዳቢያ ዳሪያ ኣይሴይሳሰ ኢሚዲ፡ ጳዉሎሳ ኢያ ሲንላ ኣሊዶሶና።

34 ዳሪያ ኣይሴይሲ ዳብዳቢያ ናባቢዳፔ ጉዬ «ጳዉሎሳ፡ ኔ ኣው ኣዉራጃ ኣሴ?» ገዲ ኢያ ኦይቲሰ። ኢ ከልቁያ ኣሲ ገደይሳ ኤሪዳ ዎዴ

35 «ታኒ ኔባ ኔና ሞቲይሳቲ ያ ዎዴ ሲዳና» ያገሰ። ዎታዳሬቲ ጳዉሎሳ ሄሮዲሳ ኬላን ናጋና ማላ ኪቲሰ።

24

ጳዉሎሳ ኣይሁዴቲ ሞቲዶሶና

1 ኢቻሹ ጋላሳፔ ጉዬ ካሂኔ ሃላቃይ፡ ሃናኔይ፡ ጨማታራኔ ጃርጃሉሳ ጊያ ኢሲ ፃባቃራ ቁሳሪያ ቢሰ። ኤንቲ ዳሪያ ኣይሴይሳ ቦላ ጳዉሎሳ ሞቲዶሶና።

2 ጳዉሎሲ ጃፔቲዲ ጌሊዳ ዎዴ ጃርጃሉሲ ኢያ ሃይሳዳ ያገዲ ሞቲሰ።

«ቦንቾ ፊልኪሳ፡ ኦኒ ኔ ባጋራ ዳር ሳርቴላ ዳሚዳ፡ ኔ ሎዎ ኣይሱዋን ኦ ቢታይ ዳር ላሚቲሰ።

3 ቦንቾ ፊልኪሳ፡ ኦኒ ኣዉንካ ኣዉዴ ገዲን ዳር ጋላታን ሄሳ ኤኮሰ።

4 ታኒ ኔና ጋምዲሶናሺን ኔኒ ኔ ኬሃቴላን ኦባ ቃንላን ሲዳና ማላ ኔና ዎሳይሰ።

5 ሃ ኡራይ ቆቤ ገዲዲ ቢታ ኡባን ዳዲያ ኣይሁዴታ ገደን ቡቁላ ሜዲዲ ናዚራዊታ ባጋ ኣሳ ካሌሌይሳ ገደይሳ ኤሪዳ።

6 ሃሪ ኣቶሺን፡ ያሳ ኬላ ቱኒሳና ሃኒሺን ኦኒ ኢያ ኦይኪዳ፤ ኦ ሂጊያዳ ኢያ ቦላ ፒርዳናው ቆፒዳ።

7 ሺን ሻላቃ ሉሲዮሲ ዪዲ፥ ዋልቃን ኑ ኩሼፔ ኢያ ዋሉ ኤኪስ።

8 ኢያ ሞቲይሳቲካ ኔኮ ያና ሜላ ከቲስ። ኔኔ ኔ ሁዔን ሃ ኡራ ፒልጋዳ ኑኔ ኢያ ሞቲያ ሞቱዋ ኡባ ኤራናው ዳንዳባሳ» ያገሰ።

9 አይሁዳቲካ፥ «ሃ ኡዳይ ቱማ» ገዲ ኢያ ቆፋ ማዒዶሶና።

ጳውሎሲ ሞቱዋስ ዛሮ ኢሚስ

10 ዳሪያ አይሴይሲ ጳውሎሳ ኦዳ ገዲ ማሊስ። ጳውሎሲ ሃይሳዳ ገዲ ዛሪስ። «ኔኔ ዳሮ ዋዴፔ ደማዳ፥ ሃ አሳስ ፐርዳሼ ዴዔይሳ ኤራዳ ታ ኦዳስ ኡፋይሳን ዛሮ ኢማይስ።

11 ታኒ ጎይናናው ዩሩሳላሜ ኬዪን ታማኔ ናምቡ ጋላሳፔ አጵናይሳ ኔኔ ኔ ሁዔን ኤራናው ዳንዳባሳ።

12 አይሁዳቲ ታና ያሳ ኬላን ገዲን አይሁዳ ዋሳ ኬላን ገዲን ካታማን ገዲን ኦዴራካ ፓላሚሺን ዋይኮ አሴ ሺሻዳ ማቂሺን ኢሲ አሲካ ዴሚቤና።

13 ሃዒካ ኤንቲ ታና ሞቲያባስ ማርካ ዴማናው ዳንዳዮኮና።

14 «ሺን ታኒ ኢሲባ አማናይስ፤ ታኒ ሂጌን ዴዒያባኔ ናቤቲ ያፊዳ ኡባባ አማናዳ፥ ኑ አዋታ ያሳ፥ ኤንቲ ዋርዶ ጌያ ኦጊያን ጎይናይስ።

15 ኤንቲ ባንታ ሁዔን አማኔይሳ ሜላ ዲሎቲኔ ናጋራንቸቲ ሃይቆፔ ዴንዳናይሳ ታካ አማናይስ።

16 ሄሳ ገሾ፥ ታኒ ያሳ ሲንላኔ ኣሳ ሲንላን ኡባ ዋዴ ሎዖ ካሂ ታው ዳና ሜላ ማናይስ።

17 «ታኒ ዩሩሳላሜፔ ኬዮሳፔ ዳሮ ላይላፌ ጉዬ ታ ቢታ ማንቆታስ ማዴ አማናዉኔ ያርሾ ያርሻናው ዩሩሳላሜ ባስ።

18 ታኒ ያሳ ኬላን ሄሳ ኦላዳ ጌሻ ዋጋ ፖላ ሲሚን ታና ዴሚዶሶና። ሄ ዋዴ ታራ አሲ ባዋ፥ አሺካ ኬዪቤና።

19 ሺን ኢሲያፔ ዪዳ ኢሲ ኢሲ አይሁዳቲ ያን ዴዖሶና፤ ኤንቲ ታ ቦላ ኦዳ ኮይኮ ዪዲ ታና ኔ ቦላ ሞታናው ዳንዳዮሶና።

20 ዋይኮ ታኒ ሻንጉዋ ሲንሐ ሸቂዳ ዋዴ ኦሊዳ ባሊ ዴዒኮ ሃይሳቲ ኔ ሲንላን ዴዔይሳቲ ኦዶና።

21 ታኒ ኤንታ ገዲን ኤቃዳ፥ «ሃይቂዳይሳቲ ዴንዳና ጋዳ ዋሳዳ ኦዲዳ ገሾ ሃቺ ሂንቴ ሲንላን ታ ቦላ ፐርዶሶና» ጋስ፤ ሄሳፌ ሃራባ ኦላቢኬ» ያገሰ።

22 ሺን ፊልኪሲ ያሳ ኦጊያባ ጌሺ ኤሪዳ ገሾ «ታኒ ሂንቴ ኦዳ ሻላቃ ሉሲዮሲ ያ ዋዴ ፐርዳና» ያገዲ ሞይዚስ።

23 ፊልኪሲ ቃሲ ጳውሎሳ ቃሾና ናጋና ማላኔ ኢያ ዳቦታፔ ኦኒካ ኢያ ኦይቻናው ዩሺን ዲጎና ማላ ማቶ ሃላቃስ ኦዲስ።

ጳውሎሲ ፊልኪሳ ሲንጤኔ ዲሩሲላ ሲንጤ ሸቂስ

24 ጉላ ጋላሳፔ ጉዬ፥ ፊልኪሲ ኣይሁዳ ባጋ ጊዲዳ ባ ማቼ ዲሩሲላራ ዩዲ ጳውሎሳ ከቲ ኤሂሲዲ ዩሱስ ኪሪስቶሳን ኣማኖባ ኢያፔ ሲዒስ።

25 ጳውሎሲ ጂሎቴላባ፥ ባ ሁዔ ሃሮባኔ ያናው ዳዒያ ፐርዳባ ኦዲሺን፥ ፊልኪሲ ያዩዲ፥ «ኔኒ ሃዒስ ባ፤ ታው ኢንጃቲዳ ዎዴ ኔና ጃጊሳና» ያጊስ።

26 ሄ ዎዴ ጳውሎሳፔ ጉቦ ኤካናው ቆፒዲ ኢያ ዛሪ ዛሪ ጃጊሲዲ ኢያሪ ኦዴቴስ።

27 ናምቡ ላይላፊ ጉዬ፥ ፊልኪሳ ቤሳ ጳርቂዮስ ፊስዖሲ ኤኪስ። ፊልኪሲ ኣይሁዳታ ኡፋይሳናው ኮዩዲ ጳውሎሳ ቢሎና ኣጋጊስ።

25

ጳውሎሲ ሮሜ ካወዋስ ኣቤት ጊስ

1 ፊስዖሲ ካዎቲዳ ሄቹ ጋላሳፔ ጉዬ ቁሳሪያፔ ዩሩሳላሜ ቢስ።

2 ያን ካሂኔ ሃላቃቲኔ ኣይሁዳታ ካሌሌይሳቲ ጳውሎሳ ሞቲደሶና።

3 ጳውሎሳ ዩሩሳላሜ ኤሂሺን ኦጊን ቆሴቲዲ ኢያ ዎቆናው ኤንታው ኢንጃታና ማላ ባንታና ማዶ ጊዲ ፊስዖሳ ዎሲደሶና።

4 ፊስዖሲ ኤንታኮ፥ «ጳውሎሲ፥ ቁሳሪያን ቃሾ ኬላን ዳዒስ፤ ታኒ ታ ሁዒንካ ኤሌሳዳ ጉዬ ሲማና ሃናይስ።

5 ኢ ባሊዳባይ ዳዒኮ ሂንቴ ጊዶን ኣዎቴይሳቲ ታራ ቁሳሪያ ቢዲ ኢያ ሞቶና» ያጊዲ ዛሪስ።

6 ፊስዖሲ ኤንታ ማታን ሆስፑን ዎይኮ ታሙ ጋላሳ ማላ ጋምዒዳፔ ጉዬ ቁሳሪያ ቢስ። ዎንቴላ ጋላስ ፐርዳ ኦይዲያን ኡቲዲ ጳውሎሳ ኤሃና ማላ ከቲስ።

7 ኢ ዩን ዩሩሳላሜፔ ዩዳ ኣይሁዳቲ ኢያ ዩሹዎን ኤቂዲ ኤንቲ ላላናው ዳንዳዮና ዳር ዳዖ ሞቶ ኢያ ቦላ ሺሺደሶና።

8 ጳውሎሲ ዛሪዲ፥ «ታኒ ኣይሁዳ ሂጊያ ጊዲን ዖሳ ኬላ ዎይኮ ሮሜ ካወዋ ቁሳሬ ናቃቢኬ» ያጊስ።

9 ሸን ፊስዖሲ ኣይሁዳታ ኡፋይሳናው ኮዩዲ ጳውሎሳኮ፥ «ዩሩሳላሜ ባዳ ሃ ሞቲዋባ ያን ታ ሲንላን ፐርዴታናው ኮያይ?» ያጊዲ ኦይቸስ።

10 ሺን ጳውሎስ፡ «ታኒ ፐርዴታናው ቤሲያ ቁሳሬ ፐርዳ ኬላን ኤቃ ኪቻስ። ኔኒ ሎይላ ኤሬይሳዳ ታኒ ኣይሁዴታ ኣይቢንካ ናቃቢኬ።

11 ሂዛ፡ ታኒ ናቁዳባይ ዋይኮ ሃይቆስ ጋሊያባ ኦሊዳባ ጊዲኮ ሃይቆፔ ታና ኣሻ ጊኬ። ሺን ኤንቲ ታና ሞቲያ ሞቶይ ጮ ጊዳፔ ጉዬ ኦኒካ ታና ኤንታው ኣሊ ኣማናው ዳንዳዔና። ቁሳሬይ ታባ ፐርዳ ጋዳ ኣይቻይስ» ያጊስ።

12 ሄ ዋዴ ፊስጾሲ ባ ዘራንቾታራ ዘሬቲዲ፡ «ኔኒ ቁሳሬይ ታባ ፐርዳ ጋዳ ኣይቻዳሳ፤ ቁሳሬኮ ባሳ» ያጊዲ ዛሪስ።

ጳውሎሲ ኣጊርጳ ሲንሌኔ ባርኒቄ ሲንሌ ሺቂስ

13 ጉላ ጋላሳፔ ጉዬ ካዎይ ኣጊርጳኔ ባርኒቄይ ፊስጾሳ ሳርላናው ቁሳሪያ ቢደሶና።

14 ያን ኤንቲ ዳር ጋላስ ጋምዒን፡ ፊስጾሲ ካወሞስ ጳውሎሳባ ሃይሳዳ ያጊዲ ኦዲስ፤ «ፊልኪሲ ቢሎና ኣጊዲ ቢዳ ኢሲ ኣዴይ ሃይሳን ዴዔስ።

15 ታኒ ዬሩሳላሜ ቢዳ ዋዴ ካሂኔ ሃላቃቲኔ ኣይሁዴ ጨማቲ ኢያ ቦላ ፐርዳና ማላ ታና ዎሲዲ ኢያባ ታው ኦዲደሶና።

16 ታኒ፡ «ሞቲቲዳ ኡራይ ባና ሞቲይሳታ ሲንላን ኤቁዲ ባ ሞቲዳባስ ዘር ኣሞናሺን፡ ኦና ጊዲኮካ ኣጲዲ ኣማቲይሲ ሮማ ሂጌ ጊዴና» ያጋዳ ኤንታው ዛሪስ።

17 «ሃሳ ጊሾ፡ ኤንቲ ሃይሳን ሺቂዳ ዋዴ ታኒ ጋምዶና ዎንቴላ ጋላስ ፐርዳ ኬላ ጌላዳ ጳውሎሳ ኤሃና ማላ ኪታስ።

18 ኢያ ሞቲይሳቲ ኢያ ማታን ኤቁዲ፡ ኢታባን ኢያ ሞቶና ኣሳኮና ጋዳ ታኒ ቆፐዳይሳ ማላ ኢያ ሞቲቦኮና።

19 ሺን ኤንቲ ባንታ ኣማናባኔ ጳውሎስ፡ «ፓፃ ዴዔስ» ጊያ ኢሲ ሃይቂዳ ዬሱሳ ጌቲቲያ ኣዲያባ ኢያራ ፓላሞሶና።

20 ሃ ኦዳይ ታና ሻካናው ማቲዳ ጊሾ ጳውሎሲ ዬሩሳላሜ ቢዲ፡ ያን ፐርዴታናው ኮያኮ ጋዳ ኢያ ኣይቻስ።

21 ሺን ጳውሎሲ ባ ኦዳ ቁሳሬይ ቤዓና ጋካናው ቃሾ ኬላን ጋምዳናው ኣይቹስ። ታኒ ኢያ ቁሳሬኮ ዬዳና ጋካናው ኢ ቃሼታና ማላ ኪታስ» ያጊስ።

22 ሄሳ ጊሾ፡ ኣጊርጳ ፊስጾሳኮ፡ «ታኒ ታ ሁዔንካ ሄ ኡራይ ጊያባ ሲዓናው ኮያይስ» ያጊስ።

ፊስጾሲ ኢያኮ፡ «ኔኒ ዎንቶ ኢ ጊያባ ሲዓና» ያጊስ።

23 ዋንቴላ ጋላስ ኣገርጺኔ ባርነቄይ ገታ ቦንቾን ሻላቃታራኔ ካታማን ዳዒያ ገታ ኣሳታራ ዪዲ ፕርዳ ከሌ ጌሊደሶና። ፊሰጾሲ ጳውሎሳ ጭሊዲ ኤሃሰ።

24 ፊሰጾሲ፡ «ካዋው ኣገርጺ፡ ሃይሳን ኑራ ዳዒያ ኣሳው፡ ኣይሁዴቲ ዩሩሳላሜንካ ሃይሳንካ ዋሲዲ፡ ሲ ሂዛፔ ጉዬ ፓፃ ዳናው ቤሴና) ያገዲ፡ ታና ዋሲዲ ኡራ ሃይሳ ቤዒታ።

25 ሺን ኢያ ሃይቆስ ጋሊያባ ኣይቢባካ ታኒ ዳማቢኬ። ኢ ባ ሁዒን፡ «ቁሳሬይ ታባ ፕርዶ ያጋዳ ኣይቻይሰ) ገዳ ገሾ ቁሳሬኮ ኢያ ዩዳናው ቆፋ ቃቻሰ።

26 ታኒ ኢያባ ታ ጎዳ ቁሳሬስ ፃፋናው ገዲያ ጋሶይ ኣይቢካ ባዋ። ሄሳ ገሾ፡ ኢያባ ሂንቴ ቤዒኮ ታ ፃፊያባይ ቤንታኑኮ ጋዳ ሂንቴ ሲንሌ ኡባራካ ካዋው፡ ኣገርጺ፡ ኔ ሲንሌ ኢያ ኤሃሰ።

27 ኣይስ ገኮ፡ ቃሼቲዳ ኣሲ ቦላ ዳይናስ ኣሊያ ዋዴ ኢ ኣይስ ሞቴቲዳኮ ቆንጨሶና ኣጌይሲ ታው ኤያቴሌ ዳኔስ» ያገሰ።

26

ጳውሎሲ ኣገርጺ ሲንላን ዛሪዳ ዛሩዋ

1 ኣገርጺ ጳውሎሳኮ፡ «ኔኒ ኔባ ኦዳናው ዳንዳባ» ያገሰ። ሄ ዋዴ ጳውሎሲ ባ ኩሺያ ዳንሌዲ ሃይሳዳ ያገሰ።

2 «ካዋው፡ ኣገርጺ፡ ኣይሁዴቲ ታና ሞቴዳባስ ዛር ኢማናው ሃቺ ኔ ሲንላን ኤቃሼ ታ ቃዳይ ሎፃ ጋዳ ቆፓይሰ።

3 ኔኒ ኣይሁዴ ዋጋኔ ፓላማ ሎይላዳ ኤሪያ ገሾ ታና ሳሌቶና ሲባና ሜላ ዋሳይሰ።

4 «ታኒ ናባቴላፊ ደማዳ ታ ኣሳ ገደኒኔ ዩሩሳላሜን ዳዒዳ ታ ዴቡዋ ኣይሁዴ ኡባይ ኤሮሶና።

5 ታኒ ኮይሮፔ ደማዳ፡ ኑ ኣማኖ ሂጊያ ሚንሌዲ ናጊያ ፋሪሳዋታ ያራፔ ገዳይሳ ኤንቲ ማርካታናው ኮይኮ ኤሮሶና።

6 ሃዒካ ታኒ ያሳይ ኑ ኣዋታስ ኢማና ገዳ ኡፋይሳ ናጊያ ገሾ ሞቴታዳ ሃይሳን ኤቃሰ።

7 ቃሲ ታማኔ ናምቡ ኑ ኣዋታ ሼሻይ ያሳ ቃማኔ ጋላስ ሚንሌዲ ጎይኒሼ ያሳይ ኢማና ገዳይሳ ኤካናው ኡፋይሳን ናጎሶና። ካዋው ኣገርጺ፡ ኣይሁዴቲ ታና ሞቴይ ታኒ ኡፋይሳን ሄሳ ናጊያ ገሾሳ።

8 ኣይሁዴቶ፡ ያሳይ ሃይቁዳይሳታ ዳንሌይሳ ኣይስ ኣማኔኬቲ?

9 «ካሴ ታኒ ታ ሁዒንካ ናዚሬቴ ዩሱሳ ሱንላ ቴቃናው ዳንዳዔቲዳባ ኡባ ኦላናው ቤሴስ ጋዳ ቆፓሰ።

10 ታኒ ዬሩሳሌምን ኦሊዳይ ሃይሳ። ካሂኔ ሃላቃታፔ ማታ ኤካዳ ያሳ አሳታፔ ዳርታ ቃሺሳሰ። ኤንታ ዋዲያ ዋዴካ ኤንታ ሃይቁዋ ደሳሰ።

11 ዳር ዋዴ አይሁዴ ዋሳ ኬላ ኡባን ኤንቲ ሴሬታና ሜላኔ ዬሱሳ ጫዬዲ ካዳና ሜላ ኡንዔላሰ። ታኒ ዋጊ ባይና ኤንታ ሃንቄታዳ ሃሪ አቶሺን፣ ሃሪ ቢታ ካታማታ ጋካናው ኤንታ ጎዳሰ።

12 «ታኒ ሃ ኦዳሰ ካሂኔ ሃላቃታፔ ማታኔ ኪታ ኤካዳ ዳማሰቆ ባይሰ።

13 ካዋው፣ ታኒ ሴታ ጋላሰ ኦጊያን ዴሲሺን አዋ ፖፖፔ ዳር አዲያ ፖፖይ ታ ዩሹዋኒኔ ታራ ቤይሳታ ዩሹዋን ሳሎፔ ፖሲሰ።

14 ኮኒ ኡባይካ ሳዓን ኩንዲዳ ዋዴ ኢብራይስጫ ደናን፣ ሳፖላ፣ ሳፖላ፣ ታና አይሰ ጎዳይ? ኔኒ ኔና ጫዲያ ፃምዓ ቃኪኮ ኔና ቆሃሳ) ያጊዲ ታው ኦዲሺን ሲዓሰ።

15 «ታኒ፣ ሳፖላው፣ ኔኒ ኦኔ?» ያጋሰ።

«ጎዳይ፣ ሳፖላ፣ ኔኒ ጎዲያ ዬሱሳ፤

16 ሺን ዴንዳ ኤቃ። ሃቺ ኔኒ ታና ቤዲዳይሳኒኔ ሲንላፌ ታ ኔና ቤሳኻሳ ሃራታሰ ማርካታና ሜላ ታ ኦሳንቾ ኦላዳ ኔና ሹማናው ኔው ቤንታሰ።

17 ኢሰራዔሌ አሳታፔኔ ታኒ ኔና ኤንታኮ ኪቲያ አይሁዴ ጊድናይሳታፔ ኔና አሻና።

18 ኔኒ ኤንታ አይፊያ ደያና፣ ቋማፔ ፖፖኮ፣ ፃላሂ ኩሹፔ ያሳኮ ኤንታ ዛራና። ኤንቲ ታናን አማኒዲ ናጋራ አቶቴላ ኤካና። ያሳይ ደሪዳ አሳ ጊድን ባንታ ላታ ዴማና) ያጊሰ።

19 «ካዋው አጊርጸ፣ ሄሳ ጊሾ፣ ታው ሳሎፔ ቤንቲዳ ቆንጨላሰ ኪቲታናይሳ ኢፃቢኬ።

20 ሺን ታኒ ኮይርታዳ ዳማሰቆን ሄሳፌ ጉዬ ዬሩሳሌምኒኔ ዬሁዳ ቢታ ኡባን ዴዔይሳቲኔ አይሁዴ ጊድናይሳቲ ባንታ ናጋራፔ ያሳኮ ሲማና ሜላኔ ናጋራፔ ሲሙዋ ቤሲያ ኦሶ ኦላና ሜላ ቃላ ኦዳሰ።

21 ሄሳ ጊሾ፣ አይሁዴቲ ታና ያሳ ኬላን ኦይኪዲ ዋዳናው ኮዩደሶና።

22 ሃቺ ጋካናው ያሳ ማዴይ ታፔ ሻኬቲቤና፤ ያኒያ ጊሾ፣ ጉላሲኔ ጊታሰ ማርካታሾ ሃይሳን ኤቃሰ። ናቤቲኔ ሙሴይ ሃናና ጊዲ ኦዲዳይሳፌ ሃራ ኢሲባካ ታኒ ኦዲዳባይ ባዋ።

23 ሄሲካ፡ «ኪሪሰቶስ ዋዬ ኤካናው ቤሴስ፤ ቃሲ ሃይቆፔ ኮይሮ ዴንዲዲ ኣይሁዴታሲኔ ኣይሁዴ ጊደናይሳታስ ኣቶቴላ ፖዖ ኦዳናው ቤሴስ» ጊዳይሳ» ያጊሰ።

24 ጳውሎስ ሄሳ ያጊዲ ዛሪሺን፡ ፊስፆሲ ባ ቃላ ጶቁ ኦሊዲ፡ «ጳውሎሳ፡ ኔ ጎያዳሳ፤ ኔ ዳሮ ቲሚርቴይ ኔና ጎሻሰ ጋሊስ» ያጊሰ።

25 ሺን ጳውሎስ፡ «ቦንቾ ፊስፆሳ፡ ታኒ ቱማባኔ ቤሲያባ ኦዳይሲፔ ኣቲን ጎያቢኬ።

26 ታኒ ቆንጩን ኦዲያ ኦዳ ካዎይ ኤሬሰ። ሃ ኦዳይ ጌማን ኦሴቲቦና ጊሾ ኢሶይካ ኢያፔ ጌሞናይሳ ታኒ ጌሻዳ ኤራይሰ።

27 «ካዎው ኣጊርጳ፡ ኔኒ ናቤታ ኣማናሳ ጊዲኪ? ኔኒ ኣማኔይሳ ታኒ ኤራይሰ» ያጊሰ።

28 ካዎይ ኣጊርጳ፡ ጳውሎሳኮ፡ «ሃ ጉላ ሳቴን ታና ኣማንላናው ኮያይ?» ያጊሰ።

29 ጳውሎስ፡ «ዳሮ ዋዴ ጊዲን ጉላ ዋዴ ኔ ፃላላ ጊደናሺን ሃቺ ታና ሲዒያ ኡባይ ሃ ቃሹዋፔ ኣቲን ታ ማላ ጊደና ማላ ፆሳ ዋሳይሰ» ያጊሰ።

30 ሄሳፊ ጉዬ፡ ካዎይ ፊስፆሲ፡ ባርኒቄይኔ ኤንታራ ኡቲዳ ኡባይካ ዴንዲዳሶና።

31 ያፔ ኬዬዲ ቢሼ ኢሶይ ኢሱዋራ፡ «ሃ ኡራይ ሃይቆስ ዋይኮ ቃሾስ ጋሊያባ ኣይኮካ ኦሊቤና» ያጊዲ ኦዴቲዳሶና።

32 ኣጊርጳ ፊስፆሳኮ፡ «ሃ ኡራይ «ቁሳሬይ ታባ ፒርዶ» ጎናኮ ቢሌታናው ዳንዳዔስ፡ ሺን ኣቲሰ» ያጊሰ።

27

ጳውሎስ ሮሜ ቢስ

1 ኔኒ ማርካቤራ ፃሌ ባናው ቃቺዳ ዋዴ ኣወጊሰፆሳ ዎታዳሬታ ጌቴቴይሳታፔ ኢሲ ዩሊዮሳ ጊያ ማቶ ሃላቃስ ጳውሎሳኔ ሃራ ጉላ ቃሾ ኣሳታ ኣሚደሶና።

2 ኢሲያ ጋፃን ዴዒያ ቢታታ ቢያ ኣዲራሚዒዮኔ ማርካቤን ጌሊዲ ዴንዲዳ። ማቁደኒያ ኣሲ ጊዲዳ ቴሴሎንቄ ኣርሰዒርኮሲ ኮራ ዴዔስ።

3 ዎንቴላ ጋላስ ኔኒ ሲደና ጋኪሺን፡ ዩሊዮሲ ጳውሎሳስ ኬሂዲ ባ ላጌታኮ ቢዲ ኮሺያባን ማዴታና ማላ ኤንታኮ ዩዲስ።

26:23 1ቆሮ 15:20፤ ኢሳ 42:6፤ 49:6

4 ያፔ ዴንዲዲ ሲንፋራ ኑ ቦላ ጫርኪያ ጊሾ ሃፋን ቱቄቲዳ ቢታ፥ ቆጲርሳን ዜምፒዲ አጲዳ።

5 ኪልቂያኔ ጲንፊሊያ ማታን ዴዲያ አባ ፒኒዲ ለቂያን ዴዲያ ሙራ ጋኪዳ።

6 ያን ማቶ ሃላቃይ ፃሌ ቢያ ኢስኪንዲሪያ ማርካቤ ዴዲያ፥ ኢያን ኑና ጌልሲስ።

7 ኑኒ ዳር ጋላስ ሎዳራ ቢዲ፥ ዳር ሜቶን ቃንዶሳ ካታማ ማታ ጋኪዳ። ያራ ባናው ኑና ጫርኮይ ዲጊን ሳልሞናራ አጲዲ ሃፋን ቱቄቲዳ ቢታ፥ ቃርፃሳን ዜምፒዲ አጲዳ።

8 ዳር ሜቶን ጋፃ ጋፃ ኦይኪዲ ላሲያ ካታማ ማታን ዴዲያ አባ ዶናን «ማርካቤይ ዎፑ ጊዲ ሸምፒያሶ» ጊያ ቤሳ ጋኪዳ።

9 ኑኒ ያን ዳር ዎዲያ ጋምዲዳፔ ጉዬ ያሚ ቢሌቲን፥ ማርካቤራ ቡሲ ሜቲያ ጊሾ ጳውሎሲ ኤንታ ዞሪስ።

10 «አሳው፥ ኑ ቡሳን ጊታ ቦሺኔ ዳር ቆሆይ ዴዲያሲ ታው ቤንቲስ፤ ቆሆይ ጫና ቦላኔ ማርካቤያ ቦላ ፃላላ ጊዶናሺን ኑ ዴዴዎ ቦላካ ጋካና» ያጊስ።

11 ሺን ማቶ ሃላቃይ ጳውሎሲ ጊዳይሳፌ አሊዲ ማርካቤያ ላጌይሲኔ ማርካቤያ ጎዳይ ጌይሳ አማኒስ።

12 ሄ አባ ዶናን ዴዲያ ካታማይ ባልጎ አጌና አፋናው ኤንታው ኢንጃቶና ጊሾ ዳሪያ አሳቲ ባንታው ዳንዳዴቲኮ ፊንቄ ካታማ ጋኪዲ ባልጎ አጌና ያን አፋናው ዞሪቲዶሶና። ፊንቄይ ፑዴሃ-ዉሎሃፔኔ ዲጌሃ-ዉሎሃፔ ጊዶን አባ ዶናን ዴዲያ ካታማ።

አባ ቦላ ጎቴይ ዴንዲስ

13 ካዉሻ ዲጌሃ ጫርኮይ ሎዳራ ጫርኪዳ ዎዴ ባንታ ቆፒዳይሳዳ ሃኒዳባ ዳኒን ዴንዲዲ፥ ማርካቤይ ቃያና ሜላ ኦይኪያ ቢራታ ፑዴ ኤኪዲ ቃርፃሳ ማታራ አጲዶሶና።

14 ሺን ዳር ጋምዶና «አዉራቂስ» ጊያ ዎልቃማ ጎቴይ ሃፋን ቱቄቲዳ ቢታፌ ዴጌ ኤንታ ቦላ ዴንዲስ።

15 ሄ ጎቴይ ማርካቤያ ሱጊዲ ኤፎና ዲጊዳ ጊሾ ጫርኮይ ማርካቤያ ባ ዶሲዳ ሶ ኤፊስ።

16 ኑኒ ቄዳ ጊያ ሃፋን ቱቄቲዳ ቢታ ዜምፒዲ ቢሽ ዳር ሜቶቲቲዲ ማርካቤያ ዎጎሉዎ አሻናው ዳንዳዲዳ።

17 ኤንቲ ዎጎሉዎ ፑዴ ኬሲዳፔ ጉዬ ዎዶሩዎን ማርካቤያ ቦላ ፃፂዲ፥ ሚንሊ ቃቺዶሶና። ሱርቲሳ ጊያ ሻፊያን ባንታና ደምዔላና ጊዲ ሂርጊዲ፥ ማርካቤያ ሻራ ዎጲሲዲ ማርካቤያ ጮ ዬዲ አጊዶሶና።

18 ጎቴይ ዋልቃሚሼ ቢን ዋንቴላ ጋላስ ጫናፔ ባጋ ኣባን ሆሎ ኦይኪደሶና።

19 ሄቫንሶ ጋላስ ማርካቢያ ሚሺያ ኤኪዲ ባንታ ኩሼን ሆሊደሶና።

20 ኑኒ ዳር ጋላስ ኣዋ ኣይፌኔ ያሊንቶ ቤዖና ጊሾኔ ዋልቃማ ኡሾይ ኑ ቦላ ኡሺዲ ጊሾ ሲንሳፌ ሼምፖራ ኣታና ጊዲ ቆፒቦኮ።

21 ሄ ዋዴ ኤንቲ ዳር ጋላስ ካሊ ሞና ጋምቢዳ ጊሾ ጳውሎሲ ኤንታ ጊደን ዴንዲ ኤቂዲ፣ «ኣሳው፣ ሂንቴ ታ ዘሪያ ኤኪዲ ቃርዳሳፔ ዴንዶና ኣጊዳኮ ሃ ሜቶይኔ ቆሆይ ኑና ጋከና።

22 ሺን ታኒ ሂንቴና ያዮፊቴ ጋዳ ዘራይስ፤ ኣይስ ጊኮ፣ ሃ ማርካቢይ ዳያናፔ ኣቲን ሂንቴፌ ኢሲ ኣሳ ሼምፖይካ ዳዬና።

23 ዚኔ ቃማ ታ ኢያባ ጊዲዳይሲኔ ታ ጎይኒያ ያሳይ ከቲዳ ከታንቸይ ታ ማታን ኤቂዲ፣

24 «ጳውሎሳ፣ ያዮፋ፤ ኑኒ ሮሜ ካዉዋ ቄሳሬ ሲንሳን ኤቃናው ቤሴስ። ሄኮ ያሳይ ኔ ጊሾ ኔራ ቢያ ኣሳ ኡባ ሼምፑዋ ኣሺሱን ያጊስ።

25 ሄሳ ጊሾ፣ ኣሳው፣ ያዮፊቴ። ሄ ከታንቸይ ታው ኦዲዳይሲ ሃናናይሳ ታኒ ኣማናይስ።

26 ሺን ጫርኮይ ኑና ኤፊዲ ኢሲ ሃሳን ቴቄቲዳ ቢታ ጋዩን ሆላና» ያጊስ።

27 ታማኔ ኦይዳንሶ ቃማን ሜዲቲራኔ ኣባን ኑና ጫርኮይ ጌዴኔ ሃ ሱጊሺን፣ ጊዲ ቢላሄ ጊዲያ ዋዴ ማርካቢያን ኦሌይሳታስ ቢታኮ ማቲዳባ ዳኒስ።

28 ኤንቲ ጨሞቴላ ኤራናው ኮዩዲ ዋዶር ያሪን ዴዲያባ ቃቸዲ ኣባን ዩጊን፣ ኣባይ ሆሰፑን ታሙ ዋቆ ጊዲስ። ጉሊ ጋምቢዲ፣ ዘሪ ዩጊን ኡሱፑን ታሙ ዋቆ ጊዲስ።

29 ኤንቲ ኣባ ጋዩን ዴዲያ ሹቻን ደምቤቶና ሜላ ያዩዲ፣ ማርካቢይ ቦና ሜላ ኦይኪያ ኦይዲ ቢራታታ ማርካቢያፔ ጉዬራ ኣባን ዩጊዲ፣ ሳዳይ ዋንታና ሜላ ያሳ ዋሶሶና።

30 ማርካቢያን ኦሌይሳቲ ማርካቢያፔ ባቃታናው ኮዩዲ፣ ማርካቢይ ቦና ሜላ ኦይኪያ ቢራታታ ማርካቢያፔ ሲንሳ ባጋራ ኣባን ዩጊያ ዳኒን ዋጎሎዋ ኣባን ዩጊደሶና።

31 ጳውሎሲ ማቶ ሃላቃኮኔ ዋታዳሬታኮ፣ «ሃይሳቲ ማርካቢያን ሼምፐ ኡቶና ኢዲኮ ሂንቴ ኣታናው ዳንዳዔኬታ» ያጊስ።

32 ሄሳ ጊሾ፣ ዋታዳሬቲ ዋጎሎይ ቃሼቲዳ ዋዶራዋ ቃንዲዲ ዩዲ ኣጊደሶና።

33 ሳዒ ዋንታና ሃኒሺን ኡባይ ካሊ ማና ማላ ጳውሎሲ አሳኮ።
«ሂንቴ ካሊ ሞና ናጊሼ ሃቺራ ታማኔ ኦይዱ ጋላስ ጋምዒዳታ።

34 ሄሳ ጊሾ፣ ጉላ ካሊ ሂንቴ ማና ማላ ታኒ ሂንቴና ዋሳይሰ።
ሂንቴ ጋሽታና ማላ ጉላ ካሊ ማናው ኮሼሰ፤ ሃሪ አቶሺን ሂንቴ
ሁዔ ቢናናፔ ኢሶይካ ጳዩና» ያጊሰ።

35 ጳውሎሲ ሄሳ ጊዲ ኡይሊ ኤኪዲ ኡባ ሲንላን ያሳ ጋላቴሰ፤
ኡይላ ማንሊዲ ሙሱ ደሚሰ።

36 ኡባይ ሚኔቲዲ ባንታው ካሊ ኤኪዲ ሚደሶና።

37 ኦኒ ማርካቢያን ዴዔይሳቲ ናምዑ ፃታኔ ላፑን ታማኔ
ኡሱፑና።

38 ኤንቲ ሚዲ ካሊዳ ዋዴ ጫና ጊሰቲያ አባን ዩጊዲ
ማርካቢያ ዴፀዋ ካወሺደሶና።

ማርካቤይ ማዒሰ

39 ሳዒ ዋንቲዳ ዋዴ ማርካቢያ ኦሳንቸቲ አው ቢታ ጋኪዳኮ
ኤሮናሺን፣ አባ ጋፃን ዴዒያ ሻፌኔ ሲሊሞ ቤዒደሶና። ባንታው
ዳንዳዔቲኮ ማርካቢያ ሄ ሻፊያኮ ሺሻናው ቆፒደሶና።

40 ያቲዲ፣ ማርካቤይ ቦና ማላ ኦይኪያ ቢራታታ ቢርሺዲ
አባን ዩጊደሶና። ሄ ዋዴ ላጊያ ሚላ ቃቺያ ዋደሩዋ ቢርሺደሶና።
ሄሳፊ ጉዬ፣ ጫርኮይ ማርካቢያ ሲንሌ ሱጋና ማላ ማርካቢያ
ኤፊያ ሻራ ሲንላ ባጋራ ቶቄ አሊዲ ቡሱ ደሚደሶና።

41 ሺን ማርካቤይ ሻፊ ደሬን ደምዔቲዲ ሚቴቲሰ።
ማርካቢያሰ ሲንላ ባጋይ ፀጉኒዲ ሻፊያ ጫዲ ኦይኪዲ ቃፆና
ኢዲን፣ ጉዬ ባጋይ ዙሊያ ሱጌላን ማቄሬቴሊ ኦይኪሰ።

42 ዋታዳሬቲ ቃሾ አሳፔ ኢሶይካ ሃላ ዋዲዲ ኬሰ ኤኮና ማላ
ኤንታ ዋዳናው ዘሬቲደሶና።

43 ሺን ማቶ ሃላቃይ ጳውሎሳ አሻናው ኮዪዲ ዋታዳሬታ ዘሬታ
ኢዲሰ። ሃሌ ዋቶ ኤሪያ ኡባይ ማርካቢያፔ ሃላን ጉፒ ጉፒ ዋዲዲ
ካሴቲዲ ጋፃ ኬያና ማላ ከቲሰ።

44 አቲዳይሳቲ ሳንቃ ቦላኔ፣ ማርካቢያ ሚዑዋ ቦላ ኬያና
ማላ ከቲሰ። ሄሳዳ ሃኒዲ ኡባይ ጋፃ ሳሮራ ኬዪደሶና።

28

ጳውሎሲ ማልታ ጊያ ሃላን ቴቄቲዳ ቢታ ቢሰ

1 ኦኒ ጋፃ ሳሮ ኬዪዳ ዋዴ ጋኪዳ ሃላን ቴቄቲዳ ቢታይ ማልታ
ጌቴቲይሳ ኤሪዳ።

2 ማልታ አሳይ ኑስ ዳር ከሃ ከሂደሶና። ኢሪ ቡኪያ ጊሾኔ ማጊያ ጊሾ ታማ ኤሌዲ ኑና ኡባ ሞኪደሶና።

3 ጳውሎሲ ዳር አፊራ ሺሺዲ ታማን ዋሊሺን፣ ሾሺ ሴላ ጊሾ ከዩዲ ኢያ ኩሺያ ቦላ ፃፃቲዲ ኢያ ዱኪስ።

4 ማልታ አሳይ ሾሺ ጳውሎሳ ኩሺን ፃፃቲዲሳ ቤዒዳ ዋዴ ኢሶይ ኢሱዋኮ፣ «ቱማ ሃ ኡራይ ሼምፖ ዋዲዳ አሲ፤ ሃሪ አቶሺን አባፌ ኢ አቲንካ ያሳ ፐርዳፌ * አቲዲ ፓፃ ዳናው ዳንዳዒቤና» ያጊደሶና።

5 ሺን ጳውሎሲ ባ ኩሺያፔ ሾሻ ወፃርኪዲ፣ ታማን ዩጊስ፤ ኢያ አይኮካ ቆሂቤና።

6 ኤንቲ፣ «ኢያ አሳቱላይ ከፃስ፣ ዋይኮ አኬኮና ኩንዲዲ ሃይቄስ» ጊዲ ናሳሶና። ሺን ዳር ዋዴ ናጊዲ ኢያ አሳቱላን አይቢካ ዲማቲዳባይ ቆዩን፣ «ሃይሲ ያሴ» ያጊዲ ባንታ ቆፋ ላሚደሶና።

7 ሄ ሄራን ሃላን ቱቄቲዳ ቢታ ሃላቃ፣ ፑፕሊዮሳ ጌይሳስ ጋዴይ ዴዔስ፤ ሄሹ ጋላስ ጋካናው ኢ ኑና ሲቆን ሞኪስ።

8 ፑፕሊዮሳ አዋይ ቆፆ፣ ሚሻኔ ኡሎ ኡቲሶን ሃርጌቲዲ ዘንዒዲ ዴዔስ። ጳውሎሲ ኢያ ሶ ጌሊዲ ኢያው ያሳ ዋሲስ፤ ባ ኩሺያ ኢያ ቦላ ዋሊዲ ፓላስ።

9 ሄሳፌ ጉዬ፣ ማልታን ዴዒያ ሃርጊያ ሃራ አሳቲካ ዩዲ ፓዲደሶና።

10 ኤንቲ ኑና ዳር ቦንቺደሶና፤ ኑኒ ማርካቤራ ባናው ዴንዲዳ ዋዴ ኦጌስ ኮሺያባ ኑስ አሚደሶና።

ጳውሎሲ ማልታፌ ሮሜ ቢስ

11 ሄሹ አጌናፔ ጉዬ፣ ማልታን ባልጎ አሊዲ ኢስኪንዲሪያ ማርካቤራ ባናው ዴንዲዳ። ሄ ማርካቤያ ቦላ ዲዮስቆርሳ ጊያ ማንቲ ኤቃታ ሚሲሌይ ዴዔስ።

12 ሲራኩሴ ካታማ ጌሊዲ ያን ሄሹ ጋላስ ኡቲዳ።

13 ያፔ ዴንዲዲ ሪጊዩሜ ካታማ ጋኪዳ። ኢሲ ጋላሳፔ ጉዬ፣ ዲጌሃ ባጋ ጫርኮይ ጫርኪን፣ ዋንቲላ ጋላስ ፑቲዮሌ ካታማ ጋኪዳ።

14 ያን ኑኒ ኢሲ ኢሲ አማኒያ አሳታ ዴሚን፣ ባንታራ ሳሚንታ ጋምዓና ሜላ ኑና ዋሲደሶና። ሄሳፌ ጉዬ፣ ሮሜ ቢዳ።

* 28:4 ያሳ ፐርዳፌ፡ ሄ ዋዴ ሄ ቢታን ዲማ ዲማ ማጫ ያሳቲ ዴሶሶና። ኤንታፌ ኢሲያ ኢታ አሊያ አሳ ፐርዲያር። ኢያ ፐርዳ ያሲ ጌቲታ ጌጌታሰ።

15 ሮሜን ዴሲያ አማኒያ አሳቲ ኩባ ሲዲዲ፡ አፊዮሳ ጊያን፣ ሄዥ አቋያሶ ጊያ ቤሳ ጋካናው ኑና ሞካናው ዪደሶና። ጳውሎሲ ኤንታ ቤዲዳ ዎዴ ያሳ ጋላቲዲ ሚኔቲሰ።

ጳውሎሲ ሮሜን

16 ኑኒ ሮሜ ጌሊዳ ዎዴ ጳውሎሲ ባና ናጊያ ዎታዳሪያራ ባርካ ዴዎ ጌቲቲሰ።

17 ሄዥ ጋላሳፔ ጉዬ፣ ጳውሎሲ አይሁዴታ ሃላቃታ ባኮ ፀገሲሰ። ኤንቲ ሺቁዳ ዎዴ ኤንታኮ፣ «ታ አሻቶ፣ ታኒ ኑ አሳ ዎይኮ ኑ አዋታ ዎጋ ቦላ አይቢ ቆሆካ አላቢኬ፣ ሺን ታና ዬሩሳላሜን ቃቺዲ ሮሜ አሳሰ አሏዲ አሚደሶና።

18 ኤንቲ ታ ሞቱዋ ቤዲዲ ሃይቆሰ ጋሏያባ ታ ቦላ አይቢባካ ዴሚቦና ጊሾ ታና ቢላናው ቆፒደሶና።

19 ሺን አይሁዴቲ ሄሳ ኢዲዳ ዎዴ (ታባ ቄሳሬይ ፒርዶ) ያጋሲፔ አቲን ታኒ ታ ዴሪያ ሞቲያባይ ዴዲን ጊዴና።

20 ታኒ ሂንቴና ፀገሲዳይ ሂንቴና ቤዓናዉኔ ሂንቴው ሃይሳ ኦዳናሳ። ታኒ ሃ ሳንላላታን ቃሼቲዳይ ኢሰራዔሌ አሳይ ናጊያ ኡፋይሳ ጊሾሳ» ያገሰ።

21 አይሁዴ ሃላቃቲ ጳውሎሳኮ፣ «ኩሰ ዪሁዳፔ ነባ ፃፊቲዳ ዳብዳቤይ ጋከቤና። ያፔ ዪዳ አሳታፔ ኢሶይካ ነባ ኢታ ኦዲዳይ ባዋ።

22 ሺን ሃ ኔ ካሊያ አማኑዋ ዲማ ዲማ ቤሳን አሳይ ኢዳይሳ ኑኒ ኤሪያ ጊሾ ኔ ቆፋ ሲዓናው ኮዮሰ» ያገደሶና።

23 ኤንቲ ባንታ ያና ጋላሰ ጳውሎሳሰ ቃፃሪዲ፣ ሄ ጋላሰ ዳሪዲ ኢ ዴዲያሱዋ ዪደሶና። ኢ ዎንታፊ አማርሲ ጋካናው ያሳ ካዎቱላባ ኤንታው ማርካቲሰ። ቃሲ ኤንቲ ዬሱሳባ አማናና ሜላ ሙሴ ሂጊያፊኔ ናቤታ ማፃፋፔ ቆንጨሲዲ ኤንታ ታማርሲሰ።

24 ኢሶቲ ኢሶቲ ጳውሎሲ ጊዳይሳ አማኒደሶና፣ ሺን ሃራቲ አማኒቦኮና።

25 ኤንቲ ባንታ ጊደን ኦዳ ማዖና ኢዲዳ ዎዴ ጳውሎሲ ኢሲባ ጊዳፔ ጉዬ ቢደሶና። ኢ ሃይሳዳ ያገሰ። «ጌሻ አያናይ ኑ አዋታሰ ናቢያ ኢሳያሳ ደናን ኦዲዳይሲ ቱማ።

26 ሳኒ ሄ አሳኮ ባዳ፣ ሂንቴ ሲሳ ሲዔታ፣ ሺን ሂንቴው ጌሌና፤

ሂንቴ ቤዎ ቤዔታ፣ ሺን ዴሜኬታ።

27 ሃ አሳ ዎዳናይ ሙሚሰ፤

ኤንታ ሃይላይ ቱሊስ፤

ኤንታ አይፊይካ ጎዜቲስ።

ሄሲ ባይኔኮ፤

ኤንቲ ባንታ አይፊያን ቤዒዲ፥ ባንታ ሃይላን ሲዒዲ፥ ባንታ ዎዛናን አኬኪዲ፥

ኤንቲ ታኮ ሲማና፤

ታካ ኤንታ ፓላናሺን» ያጋ» ያገሰ።

28 «ሂዛ፥ ሃይሲ ያሳ አቶቲላ ኪታይ አይሁዴ ገደናይሳታስ ገዴይሳ ኤሬታ። ኤንቲካ ሲዓና» ያገሰ።

29 ጳውሎሲ ሄሳ ገዳፔ ጉዬ አይሁዴቲ ባንታ ገደን ዳር ፓላሚሽ ኬዩዲ ቢዶሶና።

30 ጳውሎሲ ኬራ ኬላን ናምዑ ላይላ ኩሜላ ዴዒስ፤ ያን ዴዒሽ ባኮ ያ ኡባ ሞኬስ።

31 ያሺ ባይናኔ ኦኒካ ዲጎናሺን ያሳ ካዎቲላባ ሳባኪስ፤ ጎዳ ዬሱስ ኪሪስቶሳባ ቆንጨሲዲ ታማርሴስ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5